

## فندق الماريوت الزمالك

لقطة عامة جدا لفندق الماريوت من الخارج،  
الكاميرا تقترب من الفندق ببطء شديد، وباقترابها  
تظهر مهمات بشرية متداخلة، كأنها عشرات  
الأحاديث الجانبية

- مزج -



## قاعة احتفالات كبرى بالماريوت

على ماكيت كبير الحجم، يجسم مشروعا سياحيا متكاملا، الواضح أنه على شاطئ، وبه مبنى رئيسي ربما يكون فندقا، ومن حوله مجموعة من الوحدات السكنية والشاليهات وحمامات السباحة والحدائق.. الماكيت يجب أن يكون مبهرًا تمامًا، تصميم المبنى الرئيسي والوحدات الملحقة يبدو مبتكرا ومتفردا.. الكاميرا تستعرض تفاصيل الماكيت على مهل، بينما نسمع الهمهمات المستمرة من المشهد السابق بشكل أوضح.. ثم نسمع حوارا بين رجلين

ص. رجل1: إيه الجمال ده؟!  
ص. رجل2: رهيبه صح؟  
ص. رجل1: كل حاجة فيها بالمقاس  
ص. رجل2: ابداع ابداع ابداع  
ص. رجل1: أنا عمري ما شفت حاجة كدة في مصر..  
ص. رجل2: لأ، بلاش مبالغة.. وبعدين أنا عرفت إنها متطلقة

الآن تقطع الكاميرا على الرجلين المتحدثين، يرتديان ملابس رسمية، ويعلقان كارتبهات في أحزمة ملونة حول عنقيهما، وهما جزء من الحفل في القاعة.. يقفان أمام الماكيت الضخم، لكن



"رجل2" ينظر إلى ركن بعيد في القاعة، بينما يرفع "رجل1" بصره عن الماكيت لتوه

رجل1 (بدهشة): أنا باتكلم على Design المشروع!

رجل2 (يوميء برأسه إلى الركن البعيد): وأنا باتكلم على القمر اللي هناك دي..

ينظر "رجل1" إلى حيث أشار زميله، فيتהל وجهه

رجل1 (بنفس طريقة نطقه للجمله أول مرة) إيه الجمال ده؟!

تنتقل الكاميرا فورا إلى حيث ينظران، لنرى "أميرة" مرتدية ملابس سهرة، تجمع بين الأناقة اللافتة والشكل العملي الرسمي، وتتوسط رجلين كبيرين في السن، "طلعت" و "د. جلال"، والأول يقوم بمهمة تعريف أميرة على الثاني

طلعت: د. جلال الورداني، صاحب شركة "ماجيكال" اللي صممت المشروع وهتشرف على تنفيذه

أميرة (تصافح جلال): أهلا يا دكتور طلعت (لجلال): أميرة يا جلال بيه، هتكون المسئولة عن الMarketing جلال (مشاكسا): مش صغيرة شوية يا طلعت؟

بحركة سريعة تخرج "أميرة" من جيب داخلي نظارة طبية وترتديها بيد، وتقوم بلم شعرها المسدول بقبضة يدها الثانية

أميرة (لجلال): طب إيه رأي حضرتك كدة؟ جلال (بعد لحظة صمت وقد بوغت بحركتها): إشتريت.. (ثم يضحك ضحكة فخيمة فيجاريانه) طلعت (لجلال): أميرة كفاءة نادرة عندنا في الوكالة.. فاكّر حضرتك مشرع Casamia جلال (بتقدير): ممم إنت اللي عملتي الMarketing بتاعه؟

طلعت: باعتّه لحد آخر متر.. أميرة (لجلال): بصراحة يعني يا دكتور، بغض النظر عن أي خبرة، مش ممكن حد يتعب في تسويق مشروع عكو ده.. (وهي توميء تجاه الماكيت): ال Design خرافي..







الكاميرا تنتقل لاستعراض الماكيت بينما يتواصل صوت أميرة

ص. أميرة: أنا لحد الوقت مش مصدقة إن مهندس مصري هو اللي عامله.. جاب الخيال ده منين؟! ص. رجل3(كأنه يرد عليها): تلاقيه لاطشه من Design أي حاجة برة..

تقطع الكاميرا على إثنين من الحضور يقفان أمام الماكيت

رجل4: يا راجل حرام عليك.. ده مهندس له إسمه في السوق رجل3: أديك قلتها بنفسك.. له إسمه.. خالد الشهاوي.. حد شافه قبل كدة؟! حد يعرفه؟! حد اتكلم معاه؟!

ينضم "وليد" إلى الرجلين، ويبدو أنه كان متابعاً لحديثهما

وليد (لرجل3): أنا أعرف خالد الشهاوي على فكرة.. رجل3 (بتهمك): دي حظوظ بقه.. أنا شغال في العقارات بقالى سبع سنين عمري ما قابلت خالد ده وليد (مجارياً): لأ مهندس شاطر.. وبالمناسبة الرسم الهندسي له Copy Rights، يعني لو فيه Design ممكن الشركة كلها تقفل. رجل3 (مواصلًا سخريته): يا عم حد واخد باله؟! Copy Rights إيه بس! وليد (يضحك مجارياً): على رأيك.. رجل4 (لوليد): آمال حضرتك تبقى.. وليد (مقاطعاً): وليد الشهاوي.. المهندس التنفيذي للمشروع (ثم لرجل3) شوف الصدف.. خالد يبقى أخويا. رجل3 (بارتباك): إ..... إ..... وليد (بتلقائية يشير لمكان ما): الحمام هناك..

ينصرف الرجلان بخجل ووليد يضحك عليهما، ثم يقبل عليه صديقه "كريم" متسانلاً..

كريم: ول.. إيه نظام الريسيشن ده؟! البوفيه اتأخر ليه؟ وليد: يا بني آدم مش لسه فيه ناس هنتكلم، وشريط هيتقص.. كريم (بإحباط): شريط!! طيب.. آمال! مين المزة اللي واقفة مع الرئيس دي؟

يوميء "كريم" تجاه "أميرة".. يلقي عليها "وليد" نظرة سريعة ثم

وليد: يا أخي عيب كده.. عيب.. ده انتك خطوبتك معداش عليها شهر..



كريم: شفتني يعني رحت طلبت إدها.. ده مجرد  
إعجاب برىء  
وليد: طب ائلم بقه يا برىء عشان جايين علينا..

يقبل عليهم "جلال" ومعه "أميرة"

جلال (يعرفهم): وليد أميرة قنديل، Marketing  
Consaltant تبع ال IMC وهي اللي هتمسك  
البروجيكت ده..

"وليد" و"أميرة" يتصافحان

وليد: أهلا..  
أميرة: تشرفنا..  
جلال: اتفضلوا معايا انتو الاتنين بقه.. عشان فيه  
حاجة مهمة جدا

يقول جملته ويمضي أمامهما.. تلحق به "أميرة"،  
بينما "كريم" يغمز لـ "وليد" بخبث قبل أن يسير  
خلفهما

كريم: أيوة.. أيوة..  
وليد: شش..

- قطع -



## غرفة إجتماعات ملحقة بالقاعة

في الغرفة يجلس "صلاح"، رجل يقترب من الخمسين تبدو عليه الهيبة، بينما "جلال" يقف مع "وليد" و "أميرة" بجوار الباب الذي دخلوا منه لتوهم، وييعرفهم بالرجل.

**جلال:** الأستاذ صلاح فواز.. العضو المنتدب للمجموعة الاستثمارية صاحبة المشروع.. عنده خبر كويس لأخوك خالد.. إشرحلهم يا صلاح بيه..

**صلاح:** المسألة ببساطة إن المجموعة بتاعتنا هتعمل للمنتج السياحي ده، فروع في أماكن مختلفة من العالم.. for example هنعمل في ماليزيا، South Africa ، تركيا.. التفكير في البداية، كان إن كل منتج منهم يبقى له طابع وشكل مختلف عن كل الفروع.. لكن بعد الدراسة، لقينا إن ال Design بتاع المهندس خالد للفرع المصري، مؤهل إنه يكون العلامة المميزة لسلسلة المنتجات All over the world

**جلال (شارحا):** يعني ال Design اللي شركتنا هتنتفذه هنا، هو اللي هتنتفذه في أي فرع للمنتج على مستوى العالم

**وليد (بسعادة):** ده خبر عظيم..

**صلاح (بعملية):** I Know لكن لازم المهندس "خالد" يمضيلنا شخصا بالموافقة على كدة..

**وليد:** أكيد طبعا.. بكرة الصبح خالد بييجي معايا المكتب و..

**صلاح (مقاطعا):** No way .. أنا طيارتي الساعة 3 الفجر، واجتماع مجلس إدارة المجموعة ه يكون في دبي الساعة 10 صباحا

**جلال (لوليد):** يعني خالد لازم بييجي ويمضي.. دلوقت..

**صلاح (وهو يفتح حقيبته ويخرج منها ورقة وشيك):** كل حاجة جاهزة.. عقد الموافقة..

والشيك.. أنا اندهشت لما عرفت إنه مش موجود الليلة في الحفلة!

**وليد (باعتذار):** هو بس عنده ظروف كده..

**جلال (مقاطعا):** ظروف إيه يا وليد؟! خالد بيعمل شغل لشركتنا بقاله عشر سنين، ما قبلتوش لحد النهارده غير ثلاث أربع مرات!

**وليد:** أيوة هو..

**جلال (مقاطعا):** فنان يا سيدي.. عارفين..

ومقدرين فنه.. لكن يا ريت يتنازل النهارده

ويشرفنا، ويمضي.. ياللا كلمه



يخرج "وليد" محموله من جيبه ويتجه للخروج من الغرفة

وليد: OK .. هاكلمه.. هاخلية ييجي..  
جلال (موافقا إياه): وانت هنا.. عشان لو عصلج معاك تدهوني.. أنا أعرف أتعامل مع دلع الفنانين ده..  
وليد (ممتثلا للأمر، وضاحكا بارتباك): هي هي ..OK..OK

يتجه "وليد" إلى زاوية في الحجرة، ويعطي ظهره لثلاثتهم.. يطلب الرقم ويضع الهاتف على أذنه، في الخلفية "جلال" يحدث "أميرة"

جلال: أظن مافيش خبر أحسن من كده تقومي عليه ال Campaign بتاعك..  
(ثم نسمع صوت الجرس في تليفون وليد)

- قطع -



## غرفة خالد في المنزل

الكاميرا تستعرض غرفة "خالد" في "بان" بطيء، مصاحب لصوت جرس تليفون أرضي.. على الحائط مجموعة من الصور الشخصية لـ "خالد" في مراحل عمرية مختلفة، وأسفل كل منها ورقة تشير إلى سنة التقاط الصورة.. وتوجد أيضا لوحة كبيرة عليها مجموعة من أسماء الأدوية ومواعيد تناولها.. ولوحة ثانية عليها أسماء أشخاص وأرقام تليفونات، في أحد أماكن الغرفة طاولة للرسم الهندسي، ويوجد عدد من الماكينات الهندسية في أكثر من مكان.. في صدر الغرفة مكتبة كبيرة تحتل حائطاً كاملاً، وهي مقسمة إلى درف وأدراج شبيهة بشكل المكتبات العامة، وعلى كل درفة أو درج ورقة مكتوب عليها كلمة ما لانتبينها.. الهاتف موضوع على مكتب، نلاحظ أن عليه كتب كثيرة، أغلبها دراسية، ونلمح بوضوح أن أحدها كتاب الرياضيات للصف الثاني الثانوي.. ينتهي الـ "بان" عند "خالد" نفسه، جالسا على سريره، وبين يديه كتاب هندسي.. ينظر للهاتف بتوجس.. ثم ينهض ويتجه إليه، ينظر إلى شاشة إظهار رقم الطلب ليقرا عليها اسم "Waleed" فيرفع السماعة.

خالد: أيوة يا وليد  
صوت وليد (يبدو خافتا): خالد ضروري تيجي  
الحفلة، معلش.  
خالد (مستوضحا): إيه؟! مش سامعك

- قطع -



## غرفة الاجتماعات الملحقة لقاعة الماريوت

وليد في مقدمة الكادر، يتحدث في محموله بصوت  
يحاول جعله واضحا وخفيفا في ذات الوقت،  
بينما "صلاح" و "جلال" و "أميرة" في خلفية  
الكادر يتحدثون حديثا لا نسمعه

وليد: عايزك تبيجي الحفلة باقولك.. فيه حاجة  
مهمة جدا لازم تمضي عليها بنفسك.. لا مش  
هينفع تتأجل لبكرة..

- قطع -



## غرفة خالد بالمنزل

خالد: طب! طب! أنا إزاي يعني! هاتصرف  
إزاي؟!.. وحفلة.. وناس.

"خالد" يتحدث في التليفون بارتباك واضح..

- قطع -



## غرفة الاجتماعات الملحقة بقاعة الماريوت

"وليد" لا زال على وضعيته المتكئمة في مقدمة الكادر، لكن نلاحظ أن "أميرة" في الخلفية قد انتبهت لحديثه مع الوقت لغرابة مفرداته، منجذبة بذلك عن الحوار الدائر بين "جلال" و "صلاح" والذي لانسمع منه شيئا

وليد: ما تقلقش.. أنا موجود، مش هاسيبك لوحذك.. لا مش هينفع.. تلبس إ... بص الدرفة الثانية في الدولاب بتاعي.. خد أي بدلة منها والبسها... في الماريوت.. فندق كبير في الزمالك.. أيوة التاكسي هيبقى عارفه كويس.. هتدخل من البوابة الرئيسية وتسال على قاعة الأوركيد، أنا هبقى قريب من باب القاعة.. التاكسي؟ ابقى اديله خمسة جنيه.. هتلاقي فلوس في درج المكتب الثاني.. ما تتأخرش.. المشوار من عندك هياخدله ربع ساعة تقريبا.. خللي بالك من نفسك.. باي..

يغلق الموبايل، وينظر تجاههم فتسارع "أميرة" بإشاحة النظر عنه كي لا ينتبه لمتابعتها للمكالمة..

وليد: هيجي في خلال ساعة

- قطع -



## غرفة خالد بالمنزل

يعيد "خالد" سماعه الهاتف إلى مكانها، ويلتقط منديلا ورقيا من علبة على المكتب، يفركه بيده، ويمسح عرقا لا نراه على وجهه، يبدو توتره في ذروته.. يتجه ناحية المكتبة الكبيرة في صدر الغرفة.. يدور بعينه لاهثا بين الملصقات الموجودة في الدرف الأدرج، الآن نتبين المكتوب على هذه الملصقات: "العائلة"، "الجيران"، "أحداث عامة"، "الشركة"... يفتح درفة "الشركة" فنرى بداخلها عددا من الأدرج الصغيرة، على كل منها ملصق بعنوان: "مشاريع"، "شخصيات"، "التوقيع"، "شئون مالية".. يفتح درج "الشخصيات"، يخرج منه مظروفا كبيرا يخرج منه صورة لشخص ما في الأربعيات، يقلب الصورة فنقرأ معه ملصقا على ظهرها: "الأستاذ فؤاد.. مدير الحسابات، قابلك كثيرا ويعرفك جيدا".. يخرج صورة أخرى "لكريم" صديق "وليد" الذي شاهدناه في الحفل، وعلى ظهر الصورة ملصق: "كريم السيد، مهندس Plumbing، صاحب وليد، قابلك كثيرا ويعرفك جيدا".. يخرج صورة ثالثة، هي "لجلال" صاحب المكتب الاستشاري، ومكتوب على الملصق في ظهرها: "د. جلال الورداني، صاحب الشركة، قابلك سبع مرات، أهمها عزومة على فرح بنته سنة 1998" يتجه "خالد" نحو المكتبة، يفتح درج "التوقيع"، يخرج منه ورقة عليها تكرار لتوقيعه الشخصي، وهو عبارة عن كتابة إسمه دون انحرافات بخط عادي، يتأملها قليلا ثم يعيدها إلى مكانها، وفتح درج "المشاريع"، يخرج مجموعة أظرف مكتوب عليها: "الزهاء مول"، "ميجا أيلاند"، "إنفينيتي".. يفتح مظروف "إنفينيتي"، يخرج منه رسما هندسيا كبيرا، مطوي بعناية.. يفتح الرسم ويفرده على طاولة الرسم الهندسي، نجد أنه الرسم المطابق لماكيت المنتج السياحي الذي رأيناه في الحفل.. تستقر الكاميرا الرسم







## قاعة الاحتفالات الكبرى في الماريوت

على الماكنيت الذي يتوسط القاعة، ومنه "زووم أوت" لنرى أن القاعة أصبحت أكثر نظاما، وقد جلس أغلب الحاضرين على الطاولات يستمعون لكلمة "طلعت" الذي يلقيها من خلف منصة في صدر القاعة، ونرى "وليد" جالسا على طاولة قريبة إلى ما من الباب الرئيسي للقاعة ( لاحظ أن الباب يفضي للقاعة من منتصفها)، "وليد" ينقل بصره بقلق بين ساعة يده وباب القاعة، وعلى طاولة أخرى نرى "أميرة"، تنقل بصرها بفضول بين "وليد" وباب القاعة أيضا.. على كل ما سبق، نحن نستمع لكلمة "طلعت"..

**طلعت:** إنفينيتي مش مجرد منتج سياحي وصحي جديد نتقدمه IMC لعملاءها.. زي ما حضراتكو تقدروا تشوفوا بنفسكو من التفاصيل في ال Guides اللي معاكمو.. ده نقلة عالمية في مجال الاستثمار السياحي، وكلمة عالمية هنا بقصدها تماما، وما فيهاش أي مبالغة

يظهر "خالد" على باب القاعة، يطل بعينه في حذر.. نرى المنظر من وجهة نظره وكان الضوء ساطع أكثر من اللازم، وكان عدد الحضور أكبر من العدد الحقيقي.. يمد يده في جيب الجاكنيت ويخرج منديلا ورقيا، يفتك به بين أصابعه.. ينقل بصره لاهثا بين الوجوه والرووس.. وفي اللحظة التي يلمحه فيها "وليد"، ينتبه لوجوده شخص كان جالسا على طاولة أقرب للباب.. ومن فوره يتجه هذا الشخص نحو "خالد"

**رجل 5 (هاتف):** خالد الشهاوي..

آخرين ينتبهون ومنهم "أميرة"، ويقف البعض للاستطلاع، ويتوقف "طلعت" عن إلقاء كلمته، بينما يحتضن "رجل 5" خالد بحرارة

**رجل 5 (وهو يحتضنه):** أخيرا حنيت علينا..

"خالد" يبدو ذاهلا مستسلما للحضن، ولا يعرف هذا الشخص.. ويتزايد عدد المتجمهرين المقتربين منه، وبصعوبة يخترقهم "وليد".. من وجهة نظر "خالد" يبحث لاهثا بين الوجوه والرووس، حتى يلمح "وليد"..

يمد "وليد" يده ويقبض على ذراع "خالد" ويجذبه إلى جواره بقوة، ثم يميل عليه هامسا

**خالد (كأنه يستغيث):**.. وليد

**وليد (يهمس):** ابتسم وامشي معايا



يستجيب "خالد" بشكل ألي، فيبتسم ابتسامة ساذجة ويخطو مع "وليد"، في نفس الوقت نرى "أميرة" تميل على أذن "طلعت" على المنصة وتهمس له بشيء ما وهي تنظر تجاه "خالد" و "وليد"

**طلعت (في الميكروفون):** نرحب كلنا يا جماعة بصاحب التصميم البديع لـ "إنفينيتي" .. المهندس "خالد الشهاوي" ..

تضج القاعة بالتصفيق، وتصدر عدة فلاشات تصوير، بينما يتجمد "خالد" و "وليد" في سيرهما ..

**طلعت (بعد التصفيق):** أنا عرفت أن الباشمهندس ما بيظهرش كثير .. وعازب أستغل وجوده عشان يقولنا كلمة عن المشروع .. اتفضل يا باشمهندس ..

تحتبس أنفاس "خالد"، لكن "وليد" يدفعه نحو المنصة ويهمس في أذنه

**وليد (هامسا):** أنا معاك .. أنا معاك .. ماتقلقش .. قول إنه مشروع خاص، وكلن محتاج تصميم من نوع خاص .. كلام في العموميات كده .. وقول إنك ماتستاهلش كل ده، وإنك بترتبك .. عادي يعني ..

يصل "خالد" بمصاحبة "وليد" إلى المنصة .. يبدو أنه يتلوى في وقفته وكأنه يقاوم احتباس البول .. وبحركة لا إرادية يستمر في تجفيف عرق غير موجود، يقرب وجهه للميكروفون، ثم يبدأ في الكلام بصوت مرتعش، وأثناء حديثه نرى ردود الفعل المتابعة على "أميرة"، "جلال"، "صلاح"، وعلى "رجل3" الذي ترسم على وجهه ابتسامة ساخرة

**خالد (في الميكروفون):** إ.. مساء الخير .. أنا مش عارف أقول إيه .. ده مشروع خاص .. و.. وكان محتاج إ.. شغل من نوع خاص .. و.. إ.. أنا مابعرفش أتكلم يعني .. يا ريت .. إ.. يا ريت يكون الشغل حلو فعلا .. و.. شكرا ..

تضج القاعة بالتصفيق المضاعف، بينما لا يقف "خالد" بثبات ويميل على أذن "وليد"

**خالد (هامسا):** عازب أخش الحمام ... حالا ..

يسحب "وليد" ويعبر به الطاولات نحو باب القاعة ويخرجان، بينما يعاود "طلعت" موقعه خلف الميكروفون

**طلعت:** مفاجأة جميلة فعلا إن المهندس الموهوب خالد ..



## حمام في الماريوت

"خالد" يسند ذراعيه مفردان على الحائط خلف  
المرحاض، وجهه يقطر عرقاً، صوت تبوله  
يستمر مدة طويلة نسبياً، وعلى ملامحه تبدو  
علامات الراحة..

- قطع -



## غرفة الاجتماعات بقاعة الماريوت

"خالد" يوقع بالموقعة على الورقة التي يقدمها له  
"صلاح"، "جلال"، و "وليد" في الغرفة..  
"خالد" يوقع بكتابة اسمه دون أي إنحرافات..

صلاح (مداعبا): هي دي إمضتك؟! طب يا راجل  
كنت قولنا نكتب إسمك وخلاص بدل ما ننزلك  
مالبيت مخصوص (ثم يضحك)  
جلال: بيوفر فنه للتصاميم، ما بيحطوش في  
إمضا..

يبتسم "خالد" للتعليق في بلاهة، بينما يقدم له  
"صلاح" شيكا بنكيا

بتلقائية يأخذ "خالد" الشيك من يد "صلاح"  
ويسلمه ليد "وليد" دون النظر إليه، "صلاح"  
يلاحظ الحركة لكنه لا يعلق عليها..

صلاح (لجلال): متيألي اقول الكلمة بتاعتي  
دلوقت.. عايز ألحق أريح شوية قبل معاد  
الطيارة..  
جلال (ناظرا في ساعته): يا دوب..

في طريقه للخروج من الغرفة، يصافح "صلاح"  
كلا من "وليد" و "خالد"

صلاح: فرصة سعيدة يا باشمهندس..  
وليد: إحنا أسعد يا صلاح بيه..

يخرج "صلاح" و "جلال" من الغرفة.. تلتقي  
نظرات "خالد" و "وليد"، وترتسم على الأول  
ابتسامة لوم خفيفة مع تهيدة..

وليد (كأنه يعتذر): معلش.. خذتك علفة خفيفة  
بنص مليون جنيه..  
خالد (ناهضا): طب أروح أنا بقه..  
وليد: لا استنى انا هروحك.. لو مشيت على طول  
كدة هتبقى حاجة ملفته قوي.. ربع ساعة أتأكد إن  
د. جلال مش هيجتاجني في حاجة ونمشي مع  
بعض..  
خالد (بتردد): يعني إ..  
وليد: خلاص كل الناس شافوك، والعاصفة عدت  
على خير..

يتبادلان النظرات المبتسمة.. ثم ينفجر "خالد" في  
الضحك بغير سيطرة على نفسه، ويتبعه "وليد"..  
يسترسلان في الضحك.. ثم يهدأ "وليد"

وليد: أنا هاظبطلك ترابيزة في مكان هادي..







## قاعة الاحتفالات الكبرى في الماريوت

كلام "وليد" ورد "خالد" مستمران من المشهد السابق، هنا نرى "خالد" جالسا بمفرده بالفعل على طاولة في ركن القاعة بجوار باب "التراس"،

"صلاح" خلف المنصة ينهي كلمة لا نسمعها، ويصفق الحضور تصفيقا لا نسمعه

ص. وليد (متوصلا من المشهد السابق): تقعد عليها لوحك وبراحتك، وفي أقل من نص ساعة هاخذك ونمشي.. ok؟  
ص.خالد: ok

تقترب أميرة من "خالد" الذي يجلس شاردا، وعندما تحدثه يجفل..

أميرة: باشمهندس خالد.. مساء الخير..  
خالد (بارتباك): إ.. أهلا..  
أميرة: تتضايق لو قعدت معاك؟  
خالد (كأنه مضطر): إممم.. لأ.. (ثم يسألها بصدق) احنا اتقابلنا قبل كدة؟  
أميرة (وهي تجلس على مقعد أمامه بزاوية): أنا أول مرة أتشرف بمعرفتك النهاردة، لكن عارفة شغلك الجميل من زمان.  
خالد: متشكر..

تسود لحظة صمت تقطعها "أميرة"

أميرة: أنا إسمي أميرة قنديل.. المفروض إني هكون المسئولة عن ال Marketing في المشروع ده..  
خالد (وهو يبحث بعينيه عن شيء ما خلفها): كويس

من وجهة نظره نعرف انه يبحث عن "وليد"، ليجده في حديث تبدو عليه الأهمية مع "جلال"

أميرة: واضح إنك مش واخذ على جو الحفلات وكده يعني..  
خالد: يعني..  
أميرة (بإصرار على جذب انتباهه): أنا أسفة إني ورطتك في حكاية الكلمة دي..  
خالد (ينتبه فعلا): كلمة إيه؟  
أميرة: أنا اللي قلت لممستر طالعك يدباك الميكروفون أول ما وصلت



خالد: أه.. إ.. أنا بس ما كنتش عارف المفروض أقول إيه..

أميرة: ممكن أسألك سؤال؟

خالد: إيه..

أميرة (قبل انتظار رد): Design زي ده خد منك وقت قد إيه لحد ما خلصته؟ (قالتها وهي توميء تجاه الماكيت الذي يتوسط القاعة)

خالد (بتلقائية): مش فاكرك..

أميرة (ضاحكة بدهشة): يعني إيه؟!

خالد: صعب حاجة زي دي تتقاس بالوقت.. أكيد الشكل كان في بالي من زمان، (ثم مشيرا لرأسه) كان هنا قبل ما ارسمه.. إنما كان هنا من امتي؟! ما عرفش..

تستغرق "أميرة" لحظة في التفكير والاستيعاب قبل أن تفلت منها ضحكة..

أميرة: غريب قوي..

خالد: ال Design

أميرة: لا ال.....

يقاطعها رنة هاتفها المحمول.. الرنة عبارة عن أغنية "شيرين" (عايزة الملم قلبي).. تنظر "أميرة" للشاشة وتمط شفيتها بضيق، وتعيد الهاتف المستمر في الأغنية إلى الطاولة..

أميرة (تعتذر): معلش لسة جايبة الموبايل أول إمبارح ومش عارفة أعمله Silent.. ومش عايزة أرد..

يهز "خالد" رأسه متفهما.. ويبدو مستغرقا في سماع الأغنية، بينما "أميرة" مبتسمة في خجل ابتسامة بلهاء.. وبمجرد انتهاء الرنة..

أميرة (بإحراج): الموبايلات كل ما بتطور أكثر.. بتتعد

خالد (لا يجد ما يقوله): ممم..

أميرة: إنت موبايلك إيه؟

خالد: أنا.. ماعنديش موبايل..

أميرة (مندهشة تماما): فعلا؟! طُـب ليه؟!

خالد (وقد شعر أنه في مأزق): إ.. بانساه على طول.. إممم... وباحس إني مش محتاجه..

علامة الدهشة المعظمة على وجه "أميرة" تقطعها رنة جديدة من هاتفها المحمول.. تنظر إلى الشاشة ثم..

أميرة (وهي تنهض): معلش مضطرة أرد.. عن إذنك (ثم في الموبايل بحدة): أيوة..

تتحرك "أميرة" مبتعدة عنه قليلا، يبحث "خالد" عن "وليد" بين الحضور ليجده ما زال مع "جلال".. الفرقة الموسيقية اتخذت موقعها وبدأت



في ضبط الآلات، ينهض "خالد" ويتجه إلى باب  
التراس ويخرج من القاعة..

- قطع -



## التراس الملحق بقاعة الاحتفالات في الماريوت

التراس يبدو مجهزا ليكون امتدادا للحفل في القاعة، لكن أحدا لا يجلس فيه، يقف "خالد" أمام السور، يتنسم لفحة هواء باردة تداعب وجهه، وأصوات الفرقة الموسيقية تنساب من الداخل خافتة هادئة.. يتأمل النيل المواجه للتراس.. في النيل يتهاذى مركب من النوع ذي الدورين، يبدو خاليا من الركاب ومظلما، يتابعه "خالد" ببصره.. يفيق على دخول "أميرة" إلى التراس

أميرة: يا بختك بحكاية الموبايل دي..

خالد: نعم

أميرة: شاري دماغك.. لا حد يطلبك في وقت مش

مناسب.. ولا حد يطاردك وانت مش طايقه

خالد: طب إذا كان للدرجة دي مزعج، محتفظة

بيه ليه؟

أميرة (مستغربة منطقته): الشغل والأصحاب

والمعارف، كل حاجة مربوطة بيه..

خالد: إنت ما جربتيش عشان تعرفي هينفع وللا لأ

خالد: اقلقيه.. حطيه في شنطتك وانسي إنه

موجود..

يبدو على "أميرة" التفكير في كلامه، فيواصل

بعد لحظة تفكير إضافية تنفذ "أميرة" ما قاله

بالفعل، وتعلق الموبايل، وتضعه في حقيبتها..

خالد (بابتسامة هادئة): شايفة؟ الدنيا ذي ما هي..

ما تهدتش ولا حاجة

أميرة: إانت جايب الروقان ده منين؟!

أميرة: آ.....

يسقط شيء ما سائل على رقبة "أميرة" فتجفل

وتهم بحركة لا إرادية لإزاحته بيدها

يسارع "خالد" بإمساك ذراعها لمنعها مما تنتويه،

ونرى أن ما سقط عليها هو براز طائر من

الطيور

خالد: استني أحسن ما تزروطي الدنيا..

أميرة (باستسلام وجزع): ده إيه ده؟ إيه ده؟ ها؟!

خالد (وهو يخرج من جيبه منديلا ورقيا): يظهر

عصفور من العصافير المعششة هنا عنده برد

أميرة (بقرف وهي محنية الرأس بوضع ثابت):

بع ع ع ع ...















## قاعة الاحتفالات الكبرى في الماريوت

"طلعت" مع "أميرة" و "دينا" وسط الحضور،  
"طلعت" يبلغها بتعليمات وهي تهز رأسها موافقة  
بينما عينيها على التراس، تجاهد لترى "خالد" مع  
"وليد" يتحدثان، لكن زاوية وقوف "خالد" لا  
تسمح لها برؤيته دائما

طلعت: أول ما يقولك Ok هتبعثيله ميل بالشروط  
أميرة: أ....  
طلعت: وطبعا من غير ما تحسسيه إن فيه مشكلة  
في موضوع البنك..  
أميرة: طبعا.. آ..

- قطع -



## أمام البوابة الخارجية للماريوت

يخطو "خالد" خارج الفندق، ينزل إلى الشارع..  
يلوح التاكسي يقترب.. يتوقف التاكسي..

يركب بجوار السائق، وينطلق التاكسي

- قطع -



## داخل التاكسي

يرتكن "خالد" بذراعه على الشباك المفتوح،  
ويتكىء برأسه على كفه، يتابع بعينيه ما تمرق  
عليه السيارة، من وجهة نظره نرى السيارات  
والأشجار والمارة على الأرصفة..

- قطع -











## قاعة الاحتفالات الكبرى بالماريوت

الحفل تسوده حالة من الحركة، كريثون يحملون أطباقا مليئة بالطعام، الأحاديث الثنائية والثلاثية في كل مكان، والباند الغنائي يقدم إحدى فقراته التي لا يتابعها إلا مجموعة من الجالسين على الطاولات المحيطة بالبست.. في أحد الأماكن يقف "جلال" مع "وليد" ويبدو أن الثاني قد أصابه الإعياء من طلبات رئيسية

جلال: لازم تفهمهم إن النظام ده ما ينفعش  
وليد: حاضر

جلال: بكرة الصبح لازم القصة دي تكون  
منتبهة..

وليد: أيوة.. بكرة الصبح.. لكن دالوقتي ممكن  
ناكل.. صح؟ أنا جعت

جلال (بازدراء مصطنع): روح يا خويا كل..

يتركه "وليد" وتنهد تنهيدة خلاص.. يقترب منه  
"كريم" الذي يأكل باستمتاع..

كريم: الرئيس ظبطك مع المزة يا معلم..

وليد: إنت جاي منين ياله؟ ده شغل..

كريم: طبعا شغل.. أحلى شغل..

إوعى الشغل جايك أهو

ثم مشيرا إلى ظهر "وليد"

تأتي "أميرة" وينسحب "كريم"

أميرة: باشمهندس وليد..

وليد: إ.. أهلا يا أميرة

أميرة: هو الأستاذ خالد مشي؟

وليدك: آ.. من بدري..

أميرة: طب ليه كده، ده مالحقش يقعد!

وليد: ما تشغلش بالك.. إنت كنت عايزة منه  
حاجة؟

أميرة: لا أبدا هو!....

يقاطعها دخول "طلعت"

طلعت: أميرة (ثم يشير باتجاه ما) دول الجماعة

اللي قاتلك عليهم

أميرة (تومىء متفهمة): ok (ثم لوليد وهي وأنت ح



منصرفة) عن إذك..  
وليد: اتفضلي..

يولي " وليد" وجهه ناحية الباند الموسيقي..  
نستمع إلى جانب مما يعزفون وهو نهاية مقطوعة

- مزج -



## قاعة الاحتفالات الكبرى بالماريوت

البست خالي من الفرقة والآلات.. القاعة كلها  
أصبحت خالية من المدعوين.. عمال الفندق  
يقومون بتنظيف الطاولات ولملمة البقايا..

- قطع -



## سيارة أميرة + كوبري أكتوبر باتجاه مدينة نصر

السيارات على الكوبري قليلة مما يشير بتأخر الوقت.. نتابع سيارة "أميرة" في اتجاهها لمدينة نصر..

ص. أميرة: غريب، غريب، غريب، أغرب  
إنسان شفته في حياتي.. يا قليلة الأدب.. شكله مش  
كدة خالص طبعا..

"أميرة" تتحدث أثناء القيادة باستخدام الهاند فري

أميرة: لا يا حبيبتي عارفهم كويس.. المهم، بما  
إنك خلعتي بدري وأنا اللي اتدبست لآخر الحفلة،  
يبقى إنت اللي هتعملي المشوار ينبتوع الصبح.. لأ  
هاجي المكتب.. بس على حداثرات كدة.. أوكي  
باللا.. تصبحي على خير

- قطع -



## صالة منزل والدة أميرة

الأضواء مغلقة في الصالة، لكن التليفزيون مفتوح، "كريمة" أم "أميرة" تجلس على فوتيه وكأنها تغالب النعاس.. تنفتح باب الشقة وتدخل "أميرة"..  
 أميرة: إزيك يا ماما  
 كريمة (بتكهم): قولي صباح الخير يا ماما..  
 الساعة عدت واحدة، وأنا مقعدة نفسي بالعافية أستناكي  
 أميرة: طب ما دخلتيش تنامي ليه بس؟  
 كريمة (بغيط): أنا!! إنت هتفرسيني؟! عايزاني أنا! وانت برة البيت لحد الوقت، عادي كده يعني؟! ده يبقى اسمه إيه ده؟!  
 أميرة (محاولة السيطرة على نفسها): يبقى اسمه واحدة بتشتغل، وظروف الشغل أخرتها شوية..  
 الدنيا ماتهدتش..  
 كريمة (في تصعيد): ظروف الشغل؟! حفلات الفنادق بقت ظروف شغل؟!  
 أميرة (تكاد تنفجر): وبعدين إحنا اتكلمنا في الموضوع ده ميت مرة قبل كده و... (ثم تصمت فجأة وتأخذ نفسا عميقا) بصيأنا مش عايزة أتخانق.. تصبحي على خير..  
 تغادر "أميرة" الصالة وتتجه إلى غرفتها..  
 - قطع -



## غرفة اميرة في منزل والدتها

في غرفتها تبدأ "أميرة" في خلع زينته، وتتهيا لتغيير ملابسها، تفتح أمها باب الغرفة..

كريمة: يحيى سال عليكى..  
أميرة (بعدم اكترأث): بمناسبة إيه؟  
كريمة: اتصل بيكي كذا مرة وما ردنيش عليه..  
أميرة (وهي تواصل تغيير ملابسها): ومش هرد، وحكاية إننا نرجع لبعض دي ينساها.. (ثم تتوقف فجأة وكأنها انتبهت لشيء ما) واللا تكوني إنت اللي مدياله أمل إنني ممكن أوافق؟!  
كريمة: بيقول إنك مكلفة مقاول يوضبك شفتك، وغن فيه عمال شغالين فيها فعلا.. إنت هأجريها؟  
أميرة (متهربة): أرجوكي يا ماما أنا عايزة أنا عايزة أنام دلوقت.. الصبح نبقي نتكلم..  
كريمة (تجذب ذراع أميرة لتجبرها على النظر في عنبرها): لا..  
كريمة (بغضب): يبقى هتسيبيني وهتروحي تقعد فيها لوحده!!

"أميرة" لا ترد، وتحاول شغل نفسها بتغيير ملابسها..

كريمة (بتزايد غيظها): إنت عايزة سيرتك تبقى على كل لسان؟! الناس تقول عليكى إيه؟! أنا مش ممكن أسمحك ابدأ..  
أميرة (تقاطعها بلهجة حاسمة): ماما.. متهيألي أنا كبرت قوي على الحكاية دي.. وبعدين أنا لسه ما قررتش.. ولو قررت، كلامك ده مش هيمعني مالتنفيذ.. فياريت مناقشتنا تبقى بطريقة أهدى من كده، وفي وقت ثاني.. ممكن؟

"كريمة" تكتفي بتوجيه نظرة ساخطة قبل أن تخرج من الغرفة وتصفق باباها من خلفها..

أميرة (بعد لحظة تنظر فيها للباب تصرخ): وإنت من أهله..

- قطع -



## شارع جانبي في المنيل

تدخل سيارة "وليد" إلى الشارع، تركن أمام  
المنزل، يترجل منها "وليد" ويدخل إلى العمارة

- قطع -



## منزل خالد ووليد (صالة – غرفة خالد)

الصالة مظلمة، عدا نور بسيط قادم من الردهة  
المفضية للمطبخ، يفتح "وليد" باب الشقة ويدخل،  
يلقي مفاتيحه على طاولة صغيرة، يتجه نحو  
غرفة "خالد" .. الغرفة مظلمة، يضئ نورا خافتا  
ليرى "خالد" وقد نام متكورا على نفسه، ربما  
بسبب النسيم البارد القادم من النافذة المفتوحة..  
وفي لقطات متتالية بينها قطعات حادة، يقوم ب:  
- إغلاق النافذة.  
- يفرد الغطاء على "خالدط".  
- يضع الشبشب المنزلي بجوار السرير  
- يعيد تنظيم الأظرف ولأوراق المتناثرة على  
السرير والمكتب.  
- يضع الأدوية على الكومود بترتيب معين.  
في النهاية يلقي على خالد نظرة أخيرة ويغلق  
النور - قطع -



## غرفة أميرة

"أميرة" في السرير متخذة وضع النوم، لكنها قلقة.. تعبث بأصابعها لا إراديا في سلك الأباжورة الموضوعة على الكومود، تفتح عينيها.. تنقلب.. تنهض جالسة وتضيء الأباжورة، تتجه نحو التسريحة، تتأمل نفسها في المرآة، تركز على البقعة التي أصابتها الطيور في عنقها، والتي قام "خالد" بتنظيفها، تتحسس المكان بأصابعها وكأنها تستعيد الموقف.

- قطع -



## منزل خالد ووليد (غرفة وليد – الصالة)

وليد يرتدي ملابس كاجوال تختلف تماما عن  
ملابسه الكلاسيكية في الحفل، بنطول جينز،  
كوتش حديث، جاكيت جلدي أسود، يلتقط خوذة  
رياضية معلقة على شماعة.. يخرج من غرفته،  
إلى الصالة حيث يلتقط المفاتيح ويخرج، ويغلق  
الباب برفق.



## فوتومونتاج

مؤثرات صوتية وموسيقى مناسبة

- أ- "خالد" نائم بعمق والكاميرا تقترب من وجهه  
 ب "track in" هادىء.  
 ب- "وليد" يمتطي ظهر دراجة بخارية حديثة الطراز ويشغل محركها.  
 ج- "أميرة" تغلق الأباجورة وتتمدد بحثا عن النوم  
 د- "خالد" والكاميرا تقترب من وجهه أكثر.  
 ه- "وليد" يخرج بالدراجة البخارية من الجراج  
 و- Big Close على وجه "خالد".  
 ز- "وليد" و"خالد" في سن العشر سنوات يلعبان بمسدسات وهمية بيديها.  
 ح- "أميرة" تتقلب وتدفس رأسها تحت الوسادة.  
 ط- "وليد" يخرج بالدراجة إلى الطريق العمومي سريعا.  
 ي- Very Big Close على عين "خالد" تتحرك وهي مغلقة أثناء نومه.  
 ك- قدم "أميرة" بالحذاء المميزة وهي تضع ساقا فوق أخرى بالحفل.  
 ل- من وجهة نظر "خالد" لحظة دخوله الحفلة والأضواء مبهرة والوجوه متطلعة نحوه.  
 م- "وليد" في سن أصغر (25 سنة مثلا) يبكي بجوار جسد امرأة ميتة.  
 ن- "أميرة" واقفة مستسلمة ليده التي تنظف عنقها بمنديل مبلل.  
 ش- "أميرة" في غرفتها تغير وضع النوم وما زالت عينها مفتوحة.  
 ف- "وليد" ينطلق بالدراجة البخارية بسرعة عالية على الطريق الدائري.  
 ق- مثل "ي".  
 ر- "وليد" يبتعد بسرعه العاليه إلى عمق الكادر على الطريق السريع.  
 خ- مثل "ي".  
 س- "أميرة" جالسة في فراشها جلسة القرفصاء.  
 ذ- مثل "ي".  
 ع- "وليد" في أقصى عمق الكادر بدراجته البخارية.



## منزل أميرة الجديد

ظهور تدريجي.. الستائر مفتوحة، وضوء الشمس منعش، في الصالة حيث الأنثريه وطاولة طعام صغيرة يشير الأثاث المودرن بذوق سليم.. "أميرة" تبدو كمن يستعد للذهاب إلى العمل، تشرب مج نسكافيه وتأكل البسكويت.

جرس الباب

تتجه إلى الباب وتفتح لتجد البواب يناولها لفة جرائد ومجلات

أميرة: شكرا يا عم خميس.. مش هتخلصلي حكاية التليفون دي بقه؟  
خميس: مانا بلغت يا ست هانم وقالولي هيبعتوا فني يصلح..  
أميرة: عمرهم ما هيبعتو لوحدهم إنت تكون في النترال بكرة الساعة سبعة الصبح، وتستلم الفنيين أول ما يوصلوا.. أنا بيتي اتخرب موبايلات خميس: حاضر يا ست هانم..  
(نسمع صوت رنين موبايل من الداخل)  
أميرة (وهي تغلق الباب): ماشي يا عم خميس، شكرا..

تدخل وتفتح موبايلها وتتحدث وهي تنتظر في عناوين الجرائد بسرعة

أميرة: أيوة يا دينا.. لأ نازلة أهو.. بس مش هاجي عالمكتب.. لازم أعدي الأول على "ماجيكال".. أ، علشان "إنفينيتي".. أكيد مش هتأخر عن اتناشر..  
Ok.. ماما؟! مافيش جديد.. لأ عادي.. كانت عندي امبارح.. أ، لسة عندها أمل.. أما اشوفك بقى أبقي أحيلك.. باي..

توضب حاجياتها، تخرج من الشقة وتغلق الباب.

- قطع -







## غرفة خالد

"بان" بطيء يستعرض مجموعة الصور الفوتوغرافية المعلقة على أحد الجدران، والتي يظهر فيها "خالد" متدرجا في العمر، وتحت كل منها سنة التقاطها (1988-1991-1996.. وهكذا) هي صور حياتية عادية، يظهر فيها "خالد" بصحبة "وليد" أحيانا، وبصحبة آخرين أحيانا أخرى، وبمفرده أيضا.. صور في المنزل وفي الجامعة وفي أماكن عامة.. يتسع الكادر لنرى أن "خالد" يقف متأملا الصور، بمزيج من الدهشة والإنكار والحزن والذهول.. يدخل "وليد" إلى الغرفة ويرى وقفة "خالد" فيمط شفتيه أسفا.. كلاهما يرتدي ملابس الخروج..

وليد: جاهز

يشير "خالد" لإحدى الصور

خالد: ده إنت؟

وليد: آ.. (ثم وهو يجذبه من كتفه ليخرجا): ياللا علشان مانتأخرش

- قطع -



## داخل وخارج سيارة وليد/ أمام مقر شركة ماجيكال

"وليد" خلف عجلة القيادة، و"خالد" في المقعد المجاور.. السيارة تطوف الطرقات و"خالد" شارد في نظراته عبر النافذة.. يتأمل المارة والسيارات والشوارع.. ويبدو "وليد" مستاءا لحالته..

وليد: بص.. قعدتك مع د. عبد الحميد النهاردة هتفرق معاك كتير..

هيريحك والله..

ينظر "خالد" تجاهه مستفهما فيواصل..

ينعطف "وليد" بالسيارة في شارع جانبي، ويوقفها أمام مقر الشركة الهندسية "ماجيكال"

خالد: إحنا وصلنا؟

وليد: لأ.. إنت هتستنائي في العربية أقل من خمس دقائق.. هاطلع المكتب أبعت فاكس مهم جدا وانزلك على طول..  
خالد (مستفهما): فاكس؟!  
وليد (بعد لحظة تفكير): حاجة زي الجواب كدة.. خمس دقائق..

يترجل "وليد" من السيارة ويدخل المبنى.. بينما يبقى "خالد" في مقعده يتأمل الشارع.. على مقربة من سيارة "وليد" تتوقف سيارة "أميرة" وتترجل منها.. تتجه نحو المبنى بدورها عندما تلمح "خالد" جالسا في السيارة قبالتها.. تتحقق منه.. بينما هو يراها كمئة يبدو أنه لا يعرفها.. يتהלل وجهها وتلوح له.. فينظر خلفه كأنها تلوح لشخص آخر.. تصل إليه وتنقر بأصابعها على الزجاج المغلق.. يبدو "خالد" حائرا لا يعرف كيفية فتح النافذة.. يضغط عدة أزرار عشوائية فتعمل المساحات والتكييف، قبل أن يجد أزرار الزجاج فيفتحه..

أميرة: إيه الصدف السعيدة دي..

إزيك يا باشمهندس..

ثم وهي تمد يدها لمصافحته

يصافحها بوجوم ويبدو أنه لا يحمل أي فكرة عنها

خالد: أهلا..

أميرة (ضاحكة بارتباك): إنت مش فاكركني واللا إيه؟! أنا أميرة.. اتقابلنا في ريسبشن "إنفينيتي" الشهر اللي فات..

خالد: إ.. في الحقيقة أنا.. أنا أسف

كلامها بالنسبة له بلا معنى



أميرة غير مصدقة): معقول؟! مش فاكـر  
العصفور اللي....

خالد: أنا أسف بجد.. إحنا أكيد اتقابلنا فعلا..  
بس انا مش فاكـر أي حاجة.. أصل إ....

مقاطعها محاولا إعفاءها من الا استمرار

يقاطعه خروج "وليدط من المبنى، حيث يتجه  
نحوهم من فوره.. وقد أدرك من النظرة الأولى  
طبيعة ما يحدث.. يصافح "أميرة" بحرارة مبالغ  
فيها

وليد: أميرة.. إزيك..

أميرة: باشمهندس وليد

وليد: إنت جاية عندنا الشركة؟

أميرة: آ.. عندي Meeting مع د. جلال..

(ثم وهي تومىء نحو خالد): هو الباشمهندس  
خالد...

يقاطعها مغطيا على الموضوع، ويتحدث أثناء  
توجهه نحو باب السائق ويفتحه.. يداري ارتبـاكه  
بالحديث السريع والصوت العالي والضحك  
المفتعل..

وليد: د. جلال فوق على فكرة.. يعني أنا حظي  
وحش جدا فعلا.. مش معقول اليوم اللي  
تشرفينا فيه أكون مضطر أمشي.. لكن أكيد..  
أكيد.. هنتقابل تاني.. Ok.. باي..

يغلق السيارة، وينطلق بها من فوره.. أميرة تتابع  
السيارة المبتعدة بعدم فهم وضيق

- قطع -







غرفة د. عبد الحميد في  
المستشفى- أروقة المستشفى-  
غرفة مريض- مصعد-  
(المشهد به العديد من اللقطات  
المتداخلة كفلاش باك)

د. "عبد الحميد" يجلس خلف مكتبه، هو في  
الستين أو أكثر بقليل، شعره أبيض خفيف، وقور  
هاديء الطبع، ملامحه تشي بالطيبة والثقة..  
يتأمل بين يديه صورة لأشعة مقطعية على  
المخ.. بينما يجلس أمامه كل من "خالد" و  
"وليد"..  
وليد: إحنا عملنا الأشعة من ثلاث نيام..  
عبد الحميد: أيوة أيوة.. يعني بعد يومين تقريبا من  
آخر Loss  
وليد: بالضبط..

عبد الحميد: خالد.. إنت أكيد فاكرنى كويس.. بس  
ما كانش شعري أبيض كده..

خالد: أيوة.. صح..  
عبد الحميد: قوللي لما صحيت بالنوم من خمس  
نيام.. إيه أول حاجة إفتكرتها..

يتوجه باهتمامه لـ "خالد" كليا

متأملا ملامحه

الكاميرا "track in" هادىء على وجه "خالد"

- فلاش ساطع -



الصوت هنا يبدو غائما مثل الصورة ولا  
تتضح معالمه إلا مع جملة الطبيب

في حجرة مريض بمستشفى، الجو غائم،  
المريض صبي عمره حوالي 15 سنة، ممدد في  
فراشه بينما تقوم ممرضة بحلق شعره "زيرو"..  
وعلى طرف الفراش سيدة محجبة تتلو من قرآن  
مفتوح وهي تتمايل في حركة رتيبة، وعلى  
مقربة، صبي أصغر سنا يلعب في جيم  
إلكتروني صغير ببعض الحماس..

يدخل د. عبد الحميد من باب الغرفة وهو يبدو  
شابا لم يتجاوز الأربعين.. يتجه بابتسامة  
عريضة نحو المريض

د. عبد الحميد (الشاب): ياللا بينا يا بطل..

- فلاش ساطع -

عودة إلى وضع بداية المشهد "خالد يستمع  
بتركيز..

د. عبد الحميد: بعدها خذناك أوضة  
العمليات.. وبنجناك.. وشيلنا من راسك ورم  
وزنه حوالي كيلو وربع.. لسة محتفظين بيه  
على فكرة لو عايز تشوفه.. الورم ده كان  
تاعبك قوي.. صداع مستمر، زنة في الودان،  
زغللة في العينين.. وقبل العملية بعشر تيام،  
أغمي عليك في طابور المدرسة.

- فلاش ساطع -

من وجهة نظر صبي يسقط على الأرض، وعينه  
معلقة بفتاة صغيرة في الطابور تنظر نحوه، ويده  
متشبثة بمنديل ورقي، ثم تغمض العين/  
الكامير اليسود الظلام

V.O (د. عبد الحميد): فاكر يا خالد؟

- فلاش ساطع -

"خالد" في وضعية بداية المشهد

"خالد" كمن يحاول التركيز، فيسعه الرجل

على "خالد"، حيث نرى شبح ابتسامة

خالد: أيوة فاكر..

د. عبد الحميد: طب فاكر أنا قتلتك إيه قبل  
العملية بيوم؟

إنت ووليد كنتو بتلعبو أتاري..

خالد: أيوة.. كنا بنلعب ملاكمة..



- فلاش ساطع -

الرؤية ضبابية غائمة.. غرفة في مستشفى،  
"خالد" و "وليد" صبيين صغيرين، يلعبان لعبة  
الملاكمة البدائية في الأتاري.. يدخل د. عبد  
الحميد (شابا) إلى الغرفة يربت على كتف  
"خالد"

د. عبد الحميد (الشاب): خلود.. تعالي عايز  
أقولك حاجة..

يحدث "مورف"، لنرى أن "عبد الحميد" قد  
انفرد بالصبي "خالد" في غرفة أخرى ويحدثه  
بهذوء

د. عبد الحميد (الشاب): العملية اللي  
هنعملها لك بكرة، هتخلي الصداع اللي بيجيك  
يروح خالص.. دي حاجة كويسة مش كدة؟  
خالد (الصبي): أيوة..  
د. عبد الحميد (الشاب): يمكن لما تكبر، تلاقي  
نفسك بتتنسى حاجات مش المفروض  
تنساها.. ماتبقاش تتضليق..

مزج على "خالد" في وضعية بداية المشهد وهو  
يردد بشفتيه ما نسمعه بصوت د. عبد الحميد

V. O (د. عبد الحميد): فيه ناس كثير بيبقى  
نفسها تنسى وما بتعرفش.. يعني إنت هيبقى  
عندك ميزة مش موجودة عند كل الناس

مزج على "خالد" الصبي

خالد الصبي: يعني هانسي إيه؟  
د. عبد الحميد (الشاب): إما تكبر هنشوف..  
المهم مش عايزك تنسى قعدتنا دي، مش  
عايزك تنسى كلامي ده.. اتفقنا؟

مزج على "خالد" وهو في وضعية بداية المشهد  
وهو يردد بشفتيه ما نسمعه بصوت "خالد"  
الصبي

V.O (خالد الصبي): اتفقنا.

وهو يشرح على صورة الأشعة بينما "خالد"  
يستمع بتركيز

د. عبد الحميد: الورم اللي شيلناه كان هنا..  
كان أخذ مساحة كبيرة من الفص الأمامي  
للمخ.. وده المكان اللي بتتركز فيه الخلايا  
العصبية المسنولة عن الذاكرة.. فريق  
الجراحين عمل العملية كان حريص جدا إنه  
يقلل حجم التلف اللي ممكن يحصل للجزء  
ده.. لكن الحرص مش معناه إن ما فيش تلف..  
كنا متأكدين إن التلف هيحصل غصب عنا،  
وإن آثاره هتظهر عليك لما تكبر، في صورة  
فقدان متكرر للذاكرة.

بشيء من الإنكار وعدم التصديق والارتباك

خالد: لكن انا فاكّر حاجات كثير.. فاكّر كل  
حاجة.. فاكّر لما ماما جابتلي باتيناج وكان



ضيق.. وفاكر لما اتخاقت مع وليد علشان  
قطع لي لوحة المدرسة.. وفاكر لما بابا مات..  
و..

يمنعه من الإسترسال بينما الكاميرا تركز على  
وجه "خالد" الذي يعاود الإصغاء مستسلما

د. عبد الحميد: كل الحاجات اللي فاكرها  
كويس حصلت قبل العملية.. الجزء ده من  
ذاكرتك ثابت ومش ممكن يروح، الحالة اللي  
عندك بتخليك تفقد الذاكرة في الي حصل بعد  
العملية

فلاشات متتالية لمجموعة الصور الفوتوغرافية  
في غرفة "خالد" والتي يظهر في كل مكان منها  
بعمر مختلف وتحت كل منها السنة

V.O (د. عبد الحميد): يعني وقت العملية  
ذاكرتك بقت زي شريط الكاسيت، له مدة  
بيخلص بعدها، ولما يخلص لازم يتمسح  
علشان تسجل عليه من اول وجديد  
خالد (بيأس): يعني ما فيش حل..  
د. عبد الحميد: لو ما كنش فيه حل، ما كنتش  
تبقى قدامي دلوقت علشان أقولك الكلام ده  
للمرة العاشرة (ثم ضاحكا): بطرق مختلفة  
طبعا في العشر مرات..

V.O (د. عبد الحميد): فات 24 سنة يا خالد  
من يوم ما عملت العملية..

مزج على "خالد" و "وليد" يصافحان "عبد  
الحميد"

وانت دلوقت مهندس ناجح ومحترم

مزج على "خالد" و "وليد" يسير في ردهات  
المستشفى ويقفان أمام باب المصعد

وعايش وسط الناس بشكل طبيعي إلى حد  
كبير..

مزج داخل المصعد، حيث يقف "خالد" و "وليد"  
في ركنيه وبينهما أناس كثيرون

V.O (خالد): طب ازاي أنا بقيت كدة؟

- قطع Big Close على وجه "خالد"

V.O (د. عبد الحميد): لأنك عايز تبقى كدة..  
ضياح أجزاء من ماضيك مش معناه ضياح  
مستقبلك.. المستقبل ده حاجة إنت اللي  
بتصنعها بإيدك وبعقلك.. دلوقت مش زمان

- مزج على باب المصعد في الدور الأرضي  
ينفتح ويخرج منه "وليد" و "خالد" وسط الناس  
ويتجهون إلى خارج المبنى

- قطع -



## سيارة وليد

"وليد" يركب ويغلق الباب.. "خالد" في المقعد  
المجاور ينظر نحوه بدهشة.. يتبادلان النظرات  
الصامتة ثم..

خالد: أنا مش فاهم حاجة

"وليد" يشغل المحرك وينطلق

- قطع -



## كافيه

"أميرة" مع "دينا" على أحد الطاولات.. "دينا" أمامها طبق سلطة ضخمة تأكل منه أثناء الحديث، بينما أمام "أميرة" مج نسكافيه شارف على الانتهاء، وأصابعها تقطع ورقة إلى قطع صغيرة بشكل آلي أثناء الحوار

دينا: أكيد بيستعبط  
أميرة: لا يا دينا.. شكله فعلا ما كانش عارفني..  
دينا (باستنكار): إزاي يعني؟!  
أميرة (بغضب): ما هو ده اللي مجنني.. يا إما ما كانش في وعيه لما اتكلمنا يوم الحفلة.. يا إما ما كانش في وعيه إنهارد..  
دينا (بتكهم): يعني إيه ضارب حاجة مثلا؟!  
ماكانش في وعيه؟!  
أميرة: مش عارفة..

بعد لحظة صمت تمضغ فيها جيدا وهي تتأمل صديقتها

دينا: إنت مقفلة دماغك في الحكاية دي كدة ليه؟ إيه؟!

وهي تزيد من إيقاع تقطيع الورق ويبدو عليها الحيرة..

أميرة: أصله.. فيه حاجة كده.. مش قادرة أفهمها  
دينا (بحدة): أفهمك.. إنت ببساطة كرامتك مش سامحالك، إن واحد يعمل نفسه مش عارفك.

بغضب تلقي عليها بعض القصاصات الصغيرة وتقلد طريقة كلامها بتهكم

أميرة: إنت ببساطة بيبيبا بيبيبا..  
دينا (باصرار): هي دي الحقيقة..  
أميرة: ولو قللتك إني ما بطلتش تفكير فيه من ما قابلته في الحفلة؟

وهي تخرج القصاصات بأطراف أصابعها أصابعها من طبق السلطة

دينا: هاقولك كدابة.. لأنك ما جبتيش سيرته تاني غير النهارده.. لما قلبك..

تواصل "دينا" الأكل، بينما تفكر "أميرة" للحظة وهي تقبض بقوة على باقي أمامها من قصاصات.. ثم..

أميرة: حتى لو اللي بتقوليه ده صح أنا لازم أعرف هو عمل معايا كده ليه.. وهاعرف..  
دينا: أكيد طبعاً هتعرفي.. مانتني لما بتريسي



في حاجة بتبقى هي الحاجة..

يدخل "أشرف" - شاب وسيم في الثلاثين-  
وينضم إليهما

أشرف (لدينا): دندن معلى اتأخرت  
أميرة: أتاريكي بتاكلي على مهلك..  
أشرف: إزيك يا أميرة  
أميرة: أهلا يا أشرف.. (ثم وهي تنهض)  
هاسبق انا عالشغل، وياريت ماتغرقوش في  
الرومانسية قوي عشان ماتتأخريش ها..

يضحكان.. تنصرف "أميرة"

- قطع -

ليل/ د

م/33

## غرفة خالد

"خالد" على السرير، ينظر بتمعن في ألبوم  
صور عائلية، ومن حوله أظرف مفتوحة وصور  
متناثرة.. نحن لا نرى وجهه المنكفيء على  
الألبوم.. يدخل وليد، يلوح الحالة، يبدو عليه  
التوجس..

وليد: خدت الدوا؟

"خالد" يرفع رأسه لنرى أن دمعة عرفت  
طريقها إلى خده

خالد: هي ماما ماتت إزاي؟

يتخذ مكانا إلى جواره ويجلس.. وهو يبحث عن  
الكلمات المناسبة

وليد: ماتت.. ماتت عادي.. كانت عيانة  
قوي.. كان عندها انسداد في الشرايين،  
ومشاكل في الضغط، قعدت فترة تعبانة و..  
وماتت بسكتة قلبية.

خالد: وأنا كنت فين ساعتها؟

وليد: إحنا الاتنين كنا في الكلية.. خالتي اسعاد  
كانت فاعدة معاها.. ولما رجعنا عرفنا اللي  
حصل..

خالد: وأنا عملت إيه؟

وليد: عيطت.. وبعدين قعدت هنا، وفضلت  
أسبوع تقريبا ما تنزلش مالىبيت..

خالد: إزاي ما فتكرش يوم ري ده؟

وكأنه يحدث نفسه بمزيج من الألم والغضب  
والحسرة



"وليد" يداري عينيه سريعا كأنه يزيح دمعة ماء،  
ويغير نبرته وهو يلتقط كتابا من الكتب عليه  
"الرياضات للصف الثاني الثانوي"

وليد: ياللا نشغل شوية

- قطع -

نهار / د

34/م

## صاله الاستقبال بشركة "ماجيكال" الهندسية

موظفة الإستقبال في موقعها خلف كاؤنتر خشبي  
كبير.. تدخل "أميرة" من باب الشركة، وتحيتها  
بابتسامة كبيرة

أميرة: صباح الخير..  
الموظفة (بترحاب): أهلا أميرة.. هو د. جلال  
لسة ما جاش.. فيه ميعاد؟  
أميرة: إ.. لأ.. انا جاية أقابل المهندس خالد  
الموظفة (باستغراب): ده عندنا هنا في  
الشركة؟  
أميرة (تندesh لدeshتها): أيوة.. المعماري..  
الموظفة (تتدارك): آ.. خالد الشهاوي.. أخو  
الباشمهندس وليد  
أميرة: أيوة..  
الموظفة: بس ده مابيجيش هنا.. مالوش  
مكتب يعني.. هو بيتعامل معنا As a free lancer  
أميرة: ممم.. طب إ.. طب تليفونه.. أصل فيه  
حاجة عايزه أكلمه عنها في مشروع  
"إنفينيتي"، لكن مش مستاهلة أبعت  
Official mail وأحدد Meeting وكده..  
الموظفة: هو الحقيقة مش سايب تليفونات  
هنا..

أميرة (باستغراب): ولا نمرة البيت؟  
الموظفة: ل للأسف.. (ثم تخرج أميرة من  
حيرتها) بس زمان المهندس وليد على  
وصول.. ممكن تستتيه..  
أميرة (متفهمة): Ok



تجلس "أميرة" على أحد مقاعد الإستقبال، تفتح  
سوستة حقيبة يدها وتغلقها بحركة رتيبة سريعة..  
ثم يدخل "كريم" من الباب ومن فوره يتجه نحو  
موظفة الإستقبال غير منتبه لوجود "أميرة"

كريم: فطرتي؟  
الموظفة (ضاحكة): صباح النور  
كريم: أصلي ما متعشتش إمبراح وميت  
مالجوع.. بكر هنا؟

وهي ترفع سماعة الهاتف

الموظفة: آ.. أبعثله يجيبك إيه؟  
كريم: فول بقه وطعمية وبتجان.. أي زيوت  
ثقيلة خلىنا نفوق..

"أميرة" تنهض وتتجه نحوه  
وهو يصافحها متهللا

أميرة: إ.. باشمهندس كريم.. صح؟  
كريم: أكبر صح.. أنا كده شبع.. الأستاذة  
أميرة..  
أميرة: تمام  
كريم: شوفي ماتقابلناش إلا مرة واحدة..  
(مشيرا لرأسه) بس فيه هنا كمبيوتر..  
أومريني.. أي خدمة..  
أميرة: فيه حاجة كدة عايزة أحلها في  
Design "إنفينيتي"، ومضطرة أمشي  
بسرعة.. فيا ريت تديني نمرة بيت المهندس  
خالد الشهاوي..  
كريم (بتذآكي): ممم خالد وللا وليد؟  
أميرة (تجاريه): هم مش الاتنين في بيت  
واحد؟  
كريم: آ صحيح.. في بيت واحد.. 5350414  
تاخدي العنوان؟

وهي تسجل الرقم على الموبايل

أميرة: مش عايزة أتقل عليك بس..  
كريم: ما تقوليش كده.. ده وليد حبيبي.. 16  
شارع اللوا ماروق الشهال، المنيل، الدور  
الثاني..

وهي تنصرف

أميرة: حقيقي متشكرة جدا يا كريم.. Have  
a nice day  
كريم: أي خدمة..

ثم للموظفة بعد إنصراف "أميرة"

قالت إيه بالإنجليزي؟

- قطع -











المناديل الورقية ويجفف يديه وعرقه.. يلهث  
محاو لا تنظيم أنفاسه.. ينظر نحو التليفون.. فوقه  
مباشرة رقم موبايل "وليد" مكتوب في ورقة  
ملاحظات ملصوقة على الحائط.. يرفع السماعه  
ويطلب الرقم.. فيسمع الرسالة المسجلة

الصوت الآلي: هذا الهاتف ربما يكون مغلقا.. من  
فضلك...

يغلق السماعه.. تدور عيناه ذاهلتين على أرفف  
المكتبة.. ويتوقف عند درفة "الشركة".. يفتحها  
ويخرج الأظرف بعشوائية..  
في الصالة تتأمل "أميرة" تفاصيل المكان،  
صورة "خالد" و "وليد" صغارا.. وصورة  
زفاف والديهما، وصورة للوالد بمفرده.. يخرج  
عليها "خالد" من غرفته ومعه مظروف كبير،  
يقدمه نحوها، ثم لا يدري نا المفروض أن يحدث

خالد: ده.. "إنفينيتي" .. إ.. ممم..

أميرة: إنت قاعد لوحك صح؟

خالد (بارتياح): أيوة.. إ.. لوحدي..

أميرة: يبقى الأحسن ننزل نتكلم في أي مكان

خالد (مفروعا): ننزل؟! آ.. ننزل.. طب إ.. طب

أغير هدومي.. ها..

لا ينتظر ردها ويندفع باتجاه الغرفة ثانية..  
يحاول الاتصال ثانية ب "وليد" وتفهم أن الهاتف  
ما زال مغلقا.. يفتح مظروف العاملين بالشركة  
وينظر في أوراقه.. يفتح الدولاب ويخرج  
الملابس بعشوائية.. يتجه نحو الهاتف ثانية  
(يمكن هنا استخدام قطعات حادة) هي في  
الصالة.. تنظر في ساعتها.. ثم تتجه نحو باب  
الغرفة.. تطرق برفق

أميرة: باشمهندس خالد..

يفتح الباب فورا وهو ما زال بنفس ملابس  
البيت..

خالد: أنا جاهز..

تبتسم باستغراب فيتدارك

إ.. قصدي هاجهز..

- قطع -



## سيارة أميرة

"أميرة" خلف عجلة القيادة، و "خالد" بالمقعد المجاور، يحتضن ظرف المشروع، يتبادلان النظرات من طرف خفي، قبل أن تكسر هي حاجز الصمت

أميرة: تحب نقعد فين؟  
خالد: ما عرفش!.. أي مكان.. (ثم بعد لحظة) إحنا هنقعد كثير؟  
أميرة: وراك مواعيد؟  
خالد: يعني.. أفضل ماتأخرش..  
أميرة: مش هنتأخر..

يسود الصمت من جديد.. تتمعن في وجهه الجامد الخالي من الملامح.. ثم تفاجئه

أميرة: إنت فعلا ما فكترتنيش لما شفتني أول إمبارح؟  
خالد (متداركا): لأ افكركك.. يعني!... قعدت افكر بعد ما سبناكي أنا ووليد.. و.. وافكركت.. أصل بصي.. ساعات الحاجات عندي بتخش في بعضها كده و.. ما ببقاش مركز يعني..

أميرة: ممم..  
خالد: أنا أسف قوي لو كان الموقف ده ضايقك..  
أميرة: لأ خالص..

تهز رأسها مصطنعة التفهم

بعد فترة صمت

خالد: على فكرة، دي مشكلة عندي.. يعني دايمًا إ.. بنسى الأسمامي والوشوش..  
أميرة: عادي.. أنا أعرف ناس كده فعلا.. حاجة محرجة أكيد..  
خالد: أنا أسف للمرة الثانية..  
أميرة: لأ، محرجة ليك إنت..  
خالد (متداركا): إ... أه.. طبعًا، جدا.. محرجة جدا..  
أميرة: Lipstick كويس؟

بعد فترة صمت أخرى

خالد: ليب.. لبيستيك.. ده مكان نقعد فيه يعني..  
أميرة: أه..  
خالد: كويس

لا يستوعب الكلمة سريعًا

- قطع -



## صالة المكاتب بشركة "ماجيكال" + منزل خالد (الصالة - غرفة نوم خالد)

"كريم" وآخرون يعملون على مكاتبهم، عندما يدخل "وليد"، هو يضع موبايله على أذنه، ثم يبدو عليه الاستياء ويصق عليه بصقة هوائية.. "كريم" ينتبه لقدمه

كريم: الله.. إنت اتأخرت ليه يا معلم؟

ملوحا بجهازه المحمول

وليد: العدة الزفت دي.. رححت التوكيل اشتغلت هناك زي الجن، اول ما خرجت من عندهم هنجت تاني..

كريم (مستنجا): آه.. علشان كده كانت عايزة تليفون البيت بقة..

وليد: هي مين دي؟

كريم (بصياغة ساذجة): عموما أنا ظبطتك..

وادتها العنوان كمان، يعني توقع زيارة قريبا..

وليد: مين دي يا بني آدم؟!

كريم: أميرة قنديل.. أحلى ماركتير في الجمهورية؟ جت سألت عليك الصبح وخذت نمرة تليفون البيت والعنوان..

باستغراب

وليد: أميرة مين؟!... أميرة.. سألت علي أنا؟

كريم: هي طبعا حبت تموه علي في الأول،

وعملت إنها قال إيه بتسأل عن أخوك علشان

مشكلة في ال Design.. بس على مين؟! أنا هرشتها..

"وليد" يستجمع ما قاله "كريم" بتركيز ثم يندفع باتجاه الهاتف الأرضي على مكتبه ويطلب رقما..

نسمع من السماعه صوت جرس..

- قطع في صالة المنزل نسمع صوت جرس الهاتف..

الجرس مستمر

- قطع على الهاتف في غرفة "خالد" وعلى

الشاشة مكتوب Waleed Office

- قطع على "وليد" يضع سماعة الهاتف ويبدو عليه الفزع

مستمر



ينهض ويهرول إلى الخارج و "كريم" في إثره ولید: یا نهار أسود..

كريم: في إيه؟

- قطع -



## كافيه Lipstick (داخل و خارج)

يخطو "خالد" خلف "أميرة" إلى الكافيه، يتأمل المكان، بينما تنتقي هي طاولة وتجلس في المجلس الخارجي، ويجلس أمامها..

خالد: إ.. مكان حلو فعلا..  
أميرة: أنا بحب قوي الأماكن اللي كدة.. أبقى شايف الشارع والناس اللي فيه، وفي نفس الوقت ماحدش مالشارع يشوفني..

ثم مستوقفة الجرسون

لو سمحت..

ثم ل "خالد"

تشيش؟

خالد: إ...

أميرة: واضح إنه لأ..

هاتلي تفاح بحريني ومانجة فريش..  
(ثم لخالد): تشرب إيه؟  
خالد: شاي..

ثم للجرسون

ينصرف الجرسون، فينهض "خالد" تاركاً مظروف العمل على مقعده

خالد: معلىش.. إ.. عايز أدخل التواليت  
أميرة: التواليت إ..

يتحرك بمجرد انتهاء كلمته ولا يسمعها، ويتجه بألية إلى داخل الكافيه وكأنه يعرف تماماً أين الحمام.. تتابعه ببصرها في استغراب، وتقف لتراه بالداخل من خلال النافذة الكبيرة وهو يمر بالمنحنيات المؤدية للحمام بثقة

- قطع من وجهة نظر "خالد" وهو متجه نحو الحمام.. يبدو كأن ما يراه من أشياء يحمل صورة وزدوجة، وعندما تحين منه التفاتة إلى المرأة التي تغطي حائط الردهة، يرى نفسه في سن أضغر (بشارب مثلاً)

- قطع بداخل حمام يغمر وجهه الماء وينظر لنفسه في المرأة للحظة قبل أن يخاطب نفسه بصوت عال

خالد: إنت مهندس معماري.. شغلك جامد جدا..  
(ثم وهو يشير بيده إلى الخارج) ودي واحدة ما بتفهمش في الهندسة.. مش هيحصل حاجة..  
ماشى؟.. مش هيحصل حاجة



- قطع ل "خالد" يخرج من داخل الكافيه، ومن  
وجهة نظره يرى "أميرة" تدخن الشيعة وتقلب  
في أوراق أخرجتها من ظرف المشروع.. يتجمد  
للحظة.. ثم يأخذ نفسا عميقا ويتجه نحوها..

عندما تلاحظ رجوعه

أميرة: معلش أنا سمحت لنفسى أبص على أصول  
المشروع.. اختصارا للوقت يعني..

أميرة: واضح إنك جربت كثير، قبل ما توصل  
للشكل النهائي  
خالد: طبعا

وهي تتأمل في الأوراق وتنفت نفسا من الشيعة

ثم ساعيا لتغيير الموضوع

إنك بتدخني شيعة من زمان؟  
أميرة: لأ، من سنة تقريبا.. (ثم مبتسمة بخجل)  
شيشت عشان أبطل سجاير.. الدخان مضايك؟  
خالد: لا بالعكس.. ريحته حلوة..

"أميرة" تلملم أوراق المشروع وتضع الظرف  
على الطاولة فتلاحظ اهتزازها، فتنتظر إلى  
أرجل الطاولة لتعرف أيها غير مستقر على  
الأرض.. هي تفعل ذلك أثناء الكلام، فلا تلاحظ  
ملاحم "خالد" الذي يبدو غير فاهم لما تقوله.. ثم  
تفتح حقيبتها وتخرج علبة لبان تشكس وتفرغها  
من آخر حبتي لبان وتطويها أربع طويات  
وتدفعها أسفل رجل الطاولة غير المستقرة.. كل  
هذا وهي تتحدث

أميرة: أنا عرفت إنك بتشتغل مع ماجيكال As a  
free lancer  
خالد: آ.. فعلا..  
أميرة: على كدة بقى بتعمل شغل لشركات ثانية  
غير ماجيكال..  
خالد: لأ بتشتغل مع وليد بس..

الآن تنظر إليه مستفهمة

خالد (موضحا): وليد أخويا..  
أميرة: ممكن أسألك سؤال شخصي شوية؟

يتنفس الصعداء لابتعادها عن أسئلة العمل..

خالد: يا ريت.. إ.. إ.. أسألي..  
أميرة: هو سؤال بايخ.. بس أنا مستغربة من

ارتباطك الشديد قوي بوليد أخوك.. مع إن متهياي  
إنك أكبر منه، صح؟  
خالد: آ.. أكبر بسنتين

ثم متكنا على الطاولة بيديه محاولا تغيير  
الموضوع بالإشارة لمعالجتها الطاولة

خالد: حلوة الحركة دي  
أميرة (ضاحكة): الجيش قال التصرف مش كده؟  
شكلك ما دخلتش جيش..



تتم عنه نظرة استغراب تلاحظها يضحك ضحكة  
بلا معنى، ويحاول تحويل الحديث مرة أخرى

خالد: هي هي.. وليد بيخرج كثير، وبيفهم في  
حاجات كثير.. وفاهمني كويس.. هو عارف  
مصلحتي فين، وانا باثق فيه.. إيه الغريب في كده؟

يصل الجرسون ليضع العصير والشاي

أميرة: عندك حق.. المفروض اعتماد الإخوات  
على بعضهم ما يبقاش حاجة غريبة..

هنا يستغل الفرصة لنقل مجرى الحديث

خالد: إنت ليكي إخوات؟

بعد أن تنفث نفسا عميقا من الشيشة

أميرة: ثلاثة..

ثم للجرسون

لو سمحت.. غير حجر هنا..

- قطع -



## منزل خالد (الصالة + غرفة خالد)

وليد (ينادي): خالد.. خالد..

يفتح "وليد" باب المنزل ويندفع للداخل..

يلقي نظرة سريعة على الصالة.. ثم يدخل غرفة  
"خالد".. يروعه منظر القوضى والأظرف  
المبعثرة والملابس والدرف المفتوحة.. ينظر في  
ذاكرة الهاتف ليعرف أن "خالد" اتصل بمحموله  
أكثر من مرة  
يعاود الإندفاع إلى خارج البيت

- قطع -



## أمام منزل خالد ووليد

"وليد" يخرج من المبنى ويقف حائرا لا يعرف  
أي اتجاه يسلك

- قطع -



## الجلسة الخارجية في Lipsthck

كوب شاي "خالد" أصبح فارغا تقريبا، كما أن  
كأس العصير شارف على الانتهاء أمام  
"أميرة"، التي تواصل حكاية تحكيها وهي تيرم  
لي الشمس حول زواجها

**أميرة:** أظرف حاجة بقه، أخويا اللي في ألمانيا ده  
آخر مرة شفته فيها، كان نازل مصر مخصوص  
عشان يقنع جوزي إن طلاقنا المفروض مايأثرش  
على شغلهم مع بعض.. أصل يحيى كان بيظبطه  
في تخليص حاجات في الجمارك.. شفته صدفة  
عنده في القسم وأنا رايحة أديله التنازل عن  
المؤخر..

جرس موبايل "أميرة" يرن، تلتقطه وتنظر  
للشاشة أثناء كلامها وتضعه بعد أن تضغط زر  
الصمت دون رد

**خالد (مشيرا للموبايل):** مش هتردي؟  
**أميرة:** نمرة ماعرفهاش.. المهم إنه اتفاجيء  
بوجودي، عمل نفسه هيتجنن على مصلحتي،  
ومستقبلي اللي هيضرب بسبب الطلاق..  
حاجة تغيظ مش كدة؟

"أميرة" تستمع إلى كلامه وهي ترتشف آخر  
رشفة من عصيرها، ثم تسحب الشاليموه،  
وتتنظفه بمنديل

**خالد:** هي تغيظ لأنك لسه فاكراها.. ممكن تفتكري  
حاجات تانية، حلوة وتضحك.. لعبة كنتو بتلعبوها  
مع بعض وانتو صغيرين، فسحة حلوة عملتو فيها  
حاجة تكسف وخبيتو على بابا وماما.. سر هاييف  
مايعرفوش حد غيركو.. ولسة سر لغاية النهارده..

تبدو شاردة فيما يقول، أصابعها تعمل آليا على  
الشاليموه فتثنيه وتعهده، يرسم شبح ابتسامة على  
شفتيها، وبعد لحظة صمت تتحدث..

**أميرة:** بابا كان صعب شوية، ولما كنا بنصيف  
في العجمي ماكناش بيخلي أختي تبعد عن حدود  
الشاليه.. أنا كنت عيلة، تلاتشر سنة.. عشان كده  
كنت المرسال بينها وبين الواد اللي بتشاورله من  
بعيد.. ودبت دباديب، وجبت شرايط كاسيت،  
وجوابات وكروت رايحة جاية.. ولما اتخطبو بعد  
سنتين كنت فرحانة قوي..

وبعد لحظة صمت أخرى، تتغير ملامح "أميرة"  
ويختفي شبح الابتسامة وتسيطر الحدة على  
صوتها



أول خناقة بينهم بعد الخطوبة كانت بسببي، عشان  
ظبطته قاعد معايا بيسألني عاملة إيه في  
المدرسة.. وفي آخر أجازة نزلوها الصيف اللي  
فات اتخانقو بسببي برضه.. كان بيسألني عاملة  
إيه في الشغل..

جرس الموبايل يعلو من جديد

أميرة: يوه.. طب أهو..  
(ثم لخالد) اللي بتقوله ده تقريبا مستحيل.. محتاجة  
أنسف عشر سنين على الأقل عشان ألاقي  
الحاجات الحلوة اللي بتقول عليها.. إنت عندك كام  
سنة؟

خالد: ثمانية وتلاتين  
أميرة (بدهشة): ياه.. كبير.. شكلك مايبانش عليه  
خالص..  
خالد (مبتسما): أنا بس مش عاوز وليد يقلق..  
أصله ما يعرفش إني نازل و..  
أميرة (تقاطعها ضاحكة): ثمانية وتلاتين سنة  
متأكد؟!

ممكن نتصل بيه من تليفوني.. كام نمرة؟  
خالد (بخجل): إ.. ممم.. مانا مش حافظها  
أميرة: الشيك لو سمحت.

"أميرة" تلتقط الموبايل وتنظر للشاشة ثم تغلقه

بيتسم لدعابتها فتلتقط موبايلها

"أميرة" تمط شفتيها في يأس ساخر.. ثم تنادي  
الجرسون

- قطع -



## أحد كبائن ميناتل

صوت جرس من السماعة يصل إلى صفارة  
النهاية

"وليد" في الكابينة يبدو عليه الضيق والسماعة  
على أذنه

"وليد" يخطب السماعة في جدار الكابينة بغضب،  
ثم يتصل بنمرة مكتوبة في ورقة، وبعد لحظة

وليد: أيوه.. الأستاذة أميرة وصلت لو سمحتي؟ انا  
وليد الشهاوي اللي اتصلت من شوية.. طب هي  
المفروض بتيجي عالساعة كام؟ (صارخا) يعني  
إيه مالهاش مواعيد؟! (ثم مهدئا نفسه) طيب  
طيب.. شكرا

يضع السماعة مكانها بعنف.. يزفر زفرة عميقة،  
ثم يرفعها مجددا ويطلب رقما، وبعد لحظة

وليد: كريم أنا وليد.. خالد ماجالكوش الشركة؟  
(ثم بغضب) أmaal راحو فين يعني؟!

- قطع -



## سيارة أميرة - أمام منزل خالد ووليد

أميرة: ماكملناش ساعتين

السيارة بها "أميرة" و "خالد" وتتوقف أمام  
مدخل العمارة

"أميرة" تفتح حقيبتها وتخرج كارت، وعلى  
ظهره تكتب رقما

أميرة: دي تليفوناتي.. ودي نمرة البيت..  
(وهي تناوله الكارت) إحنا هنتكلم ثاني صح؟  
خالد: أ طبعاً..  
أميرة (بخجل): إنت أكيد دلوقت بتقول في بالك  
إيه الرغبة اللي مش عايزة تخلص كلام دي..  
خالد (بصدق): أبدأ.. أنا.. بحب أسمع..  
أميرة: إنت بتعرف تسمع.. خالد.. (ثم مستدركة)  
أنا ممكن أقولك خالد مش كده؟  
خالد (مبتسماً): أكيد..  
أميرة: يا ريت فعلاً نتكلم ثاني  
خالد (يطمننها): هنتكلم ثاني..

بارتباك يمد يده لمصافحتها

خالد: إ.. مم.. مع السلامة..  
أميرة (تصافحه): باي..

أميرة: آ.. Sorry..

خالد: مع السلامة..  
أميرة: باي..

أميرة: استنى..

المشروع

خالد: آ.. شكراً.. باي  
أميرة (ضاحكة): مع السلامة

يفتح الباب فلا يستجيب له  
تضغط زرا لتفتح السنترلوك..  
يفتح الباب ثم..

يترجل من السيارة، وقبل ان يغلق الباب تستوقفه

ثم تمد يدها إلى المقعد الخلفي حيث ملف  
المشروع وتناوله إياه

يتناوله ثم لا يعرف ماذا يقول

يغلق الباب.. تنطلق السيارة.. ينظر في إثرها  
للحظة.. يقف قليلاً وعلى وجهه شبح ابتسامة

كانه يسترجع المغامرة من أولها..  
يبدو منتشياً.. يستدير ويدخل العمارة

- قطع -







## صاله منزل خالد ووليد

باب الشقة موارب، يدفعه "خالد" ويدخل  
متوجسا، ترتطم قدمه بموبايل محطم على  
الأرض.. يتجمد مكانه في اللحظة التي يظهر  
فيها "وليد" على باب غرفته.. "وليد" يرمق  
"خالد" بغضب لكن ذلك لم يمنعه من إطلاق  
تنهيدة ارتياح

**خالد (مستبقا الدفاع):** أنا.. أنا حاولت أتصل بيك  
كذا مرة و..

**وليد (مقاطعا ببرود قاتل):** فتحت الباب ليه؟

**خالد (بارتباك متعاضم):** سألت عليك.. و..  
وماكنتش اعرف إن الأمور هتمشي بالشكل ده و..

**وليد (بصوت أعلى):** جيت جنب الباب ليه؟!

**خالد:** طنشت في الأول.. ب.. ماقدرتش أ...

**وليد (بمنتهى الحدة وهو يدفع الباب ليغلقه**

**بعنف):** أنا مش مأكد عليك أكثر من عشر مرات

مالاكش دعوه بأي حاجة بتحصل بره؟!

**خالد (بخضوع):** أنا آسف.. أنا غلطت.. عارف..

بس!...

**وليد (مقاطعا في غضب متصاعد):** وعارف إن

أميرة دي ماسكة مشروع إنت قابض عليه أكثر

من نص مليون جنيه؟

عارف إنها ممكن توقف الشغل في أي وقت لو

حست إن عندك مشكلة؟

عارف إن مستقبلي ومستقبلك ممكن ينتعي في

لحظة، عشان ماستحملتش صوت الجرس وفتحت

الباب؟!

**خالد (كطفل يواجه والده):** ماحصلش حاجة..

والله العظيم ما حصل حاجة.. ماتكلمناش في

الشغل تقريبا.. دي.. دي.. دي قعدت تحكي عن

اخوتها وابوها والشيشة و... صدقني ماحصلش

حاجة..

**وليد (بصوت أهدى كثيرا وهو يخطط على ملف**

**المشروع في يد خالد):** آمال ده كان معاك بيعمل

إيه؟

**خالد:** بصت فيه وانا في الحمام لكن ماتكلمناش

عنه.. أنا.. أنا لحد الوقت مش فاهم كانت عايزاني

جيت هنا ليه أصلا..

**خالد:** بجد أنا آسف يا وليد

**وليد:** كلها أسبوع واللا اثنين وتفهم إحنا قد إيه

متلصمين.. ماشيين عالحبل.. مش ذنك أنا

"وليد" يتنهد ماطا شفتيه وهو يرمق "خالد"  
بنظرة ثابتة



عارف.. لكن ابقى خللي بالك.. إحنا تعبنا كثير  
عشان نوصل للتصيمة دي، ولو انت مش فاكِر  
التعب، أنا افكر ك.. (ثم يلتقط حطام الموبايل عن  
الأرض مبتسما بتهكم) كله بسبب الخرّدة دي..

يتنفس "خالد" الصعداء لابتسام "وليد"، يجلس  
على أحد المقاعد.. فيلاحظ أن للمقعد رجلا  
عرجاء.. يهزه قليلا ويتذكر ثم..

**خالد:** باقولك إيه يا وليد.. هو أنا دخلت الجيش؟

- قطع -



## طرقات سريعة

"وليد" على دراجته البخارية ينهب الطرق  
بسرعة.. نرى الطريق من المرأة الجانبية،  
نقترب منها بهدوء حتى يخرج إطارها من  
الكادرفتصبح الشاشة سوداء بلون الأسفلت ليلا

- مزج -



## كافيه على طريق صحراوي

دراجة "وليد" البخارية، نراها مركونة من خلف الجدار الزجاجي للكافيه، يتسع الكادر لتتضح معالم المكان، ملهى ليلي محترم، "وليد" يشارك "كريم" وصديق ثالث "هاني" إحدى الطاولات، هاني يسترسل في قصة يحكيها ويتابعه كريم، بينما وليد يبدو شاردا، يعبث بأكياس السكر، يتأمل رواد المكان..

**هاني:** دخل علي بالبائب، والشنطة جلد التمساح، والنظارة اللي ماتقلش عن ثلاث تلاف جنيه، وساعة دردشة بقة.. نظام التحويلات، نظام الكريديت، طب تخفيضات الطيران.. وانا أقول يا واد استحمل شكله عميل محترم داخل بحساب نقييل

**كريم (ساخرا):** إيه، طلع عابز عربية بالقسط؟

**هاني:** يا ريت.. ده كان جاي يبيعل شنطة زي اللي في إيده.. طلع Sales.. (ها ها ها)

كريم يضحك بقوة مع هاني قبل أن يلتفت الأخير لوليد

**هاني:** إيه يا هندسة ما تروق

**وليد:** مانا رايق أهو، انت هتعرني بالعافية؟ عامل إيه مع الولية حماتك؟

**هاني (لائما):** وليد؟! الملافظ سعد يا عبال

**وليد:** عامل إيه مع زفت الطين؟

**هاني (موافقا):** أيوة كده.. مطينة عيشتي طبعاً.. عابزاني أجزلها شاليه في الغردقة بتقضي فيه الشتا

وليد شررد عن حديثهما ويبدو أن إحدى الفتيات قد راقته، فأمعن في متابعتها

**كريم (متهكما):** طب يا أخي يعني ماقالتكش تشنري..

**هاني (لكريم):** إنت هتتريق؟ بكرة نشوف..

**كريم:** لا يا عم أنا كده فله..

**هاني:** إيه هتفضل طول عمرك خاطب.. (ثم غامزا تجاه وليد) ده اللي في الطراوة.. (وعندما يكتشف شرود وليد) جرى إيه يا طراوه، فوق لنا مش كده.. (ثم يلمح الفتاة التي يرمقها وليد) إيه عاجباك؟ أروح ألفهالك؟

**وليد (منزعجا):** ماتبطل رخامه بقة..

**هاني (بجدية):** مانت مش عاجبني النهارده خالص.. إيه مالك؟



كريم: طب والله فكرة الغردقة دي مش وحشة.. ما  
تيجو نطلع يومين.. أنا وخطيبتي وحماتي الطريفة  
(ثم لهاني) وانت ومراتك وزفت الطين (ثم لوليد)  
وانت وأي مزة.. نبقي نقول عليها مراتك مش  
مشكلة..

وليد (مسترخما): وله..

كريم: إنت مش بتقول خالد مسافر؟ يعني قاعد  
لوحدك و... (ثم متنبها) يابن الذين.. قاعد لوحدك..

وليد: تصبحو على خير

هاني: فيه إيه يا وليد بس؟!

وليد: ما فيش والله.. عايز أنام

كريم (متخابثا لهاني): يا عم خليه ينام.. (ثم لوليد  
الذي ابتعد نحو الباب فعلا) نوم العواف يا ريس..

ينهض وليد ويخرج مالا من جيبه يضعه على  
الطاولة

يهز وليد رأسه أسفا لغباء صاحبه ساخرا منه،  
وقبل خروجه يلقي نظرة على الفتاة التي راقته  
له.. جميلة رقيقة.. ثم يخرج

- قطع -



## غرفة خالد

خالد يذاكر على مكتبه ثم يلتفت إلى كومة قطع  
ميكافو بجواره، بدأ تكوينها كأساس بيت صغير..  
ينتقي من القطع ما يناسب إكمال أجزاء البيت  
لكن ملامحه لم تتضح بعد

من كاسيت بالغرفة نسمع أغنية من أغاني  
الثمانينات "مدحت صالح أو علي الحجار أو قديم  
عمرو دياب"

- قطع -



## غرفة مكتب أميرة بشركة IMC

أميرة خلف مكتبها تتحدث في التليفون الأرض  
ويبدو عليها الضيق

أميرة: مين اللي قال صفحة أولى؟! أنا قلت كده  
وتفكر انا ماقلتش صفحة أولى استخسار يعني؟!  
مش عايزة أسف.. عايزة المشكلة دي تتحل فوراً..

نسمع صوت الجرس

تضع السماعة.. تفكر لحظة.. تلتقط موبايلها،  
تفتح الإندكس.. ثم تطلب رقماً.. تضع الهاتف  
على أذنها

- قطع -



## غرفة خالد

خالد يواصل العمل على بيت الميكانو لكنه  
يتوقف مع صوت جرس التليفون.. يلقي نظرة  
على شاشة إظهار الرقم.. يفكر للحظة.. ثم يعاود  
العمل دون رد  
أغنية أخرى من نفس الألبوم في الخلفية ومعها  
جرس التليفون

- قطع -



## غرفة مكتب أميرة بشركة IMC

أميرة تغلق الموبايل وتضعه على المكتب..  
تشرذ للحظة، ثم يرن التليفون الأرضي فتسارع  
لرفع السماعة بشيء من اللفة..

أميرة: أيوة .. (تتغير ملامحها إلى ضيق شديد)  
قوليله في Meeting مش هخلص دلوقت..

تضع السماعة بعنف.. لحظة إضافية ويقتحم  
"يحيى" باب الغرفة وفي إثره فتاة  
"السكرتيرة" .. "يحيى" يقترب من الأربعين حاد  
الملامح كلاسيكي الملابس.. أميرة تنتفض واقفة  
بمجرد دخولهما..

السكرتيرة: يا فندم قولتلك..  
يحيى (متهمًا): ممم.. واضح إن ال Meeting  
هيطول فعلا.. فيه ناس كتير قوي بتتكلم.. (ثم  
لأميرة مشيرا للسكرتيرة) ليه تحرجيها وتطلعها  
كدابة..  
أميرة: خلاص..

أميرة (بحدة): عايز إيه؟  
يحيى (بتلقائية): قهوة..  
أميرة (بغضب): عايز إيه يا يحيى..  
يحيى (وهو يمسك بورقة كانت على مكتبها  
وينظر فيها): مافيش والله.. أنا كنت في مأمورية  
جنبكو هنا، وتمت بسرة قلت أعدي.. يمكن  
تكوني عايزة حاجة.. ناقصك حاجة..

يحيى: تليفون البيت اتصلح على فكرة..  
أميرة (تحاول أن تتمالك أعصابها): يحيى.. انت  
كويس إن اللي بتعمله ده مش هيجيب نتيجة.. أنا  
مسحتك من حياتي خلاص.. إنت بالنسبة لي  
دلوقت ولا حاجة.. وإذا كانت ماما بتحاول  
تفهمك..

يحيى (مقاطعا): ماما مايتفهمنيش حاجة.. (ثم  
ناصحا) وبعدين بالراحة عليها شويه، دي مهم  
كان برده مامتك وعازية مصلحتك.. (ثم بحركة  
مباغته يقبض على معصم أميرة وينظر إلى  
ساعتها ساخرا) الله!!  
مش دي الساعة اللي جيتالك من دبي؟

أميرة تنزع الورقة من يده بحسم فتتلاقى  
نظراتهما للحظة ثم..

لحظة صمت، يصل فيها غضب أميرة إلى  
ذروته.. تنزع يدها من يده.. تتجه نحو نافذة



المكتب وتفتحها عن آخرها، تنزع الساعة من  
معصمها بعنف وتلقي بها من النافذة، ثم ترمقه  
بتحد

أميرة: شكرا انك فكرتني

ينهض يحيى واقفا وهو يصفق تصفيقا رتيبيا

يحيى: برافو..

أثبتني فعلا انك مسحتيني بأستيكه.. (ثم ناظرا  
لنفسه) إيه ده.. أنا مش موجود..  
مع إني تصورت إن رجوعك للبيت الي أنا  
اشتريته.. واللي احنا عشنا فيه مع بعض سنتين..  
ممك يكون معناه انك بداتي ثاني تفكري في  
وضعنا..

أميرة: ما تضطرنش أغلط فيك..

واظن واضح جدا إني مش طايقة وجودك هنا  
يحيى (متجها نحو الباب): طبعاً واضح.. أنا  
هامشي.. يمكن ألحق الساعة قبل ما حد ياخذها

وبعد ان يفتح الباب ويخرج يعاود الالتفات  
للاخل ويحدث أشخاصا وهميين

يحيى: كملو اجتماعكو.. كملو..

يخرج ويغلق الباب.. وأميرة تنتظر في إثره في  
غيظ

- قطع -



## غرفة خالد

خالد يضع المكعب الأخير في بناء الميكانو..  
النتائج النهائي بيت جميل أنيق التركيب.. ينظر له  
نظرة رضا.. ثم يتجه نحو دولاب ملايسه، ومن  
جيب قميص يخرج الكارت الذي أعطته إياه  
أميرة.. يتأمل الكارت، وينقل بصره بينه وبين  
التليفون.. ثم يضع الكارت جانبا.. ويعود ليتأمل  
بيت الميكانو، ثم يفتح بابه الصغير وعلى وجهه  
شبح ابتسامة

- قطع -



## منزل دينا (مدخل + غرفة دينا)

أميرة تضرب جرس الباب.. تفتح سيدة في  
الخمس

أميرة: إزيك يا طنط.. دينا جوه مش كده..

تفسح لها الأم لتدخل

أم دينا: أيوه يا بنتي قافلة عليها من ساعة  
ما رجعت مش عارفة مالها..

في الغرفة دينا جالسة على السرير، ممسكة  
بموبايل وعينها مثبتة على شاشته بذهول..  
تدخل أميرة

أميرة (بانزعاج): فيه إيه؟! إيه اللي  
حصل؟!!

دينا (دون ان ترفع نظرها عن الموبايل  
ويبدو على صوتها البكاء لكنها لا تبكي):  
كنت باتغدى مع أشرف النهارده.. وبالغلط  
خدنا موبايلات بعض..  
أميرة: وبعدين؟!  
دينا (تناولها الموبايل): إقري..

تأخذ أميرة الموبايل وتقرأ فتتكرر ملامحها

أميرة: إيه قلة الأدب دي؟!  
دينا: دي قلة أدب طب افتحي المسح اللي  
قبلها كده

أميرة بالفعل تفتح رسالة أخرى وتقرأ فيصيبها  
الذهول

أميرة: يا نهار اسود  
دينا: فيه مسح مبعوته من خمس شهور..  
خمس شهور وهو بالقذارة دي..

أميرة: مين "ماهي" دي؟  
دينا (بغضب متصاعد): مش محتاجة  
أعرف عنها غير انها حيوانة زيه بالطبط..  
(ثم تكتم إنفعالها لكنها تنتفض غضبا) أعمل  
إيه؟ أنا حاسة إني باغلي..  
أميرة (تربت على كتفها): طب إهدي..  
إهدي.. هو كلمك؟  
دينا: ماردتش.. وما عنديش ساتعداد أرد..  
أعمل إيه

أميرة: السؤال ده تسأليه لو محتارة بين كذا  
قرار.. متهياي إنت مش محتارة

تأخذ دينا الموبايل من أميرة وتعبث بأزراره  
بينما تتحدث بلهجة متصاعدة

دينا: إحنا مخطوبين بقالنا سنة.. ومر تبطين  
بقالنا ثلاث سنين.. (ثم وهي تري أميرة  
شيئا على الشاشة قد وصل غضبها للفروة)



وامبارح الساعة اتنين بالليل كلمو بعض  
أكثر من نص ساعة..  
أميرة (تهون عليها): دي هدية يا بنتي..  
ربنا بعتهالك قبل ما تتورطي أكثر من كده..

أميرة: هو..  
دينا: آ..  
أميرة (بلهجة أمرة): ردي..

أميرة (تؤكد): إخلصي..

دينا (في الموبايل): أيوه

يرن الموبايل فتتظر دينا لشاشته وتمط شفتيها

تتظر لها دينا حائرة

دينا تفتح الخط

- قطع -



## فوتومونتاج

- أ- سيارة أميرة في الطرقات ليلا، أميرة تتصل من الموبايل
- ب- خالد في غرفته ليلا يطابق بين الرقم الظاهر على شاشة الهاتف والقلم المكتوب بخط يد أميرة على الكارت ونحن معه
- ت- أميرة تضع سماعة تليفون بيدها على أذنها "ليل"
- ث- خالد يذاكر "نهار"، وينظر للتليفون بتردد
- ج- أميرة في مكتبها "نهار" وسماعة الهاتف الأرضي على أذنها
- ح- خالد ليلا ينظر من نافذة غرفته ليرى وليد مبتعدا بدارجته البخارية، ثم ينظر تجاه التليفون
- خ- أميرة في المطبخ بمنزلها "ليل" تجهز طبق سلطة، والهاتف الأرضي مفتوح على السبيكر
- د- خالد في سريره "ليل" يدفس رأسه تحت الوسادة ليهرب من صوت الجرس..
- عندما يصمت الهاتف يتنهد خالد بعمق معلقا بصره بالسقف

- قطع -



## منزل أميرة (مطبخ + ريسبشن) + غرفة خالد

أميرة في المطبخ تزيح الشرائط اللاصقة على  
ثلاجة جديدة.. في الريسبشن  
يضرب جرس الهاتف الأرضي.. ومن موقعها  
في المطبخ يمكنها السماع

بعد رنين نسمع صوت أميرة على المجيب الآلي: صباح  
الخير أو مساء الخير حسب الوقت.. أميرة مش موحدة  
دلوقة.. سيب رسالتك بعد ماتتسمع الصفارة..  
تبيت..

ص. خالد: إ...!

أنا خالد

مش عارف المفروض أقول إيه.. أنا..

أميرة: الو.. خالد أنا أميرة..

خالد: إ... إزيك..

الوقت متأخر مش كده؟

أميرة: لأ خالص.. أنا لسه مانمتش..

خالد: معلش أنا ماكنتش بارد اليومين اللي فاتو عشان إ...  
أميرة (تقاطعه): مش مهم.. مش مهم.. المهم إنك اتكلمت..  
إزيك.. عامل إيه؟

خالد: الحمد لله.. وانتى.. كويسة؟

أميرة: آ.. يعني.. الحمد لله برضه.. إنت إ.. عامل إيه في  
الشغل؟

خالد: باشتغل.. (ثم مستدركا) مش بشتغل دلوقة حالا  
طبعاً.. أقصد يعني...

أميرة (تقاطعه متفهمة): أيوه أيوه.. الشغل ماشي كويس؟  
مشروع جديد؟!

خالد: إ.. لأ.. تراجع على حاجات قديمة كدة.. إنتي إ..  
متعودة تسهري؟ ما بتناميش بدري يعني؟

أميرة: حسب المود.. النهاردة يمكن مانامش خالص..

خالد (متندرا): لأ أنا مش هطول! ...

أميرة (تقاطعه): أقصد مودي النهاردة وحش.. هو

بصراحة بقاله كام يوم وحش..

بالعكس.. أنا مبسوبة إنك اتصلت..

خالد: كويس.. (ثم مستدركا) مش كويس إن مودك وحش..

يعني إ.. كويس إن اتصالي كان.. كويس..

خالد (مبتسما): إ... بتضحكي على إيه؟

بمجرد سماع صوت خالد تهرع أميرة من  
المطبخ إلى الريسبشن وترفع السماعة

بعد رد أميرة تنقسم الشاشة إلى نصفين، لنرى  
خالد في النصف الثاني،

يتحدث وهو جالس إلى مكتبه.. يبدو عليه  
الارتباك، فيداري ارتبائه برسم خطوط  
عشوائية على ورقة بيضاء  
ومع استمرار المكالمات ينتقل من موقع لآخر  
على الورقة، فنجد أنه في كل موقع يرسم  
اسكتشا هندسياً بديعاً..

في حين أن أميرة تداري حماسها وخجلها  
بالعبث المستمر في سلك السماعة..

لاحظ أن للحوار بينهما حميمية يشوبها خجل  
المكالمة الأولى، والبحث عن موضوع للحديث  
لمجرد سماع صوت الآخر

أميرة تضحك لارتبائه..



أميرة (من بين ضحكاتها): مش عارفة..  
خالد (يبدأ في الضحك الخفيف بدوره): إ.. كلمة غريبة  
قوي كويس دي .. صح؟ تحس إنها تضحك فعلا..  
أميرة: أيوة صح..  
خالد (يفصص الكلمة): ك.. و.. يس.. يعني إيه؟  
جاية من إيه طيب؟  
أميرة: أما تركز فيها تحس إنها جاية من الكوسة مثلا..  
خالد: أيوة فعلا.. كوسة.. كويس..

يستسلمان للضحك الذي يبدو أنه قد ساعدهما  
على التخلص من ارتباكهما وشحنهما العصبي  
الزائد.. وبعد خفوت الضحكات يسود الصمت  
للحظة ثم يتحدثان في نفس واحد..

أميرة وخالد: من يوم ما..

يضحكان للمصادفة ثم..

خالد: قولي..  
أميرة: لا لا لا.. قول انت  
خالد (يغالب تردده): م.. من يوم ما كنا مع بعض.. إ..  
معلقة في وداني الغنوة اللي كانت شغالة في المكان اللي  
قعدنا فيه..  
أميرة: أنهي أغنية؟  
خالد: كانت بتقول إ.. طب ليه "ثم ينددن اللحن الأساسي  
لأغنية شاهيناز" تتترارا.. رارا.. إ.. ممم.. مش فاكرك بقيت  
الكلام.. بس حلوة..  
أميرة (متذكرة): ممم..  
خالد: انت بقه.. كنت هتقولي إيه؟  
أميرة: من يوم ما كنا مع بعض.. عايزة أكلمك تاني  
خالد (بحماس طفولي): وانا برضه.. أنا كنت هاقول كده  
أصلا على فكرة.. يعني.. كنت هاقول عالغنية وعالحكاية  
دي..  
أميرة: طب ماكنتش بترد ليه؟  
خالد (بخجل): مش انت قلت مش مهم..  
أميرة: صح.. مش مهم.. (ثم تغير الموضوع تماما)  
النهاردة جيت تلاجة جديدة  
خالد (بتلقائية): مبروك..  
أميرة (بسعادة طفولية): فاضل السخان.. وابقى غيرت كل  
الأجهزة اللي في البيت  
خالد (باستغراب): هو انتي إ.. كل الحاجات عندك كانت  
بايظة؟  
أميرة (مبتسمة): حاجة زي كده..

- مزج -



## فوتومونتاج

الثابت فيما يلي هو قسم الشاشة على كادرين،  
بأحدهما أميرة، وبالثاني خالد

خالد: طب ماجيبتوش غازليه عشان توفري كهربا؟

أميرة: أخاف.. دائما باقرا عن حوادث سخانات الغاز

أميرة: الصالة بقت أوسع كثير..

خالد: انت مابتخافيش مالقعدة لوحك؟

أميرة: ساعات باخاف.. وعشان ماخافش بأفضل أفكر  
نفسى بالحاجات اللي خلتنى أقعد لوحدي أصلا..

خالد: أكيد اتبسطت قوي انكو اتغديتو مع بعض

أميرة: هي اتبسطت وانا اتعكننت.. مابطلتش تلميحات  
مستفزة عن يحيى وحكاية رجوعى ليه..

خالد: هي كده متصورة إنها بتخدمك.. ريحيها وحسسيها  
إنها بتعمل اللي عليها.. وأول ماتسببها إنسى كل اللي  
مضايقتك

أميرة: من ساعة اللي حصل بينهم، وانا حاسة زي ماكون  
انا السبب فيه..

خالد: عشان نصحيتها إنها تفسخ الخطوبة؟

أميرة: لأ.. حاسة زي ماكون نحستها.. أو حتى حسدتهم  
على اللي كانوا فيه.. دول كانوا بيحبو بعض قوي..

خالد (موضحا): كان باين عليهم إنهم بيحبو بعض.. لكن  
مش لازم تكون دي الحقيقة..

خالد: معلىش أنا.. أنا مضطر أقفل دلوقت..

أميرة: المفروض تنام بقعة صح؟

خالد: إ.. يعني..

أميرة: خالد.. أنا عايزة أشوفك..

خالد: خلاص.. نتكلم بكرة ونتفق..

أميرة (بسعادة): تصبح على خير

خالد: وانت من أهله

ا- نهرا، أميرة في مكتبها تتحدث من الهاتف  
الأرضي، وخالد في غرفته

ب- ليلا، في الريسشن بمنزل أميرة تتحدث من  
موبايلها وقد تغير الأثاث تماما وتبدو سعيدة،  
وخالد في غرفته يركن السماعه على كتفه  
ويحسب أرقاما على الآلة الحاسبة

ج- نهرا، كادر أميرة أمام منزل أمها.. حيث  
نرى Telet down من شرفة تقف فيها الأم  
إلى أميرة تركب سيارتها، ثم أميرة في السيارة  
تتحدث في الموبايل.. بينما كادر خالد نراه فيه  
يتحدث من هاتف الصالة وهو يفتح التلفزيون

د- نهرا، تتحدث في الموبايل وهي في إحدى  
طرقات شركتها، ومن وجهة نظرها نمر دينا  
شاردة على مكتبها.. ثم تدخل إلى غرفة مكتبها  
وتجلس خلفه بينما خالد ممدا على سريره

ز- ليلا، أميرة تحتضن الهاتف في سريرها،  
بينما خالد ينظر من النافذة ليلاحظ دخول وليد  
بدراجته البخارية إلى الشارع واقترابه من  
مدخل العمارة

لا يرد خالد مباشرة.. يبدو سعيدا ثم

يغلقان السماعه في وقت واحد  
- إظلام تدريجي -



## كافيه

أميرة تقف في مواجهة أشرف.. يتحدث بإعياء وضيق، وبين أصابعه سيجارة شارفت على الانتهاء ينفث دخانها الأخير من بين كلماته ويلتقط واحدة جديدة من علبته المفتوحة باليد الأخرى.. أميرة تستمع بتحفظ..

أشرف: هو أنا قلت إنني ماغلطتش؟! عارف إنني غلطان.. غلط كبير جدا.. فطيع.. إجرام.. انا مجرم.. لكن حتى تجار المخدرات وقتالين القتلا بيدولهم فرصة يدافعوا عن أنفسهم.. يمكن يقولو حاجة تخفف عقوبتهم شوية..

أميرة: أشرف.. أنا مش قاضي.. ومش انا اللي من حقي أقول عالعقاب اللي تستاهله..

أشرف: بس انت اكتر واحدة دينا بتقتنع بكلامها.. وممكن تخليها تفكر ثاني..

أميرة: ده لو انا مقتنعة إنها المفروض تفكر ثاني.. وعشان كده وافقت إنني أقابلك واكلمك.. لكن انت لحد الوقت ماقلتش أي حاجة مقنعة

أشرف (بعصبية): أقنعتك إزاي بحاجة انا مش فاهمها لحد الوقت؟! أنا مش عارف إيه اللي حصل لي مع ماهيتاب دي.. لما باشوفها أو باكلمها باحس إنني بني آدم ثاني ما عرفوش.. باحس إنني حيوان.. فاهمة؟!

وأول ما يقفل معاها باضرب نفسي بالجزمة عالغلط اللي باغلطه في حق دينا و....

(يحتقن صوته فيصمت، ثم يواصل) المصيبة إن كل اللي بيحصل دلوقت أنا شفته في خيالي ميت مرة..

كوابيس ما نيمتنش، شفت فيها هاوصل لإيه لو دينا عرفت.. ورغم كده ما عرفتش أوقف.. لكن والله.. والله العظيم.. يا رب أولع قدامك زرزري السجارة دي.. ما حصلش بيني وبينها أكثر مالتليفونات والخروج في أماكن عامة.. وكل اللي ممكن أدافع بيه عن نفسي إن اللي منعني من الأكثر من كده، هو حبي لدينا.. مصدقاني؟

أميرة: تعالي نفرض إن الوضع معكوس.. وانك فتحت موبايل دينا لاقيت عليه ميسج من ولد فيها كلام وسخ.. وعرفت إنها بتكلم الولد ده بالساعات.. وبعدين جت هي وقالتك الكلام اللي انت قولتهولي دلوقت.. هتسامحها؟

بنهاية حديثه يشعل السيجارة الجديدة من ذيل القديمة قبل أن يذفسها وسط كومة الأعقاب في الطفاية، بينما ترد أميرة

هنا تلتقط أميرة سيجارة من علبته المفتوحة وتشعلها وهي تواصل الاستماع

لا تجيب أميرة سريعا.. ترمقه بنظرة يختلط فيها السخط والشفقة، وبعد نفثه من سيجاتها ترد

لا يحر أشرف جوابا.. أميرة تطفئ سيجارتها ذات العمر القصير وتنهض وتمضي، مخلقة إياه في حيرته

- قطع -



## منزل خالد ووليد (غرفة خالد + الصالة + غرفة وليد)

خالد في غرفته مرتديا ملابس الخروج.. ينظر  
لنفسه في المرآة ويصلح من هندامه.. يمر  
بأصابعه على ذقنه الحليقة.. يبدو سعيدا..  
جرس التليفون يرن رنة ونصف ثم يصمت..

بمجرد سماع الجرس يندفع للخروج من  
الغرفة.. وبعد ان يفتح باب الشقة يعود إلى  
غرفته من جديد، ويفتح احد أدراج المكتب  
ويأخذ نقودا يضعها في جيبه ويخرج.. وبعد أن  
يتجاوز باب الشقة من جديد يعاود الدخول  
ويتجه إلى غرفة وليد، يأخذ زجاجة برفيوم  
ويعطر نفسه.. ثم يخرج.. في كل ذلك يبدو  
ارتباكها طفوليا سعيدا.. أخيرا يخرج من الشقة  
ويغلق الباب

- قطع -



## أمام منزل خالد ووليد

سيارة أميرة متوقفة أمام الباب وهي بداخلها..  
يظهر خالد ويتجه نحو السيارة سريعا ويفتح بابها  
خالد (وهو يجلس ويصافحها): إزيك.. اتأخرت  
عليكي؟  
أميرة: لأ.. أنا رنتلك قبل مادخل الشارع..  
خالد (وهو يغلق الباب): كويس..

أميرة: كويس؟

تنظر مبتسمة ابتسامة ذات مغزي

يبادلها النظرة فيفهم ما ترمي إليه.. يضحكان..  
تتحرك السيارة

- قطع -



## غرفة مكتب د. جلال الورداني بشركة ماجيكال

على خريطة مفرودة على مكتب جلال، يشير  
بإصبعه شارحا لوليد الذي يقف أمامه

**جلال:** هنا يا وليد..  
والمساحة اللي وراها دي كلها هتبقى المطار  
والفندق..  
خالد رجع من السفر وللا لسه؟  
**وليد:** هيرجع كمان عشر تيام  
**جلال:** لأ.. يرجع النهارده..  
أنا عايز Plan مبدئي خلال أسبوعين.. لازم نلحق  
المناقصة دي بأي شكل..  
(ثم وهو يطوي الخريطة ويسلمها لوليد) سيادة  
الوزير أكد علي بنفسه.. وده معناه إنها غالبا هترسي  
علينا لو ركزنا شوية..  
**وليد:** لكن يا دكتور ضغط الشغل عالشركة ممكن  
مايسمحش إننا..  
**جلال (مقاطعا):** هاجيب مهندسين.. هاعمل  
توسعات.. إحنا لينا اسم جامد في القطاع الخاص،  
بس الشغل مع الحكومة له طعم ثاني.. هينقلنا ل  
Level ثاني.. يمكن مكسبه المادي مش كبير.. لكن  
مكاسبه الجانيية لا تعوض..  
فاهمني طبعا..  
**وليد:** فاهم يا دكتور  
**جلال:** الكلام ده مايعرفوش غيري انا وانت وخالد  
لما هاتقوله..  
أنا عارف إنك قد المسؤولية..  
**وليد (يمط شفتيه صاغرا):** إنشاء الله.. ربنا يسهل.

- قطع -



## أحد مشايات منطقة الكربة بمصر الجديدة

خالد وأميرة يسيران على مهل  
الكاميرا تتراجع أمامهما ب Track out هادىء  
لكنه أسرع من خطواتهما بقليل

**خالد: وبعدين؟**  
**أميرة (بحماس كأنه نكأ جرحا):** ده أوحش سؤال  
في الدنيا..  
كنت تعيش في جوازي، صممت عالطلاق،  
واتطلقت..  
رجعت الشغل تاني أصغر مما بدأت فيه زمان،  
ووصلت دلوقتي لأكثر ماللي باحلم بيه.. أنا عندي  
سكرتيرة تنظم لي مواعيدي، تخيل؟  
زهقت من معاملة ماما، سيبتها وعشت لوحدي.. كل  
حاجة في حياتي بقت ماشية بنظامي أنا..  
**طوب وبعدين؟**  
لسه المفروض إيه اللي يحصل عشان أبقى مبسوفة  
بجد؟

**خالد: انتي تعرفي حد مبسوفة بجد؟**  
**أميرة (بعد لحظة تفكير):** على فكرة أنا دلوقت  
مبسوفة شوية.. يمكن لأنني هنا.. نفسي أعيش في  
مكان زي ده.. حلو قوي إن اللون الأبيض يبقى  
حوالك في كل حته.. لون جميل صح؟

**خالد: الأبيض مش لون .. الأبيض ولا حاجة..**  
لو دققتي في البيوت اللي حوالينا مش هنلاقي  
أبيض.. كريمي يمكن.. لكن الأبيض بعد ما بيدهن  
بدقيقة واحدة ما بيبقاش أبيض..  
**أميرة (بإصرار طفولي):** لأ بقة.. فيه أبيض بجد..  
أبيض ما بيروحش..  
**خالد: في المستشفيات (ثم ضاحكا) على فكرة انا لما**  
**سألتك وبعدين، كنت أقصد هنفصل ماشيين لحد**  
**إمتي؟ مش هنفعد بقة؟**

يتوقف عن السير فتتوقف في إثره

- قطع -



## مطعم

أميرة و خالد يجلسان متواجهان، الطاولة بينهما عليها أطباق الأطعمة.. أميرة تواصل الأكل وقد شارف طبقها على النفاذ.. بينما خالد توقف عن الأكل

أميرة: إنت مايتز هقش من قعدة البيت؟  
خالد: دايمما بيبقى فيه حاجة جديدة أعملها في البيت..  
أميرة: ولما تخلص الحاجات اللي ف البيت؟  
خالد (مبتسما): لحد الوقت ما بتخلصش..  
أميرة (ضاحكة): إنت إيه عايش في مغارة علي بابا؟!  
خالد: عارفة.. حتى المجلات القديمة باحس إني باقراها لأول مرة..  
أميرة: إنت مابتاكلش ليه؟  
خالد: شبعت..  
أميرة: متأكد؟  
خالد (ضاحكا): أيوه..

أميرة: مش فاهمة إيه الجوع اللي نزل علي النهارده ده..

تنتبه لتوقفه عن الأكل ويكون طبقها قد نفذ

وهي تأخذ الصحن من أمامه وتضعه أمامها..  
فيقوم بنقل صحنها الخالي أمامه..  
وفي عملية النقل تسقط شوكة على الأرض..  
ينحنيان في وقت واحد لالتقاط الشوكة.. ترتطم رؤوسهما ارتطاما خفيفا.. ينظران لبعضيهما في هذا الوضع القريب.. يحدقان للحظة ثم يترجعا ويعتدلا سويا دون التقاط الشوكة..  
بعد الاعتدال تظل عيونهما متصلبة.. وكلاهما يفكر في التقاط الشوكة بتردد ويهمان بالحركة ثانية..  
يأتي الجرسون ويلتقط الشوكة ويضع أخرى بدلا منها على الطاولة.. ينظران له، ثم لبعضهما ويضحكان.. ضحك يبدو لتنفيس لحظة التقارب التي حدثت توا.. وبعد أن يهدأ.. يتحدثان في نفس واحد  
يضحكان ثانية للمصادفة.. ثم

أميرة و خالد: هو انت.....  
خالد: قولي انت..  
أميرة: لا لا لأ.. قول انت..  
خالد: هو انتي ماعدكيش شغل النهارده؟  
أميرة (بجدية): ز هقت؟ نقوم؟!  
خالد: خالص.. خالص.. أنا باسأل عشان خايف الوقت يعدي بسرعة ويكون المفروض تمشي..

أميرة (مبتسمة): أنا مفضية نفسي النهارده خالص لحد مانت تقول ياللا نروح  
خالد: ليه؟

أميرة (بشئ من الخجل): الكلام في التلفون حلو..  
بس من غيره بيبقى أحلى..  
خالد (بخجل مماثل): انا كنت أقصد ليه نروح؟

تبدأ هنا بتقطيع أحد المناديل الورقية بأصابعها بشكل آلي طوال حديثهما التالي



يستغرقان في النظر لبعضهما لحظة ثم..

خالد: إنت بقه كنت هتقولي إيه؟  
أميرة (تفريق من النظر إلى عينيه): آ.. ياه.. كنت هانسى.. هو انت مالاكش اصحاب؟  
خالد: أنا كان متهيألي إن احنا اصحاب..  
أميرة: أيوه.. بس إ.. احنا نعرف بعض من وقت قريب  
خالد (بحيرة): آ.. أكيد كان لي اصحاب قبل كده..  
يمكن انا صحوبيتي مابطولش (ثم مغيرا الموضوع)  
انتى بطلتلى تاكلي ليه؟  
أميرة (تفقت المنديل من يدها): شبعت.. شبعت فاجأه

خالد (ضاحكا): الله.. ظراف قوي.. مين دول بقه؟  
أميرة (مبتسمة): مش عارفة.. ممكن يبقو أي حد..  
خالد (وهو يطويهم): عشان لونهم أبيض.. لونهم زي مانت عايزة..

يلتقط خالد المنديل الذي عبثت به.. يفرده ليجده أصبح على شكل أجسام آدمية متلاصقة الأيدي

- قطع -



## طريق هادئ في مصر الجديدة

أميرة وخالد يسيران علي مهل..  
الجو غائم بشكل ملحوظ.. هي تحكي باسترسال  
وهو يستمع بانصات

أميرة: يحيى مش كبير قوي.. وبعدين فرق السن  
ماكانش المشكلة.. اتناشر سنة مش فرق كبير  
أصلاً.. يمكن المشكلة في فرق السن ده إنه زود  
إحساسه إنه يقدر يتحكم في.. ولما كل اللي حوالينا  
يشوفوا إن دي حاجة عادية، وحقه، وإني عيلة  
صغيرة هتعمل لما تكبر، طبيعي إن الاحساس ده  
يزيد لحد ما يخفني..

فجأة تتوقف، فيتوقف بدوره

(بحدة) إيه ده؟!  
تعرف إنني متغاضة جداً دلوقت..  
خالد (بدهشة): ليه؟!  
أميرة: مش انت بتقول إننا اصحاب؟  
خالد: أيوة..  
أميرة: أنا ماعرفش عنك أي حاجة.. طول الوقت انا  
اللي باقول وباحكي..  
إنت بقيت عارف ماما واخواتي وطلريقي وأصحابي  
ومشاكلهم..  
ده انت عارف السخان اللي في شقتي كهربا  
وللا غاز..

أمطار خفيفة جداً تبدأ في الهطول

خالد (مبتسماً): أنا السخان عندي كهرباء..  
أميرة (بغضب): لأ بجد يا خالد..  
أنا ماعرفش أكثر من إنك مهندس.. واخوك وليد  
مهندس.. و.. وبس..  
خالد: وعارفة عنواني.. ونمرة تليفوني.. وعارفة  
عندي كام سنة..  
فيه إيه تاني ممكن يكون مهم عني؟  
أميرة (تباغته): إنت اتجوزت قبل كده؟  
خالد: لأ..  
أميرة: ليه؟

حدة الأمطار تزداد قليلاً

خالد (مغيراً الموضوع): بدأت تمطر على فكرة..  
أميرة: إنت مش عاوز ترد صح؟  
خالد: لو قلت لك إنني مش عاوز أرد هتصايقي؟

تحدق في عينيه للحظة، ثم تشوح بيدها في غضب



طفولي وهي تبتعد عنه مع اشتداد المطر بشكل ملحوظ

أميرة: صحوبية أونطة..  
خالد (دون أن يتحرك في إثرها: بس أكيد مش هاتسيبي الصاحب الأونطة ده في المطرة وهتوصليني..  
أميرة (تتوقف وتلفت له مبتسمة بغیظ): وكمان بتاع مصلحتك.. ياللا.. أحسن شكلها هتمطر بجد..

خالد: حاسبي..

خالد (مرتبكاً): إ.. إممم.. كويس إن العربية مش بعيدة..

يهم في إثرها ضاحكاً..  
تنزل من الرصيف لتعبر الشارع فتتزلق قدمها وتكاد تسقط..  
يسارع هو بتلقفها بين ذراعيه قبل السقوط..  
للحظة.. هو يحتضنها تماماً.. يتبادلان النظرات والمطر علي أشده.. ثم يفیق هو أولاً ويقفلتها

- قطع -



## سيارة أميرة + أمام منزل خالد

داخل السيارة أميرة وخالد صامتان، المطر مازال  
يهطل غزيراً، والمساحات تعمل بأقصى سرعة..  
تتوقف السيارة أمام مدخل المنزل

خالد: إنت بجد مش مضايقة إنني ما ردتش علي  
سؤالك.. صح؟  
أميرة (تتصنع الغيظ): لأ خالص..  
ياللاً تلاقى البيت وحشك..  
خالد (ضاحكاً وهو يفتح الباب): سلام  
أميرة (تستوقفه): هانتكلم بالليل؟  
خالد (بعد ثانية تفكير): إ... آ.. (ثم كأنه تنبه لشيء)  
استنتي كده.. فيه حاجة غريبة النهاردة  
أميرة: إيه؟  
خالد: موبايلك مارنش خالص!  
أميرة (متنبهة وهي تخرج الموبايل من حقيبتها):  
يا خبر.. فكرتني.. أنا كنت قافلاه طول اليوم..  
(ثم بابتسامة ذات مغزي) والدنيا ما تهدتش ولا  
حاجة..

خالد لم يفهم ما ترمي إليه فابتسم في بلاءه.. وهي  
استغربت قليلاً لكنها تجاوزت الموقف

خالد (وهو يترجل): سلام

يغلق الباب ويجري تحت المطر باتجاه مدخل  
المنزل، وتتحرك السيارة.

- قطع -



## غرفة خالد

وليد يجلس بجوار خالد علي المكتب ويشرح له مسألة هندسية بشئ من التوتر، بينما يبدو علي خالد عدم التركيز

وليد: ماهي.. آهي..  
لو حسبنا الفرق بين  $X$  و  $Y$ ، هتعرف حجم الضغط علي العمود الحامل..  
خالد: آ.. صح..  
وليد (يمط شفثيه): شكك تعبتي.. تريخ شوية؟

خالد: آ تريخ..

وليد: خالد أرجوك ركز.. د. جلال معتمد علينا في المشروع الجديد وشكلنا هنتزق خالد (وهو يرتب القطع): لالا.. أنا مركز..  
وليد (متهكماً): واضح.. (ثم وهو يقرب الهاتف تجاهه) أنا هاطلب أكل.. أجيبك إيه؟  
خالد (دون أن ينظر له): أي حاجة.. زي ماهتاكل..

خالد ينتفض من المقعد كأنه كان بانتظار الإشارة، ويتجه من فوره إلى السرير، حيث يفرغ عبوة مكعبات ميكانو ويفرزها.. يبدو أنه يضع القطع البيضاء جانباً..

وليد يضغط علي زر الـ Radail فيظهر له رقم ينظر له بشك ثم

وليد: إنت إ...  
كلمت حد النهاردة في التلفون؟  
خالد (بشئ من الارتباك): إ.. آه..  
السوبر ماركت.. إ.. طلبت حاجات بالدليفري..  
الصابون إ.. كان خلص.. والمناديل.. وكده يعني..

وليد يهز رأسه متفهماً وهو يقارن من طرف خفي (ونحن معه) بين الرقم الظاهر علي الشاشة وورقة ملصقة علي الحائط مكتوب عليها رقم السوبر ماركت.. الرقمان مختلفان..

وليد (بضيق): ممم..  
قلتلي هتاكل إيه؟

- قطع -



## غرفة مكتب أميرة بشركة IMC

أميرة جالسة خلف مكتبها، ودنيا تقف إلى جوارها  
تريها أشياء علي "لاب توب"..  
دنيا يبدو عليها الإعياء

دينا: ده ديزاين النص صفحة في الجرايد، وده الـ  
back cover في المجلات.. وده..  
أميرة (تغلق اللاب توب): رُوحي يا دنيا..  
دينا: نعم؟  
أميرة: رُوحي.. إنت إيدك بتترعش..  
الدنيا مش هتتطريق لو خدتي يوم أجازة  
دينا: أنا كلمت أشرف امبارح..

تلقي دنيا بنفسها علي أحد المقاعد المواجهة  
للمكتب.. وبعد لحظة

دينا (تستدرك): مش انا اللي كلمته يعني.. رديت  
عليه..  
أميرة: وبعدين؟  
دينا: ساب الشقة اللي في عمارة أهله، وجاب شقة  
في زهراء المعادي..

أميرة تندesh تماماً لكنها تكتفي بنظرة استفهامية

للمرة الثانية تكتفي أميرة بالنظرة التساولية  
المستكرة

دينا: هي حاجة ممكن تكون هايفة بس!...  
أنا عارفة قد إيه ده كان صعب.. علاقته بباباه ممكن  
تبوظ بسبب الحركة دي.. هو عمل كده عشان أنا  
كنت دايماً عايزه كده..  
أميرة: برضه وبعدين؟!  
دينا (باحباط وضيق): مش عارفة..  
مش عارفة أفكر.. ومش عارفة أجمع.. تقريباً  
امبارح كنت باسمع بس ماتكلمتش..  
يرن جرس موبايل أميرة..

تلتقطه سريعاً وترد مبتسمة



أميرة: ألو.  
إزيك انت..  
أنا ما كنتش عايزة أقول لك كده عشان عارفة إنك  
مشغول  
O.K بكرة؟  
خلاص يبقى التلات.. اتفقنا..  
عشرة ونص حذاشر.. زي المرة اللي فاتت باي..

تغلق الهاتف بسعادة.. ثم تلتفت تجاه دنيا..

أميرة: ما تيجي تبيني عندي النهاردة

- قطع -



## منزل خالد ووليد (غرفة خالد + الصالة)

خالد في غرفته يعمل باجتهاد علي رسم هندسي..  
أغنية في الكاسيت في الخلفية، ثم صوت باب الشقة  
وأكياس..

خالد (منادياً): وليد؟

وليد: إيه الأخبار؟

خالد (مشيراً للرسم): بص كده..

وليد (يتفحص الرسم): ممم.. الـ High Way  
الناحية دي؟

خالد: آ..

وليد (بضيق): يعني الواجهة الرئيسية كلها بقت  
قبلي..

خالد (متفاجئاً): آ.. ما هو إ

وليد: ما هو إيه بس؟! مافيش وقت للتوهان ده..

خالد (مطمئناً): بسيطة والله بسيطة.. هتتضبط  
بسرعة..

(ثم بلهفة) جبتلي الحاجة؟

وليد: آ.. عندك بره..

يخرج خالد ويفتح الأكياس لنرى أكثر من عبوة  
ميكانو، يتفحصهم خالد بفرحة

خالد: شكراً يا ليدو..

وليد لازال في الغرفة، يبدو عليه الضيق وهو  
يقلب في أرقام الـ Redial علي الهاتف

وليد: بس ماتسيبش الشغل وتقعّد تلعب بقه..  
ما فيش وقت للعب

- قطع -



## منزل أميرة (المطبخ)

دنيا تزيل بقايا طعام من الأطباق وتضعها في  
الحوض حيث تغسل أميرة

دينا: أقولك الصراحة..  
ولو اني عارفة انك مش عايزة الصراحة دلوقت..  
أميرة: لأقولي بجد.. إنت شايقة إيه؟  
دينا: شايقة انك متاخدة له أكثر م لازم..  
أميرة (موافقه كأنها تنتظر التعليق): بالظبط.. هو  
ده.. أنا مش فاهمة إيه اللي شاددني ليه قوي كده..  
مع إنه ما بيحاولش يعمل أي حاجة تشدني..  
دينا: وليه ما تكونش دي طريقته؟  
الواد الغامض بقى اللي عايز واحدة تفك خزنة  
أسرار ه.. فاهمة انتي الجو ده؟  
أميرة (بعد لحظة تفكير): مش عايزة أفكر بالطريقة  
دي..  
دينا: إنت مش عاوزة تفكري أصلاً  
أميرة (تتصنع الضيق): يووه.. (ثم تتركها وتخرج  
من المطبخ) طيب كملي انت غسيل مواعين..  
دينا (مصدومة): إنت جايباني عندك تشغليني؟!

ترمقها أميرة باستغراب فتواصل

- قطع -



## جراج سيارات عمومي متعدد الطوابق

تخطو أميرة بين صفوف السيارات، تنظر في  
ساعتها، تضغط على ريموت سيارتها فتصدر  
السيارة أصوات الاستجابة المميزة مع أضواء  
الفلاشر.. عندما تصل أميرة إلى السيارة نرى  
معها بوكيه ورد أنيق مستقر على زجاج سيارتها  
الأمامي، تلتقط البوكيه وعلى وجهها شبح ابتسامة  
مترقبة..  
تقرأ الكارت.. تتحول ملامحها إلى الغضب  
العارم.. تتلفت حولها في حدة.. لا تجد أحداً..  
تضع البوكيه على الأرض وتركب السيارة، تدير  
المحرك وتفتح النافذة..

فجأة يطل يحيى من النافذة حاملاً البوكيه فتجفل ثم  
تتحفز

يحيى: ده بوكيه بمية وعشرين جنيه.. ترميه  
عالأرض كده؟!  
أميرة: إنت أسخف إنسان شفته في حياتي

يحيى يدير خده كأنه تلقى لكمة على وجهه

يحيى: أي... (ثم)  
ده جزائي إني عايز أقولك كل سنة وإنت طيبة  
بطريقة رومانسية؟  
إنت ناسية ان النهاردة عيد جوازنا ولأ إيه؟..  
ياه..  
الايام بتجري بسرعة.. لو كنا خلفنا كان زمان ابننا  
على وش مدارس دلوقت..

أميرة تضغط على دواسة البنزين فتصدر السيارة  
زئير محركها

أميرة (بغل): إبعد يا يحيى بدل ما طيرلك رجلك.. أنا  
هامشي..  
يحيى (بعد اكتر اثار): ده انت بقيتي عنيفة قوي..  
طب بدمتك.. البيت له طع من غيري؟  
(ثم وهو يداعب حلمة أذنها بإصبعه ويهمس  
كالفحيح)  
السريير ما بيشوكيش وهو فاضي؟  
ولا إنت بتعرفي تتصرفي؟

تنزل أميرة فرامل اليد فتنتطلق السيارة مخلفة  
صريراً حاداً، بينما يحيى استطاع أن يتفادى  
السقوط.. ينظر في أثر السيارة حتى تنعطف في  
نهاية الممر.. يبتسم ساخراً وفي يده بوكيه الورد..



يسير حاملاً إياه حتى يصل إلى صندوق قمامة  
كبير.. يطيح بالبوكيه داخل الصندوق.



## أمام منزل خالد + سيارة أميرة

أميرة متوقفة بالسيارة أمام باب المنزل.. يخرج خالد حاملاً كرتونة متوسطة الحجم ويتوجه إلى أميرة

خالد: افتحي شنطة العربية  
أميرة: إيه ده؟  
خالد: افتحي بس..

أميرة: مش تقوللي إيه ده؟  
خالد: حاجة كده مش عايزك تشوفيها إلا اما تروحي..  
أميرة (مبتسمة): ماشي..  
خالد: هانروح فين؟  
أميرة: أصلك حسيت انك طاير..  
وان ما فيش حاجة ممكن توقفك؟

تفتح شنطة السيارة، يضع فيها الكرتونة، يغلق الشنطة ثم يفتح بابه ويركب

ينظر لها خالد مستفسراً ولا يحر جواباً

- قطع -



## صالة تزلج على الجليد

خالد مرتدياً قبقاب التزلج، يتشبث بالعوارض الحديدية على أطراف الصالة ويحاول الحفاظ على اتزانه.. بينما أميرة من خلفه تتحدث وهي تدور منزلة بمهارة ورشاقة ظاهرة

خالد (مستاءً من موقفه): طائر إيه بس!  
ده أنا مش عارف اخطي خطوة واحدة..  
أميرة: ما تمشيش..  
عوم..  
(ثم تقترب مادة يديها)  
هات إيدك..

تمسك بكلتا يديه وتسحبه، هي تتزلج بظهرها وهو منساق بوجهه.. ويبدو عليه الاستمتاع بما يحدث

أميرة: إيه رأيك؟  
خالد: حلو قوي بس..  
لو سبتيني هاقع..  
أميرة: مش هاسيبك دلوقت.. وواحدة واحدة.. زق جسمك زقة خفيفة.. كأنك بتخطي في الهواء..  
خالد (يضحك من فرط انفعاله)  
أميرة: إيه؟ لسه خايف؟  
خالد (من بين ضحكاته): غريب.. غريب..  
أميرة (تفلت إحدى يديه): ياللاً..  
خالد (بجزع): ياللاً إيه  
أميرة: واحد.. اثنين.. ثلاثة

خالد (مفزوعاً): هاقع.. هاقع يا أميرة..  
أميرة: مش هاحصلك حاجة لو وقعت.. ما تخافش..

خالد: هاخبط في الإزاز  
أميرة: مش هيتكسر

الآن تفلت أميرة اليد الثانية، لينطلق بمفرده..  
توازنه يختل وهو يحاول جاهداً الحفاظ عليه،  
بينما هي تدور حوله دورات متتالية هي تضحك..

خالد لا يستطيع تغيير اتجاهه، فيتجه مندفعاً نحو الجدار الزجاجي

يتسارع خالد باتجاه الجدار، ويصبح ارتطامه وشيكاً.. وفي آخر لحظة تتلقفه أميرة من ظهره وتغير اتجاهه

خالد: هووف..



إخص عليكى بجد..

أميرة: بذمتك ما حستش انك طاير؟  
خالد: حسيت إنى اترميت فى الهوا..  
أميرة: طب خلىنا على مهلنا

أميرة: أوقات آجى هنا بالساعة والساعتين..  
ما عملش حاجة غير إنى ألف  
خالد: ما بنتعيبش؟  
أميرة: ما بفكرش فى التعب..  
ما بفكرش خالص فى أى حاجة..  
كل اللى باقى مركزة فيه إنى أفضل طايرة..  
ها.. أسيب بقه؟  
خالد (مفزوعاً): لا  
لالالالالال..

خالد (لانماً): شفتي؟ وقعت..  
أميرة: وماحصلش حاجة.. أنا معاك أهو..

أميرة: كفاية كده؟ تحب تخرج من هنا؟  
خالد (بتلقائية): لا.. خلىنا شوية..

تمسكه أميرة بيد واحدة، وتترلج بجواره فى دورة  
واسعة باتساع الصالة

دون انتظار إجابة.. تفلته مجدداً  
يحاول الحفاظ على اتزانة لكنه يفشل تماماً،  
ويسقط.. تلف حوله، تتوقف عنده وتساعده على  
النهوض

بعد أن ينهض

تنظر إليه ويبتسمان.. تشبك يدها بيده ويعاودا  
الانطلاق

- مزج -



## كافيه

كلاهما أمامه كوب عصير ، أميرة ترشف  
بالشاليموه رشفة أخيرة، ثم تخرجه، وتنظفه  
بمنديل، وتبدأ في عقده على شكل عروسة مثلما  
فعلت من قبل.. هذا يجري أثناء حديثهما

خالد: هو أكيد سخيـف..

لكن في الآخر جزء من سخافته دي إنه بيحبك  
أميرة: يحيى ما بيحبش.. كل الحكاية إنه ما عندوش  
استعداد يخسر حاجة كانت في إيدـه..  
أنا طلبت منه الطلاق بعد ست أشهر من الجواز.. ما  
طلقنيش غير بعدها بستتين.. لما خاف إنني انفذ  
تهديدي وأخلعه ويبقى منظره وحش قدام الناس  
خالد (باستغراب): تخلعيه؟  
أميرة: آ أخلعه.. إنت ما سمعتش عن قانون الخلع  
وللا إيه؟

خالد (مستدركاً وقد فهم مغزى الكلمة): إ.. آ..  
تطلقي نفسك منه يعني.. أصل إ.. كلمة ثقيلة شوية..  
تخلعيه..  
(مصطنعاً الضحك) هي هي.. (ثم مغيراً الموضوع)  
وهو يشير للشاليموه المعقود) إنت بتعملي البتاعة  
دي ازاي؟  
أميرة (تتأوله إياها مبتسمة): عاجباك؟ خدها..  
خالد: لا لأ.. عايزك تعلميني أعملها ازاي..

تسحب الشاليموه السليم من كوبه، وتنظفه بمنديل..  
وتعطيه له، ثم تبدأ في توجيهه وهو ينفذ

أميرة: اتتبتها مالنص الأول.. أيوة.. وبعدين تعمل  
مثلث صغير..  
لأ يبقو قد بعض..  
أيوه..

خد طرف من الاتنين ولفه عشان تعمل رقبة..  
وبعدين الطرف الثاني تلفه بالعكس عشان لما تعمل  
العقدة ماتفكش..

تبدأ في مساعدته، فتتماس أصابعهما

مع العقدة الأخيرة، يفلتان الشاليموه وتظل  
أصابعهما متشابكة الأطراف.. يبقى الوضع كذلك  
للحظة.. تلتقي خلالها أعينهما.. قبل أن يفيق خالد  
مرتبكاً

خالد: إ.. آ.. هاتمرن عليها في البيت و.. والمرة  
الجاية هاعملها لوحدي



## أمام منزل خالد

خالد وقد ترجل من سيارتها يحدثها قبل أن يغلق الباب

خالد: مانتسيش الحاجة اللي في شنطة العربية..  
أميرة: أول ما تطلع هاركن علي جنب وابص عليها..  
خالد: لأ.. في البيت..  
أميرة (مبتسمة): ماشي.. (ثم مداعبة) هي أكيد مش بارفان صح؟ الكرتونة كبيرة قوي..  
خالد (يضحك ثم): هكلمك بالليل..  
أميرة: هاستنى تليفونك.. باي..

يغلق الباب.. يلوح لها مودعاً.. تنطلق بسيارتها..  
يدخل العمارة.. بعد لحظة، تدخل سيارة وليد إلى الكادر، يترجل منها وعلى وجهه علامات الضيق وهو ينظر في إثر سيارة أميرة، ثم ينظر إلى مدخل العمارة

- قطع -



## منزل خالد ووليد (غرفة وليد + غرفة خالد + الصالة + الحمام)

خالد يجلس بسعادة على السرير في غرفته..  
يخرج الشاليموه المعقود من جيب الجاكت..  
يتأمل.. يسمع صوت باب الشقة، فينتفض ويخلع  
الجاكت ويتجه نحو طاولة الرسم ويضئ نورها  
متظاهراً بالعمل..  
يظهر وليد على باب الغرفة.. يتأمل خالد في  
صمت للحظة ثم..

وليد: أخبار الشغل إيه؟  
خالد: إ.. شغال.. جيت بدري يعني؟  
وليد: إنت كنت بره؟  
خالد (مدرِكاً أنه بملابس الخروج): إ.. آ.. نـ.. نزلت  
اتمشيت شوية.. حاسيت إنني عايز أ....  
وليد (يسحبه من ذراعه بهدوء): تعالى يا خالد  
عايز أوريك حاجة..

يخرجان من الغرفة..  
قطع على دخولهما لغرفة وليد..  
وليد يضئ النور، ويفتح دولابه، ويخرج  
صندوقاً، يجلس مع وليد على السرير والصندوق  
بينهما ويفتحه.. يخرج بروازاً مكتئباً أنيقاً به  
صورة لفتاة جميلة في العشرين

وليد: فاكّر دي مين؟  
خالد: إ.. لأ.. ماعرفهاش  
وليد (يذكره): حنان.. حنان العشري..  
مش فاكّر الاسم ده؟  
خالد (باستغراب): مين دي؟

وليد: دي اللي عملت مع خالد الشهاوي أكبر قصة  
حب في هندسة القاهرة.. سنتين بحالهم الكلية  
ماكلهاش سيرة غيركو..

مش مصدق، صح؟!

شوف الصورة دي..

خالد يبدو مصعوقاً  
وليد يخرج له بروازاً آخر به صورة لنفس الفتاة  
ومعها خالد هذه المرة..

تحب أقرألك جواب من جوابتها.. كل دي جواباتها..  
(ثم يقرأ بالفعل إحدى الورقات): حبيبي خالد.. أنا  
مش عارفة هي أجازة نص السنة أسبوعين فعلاً  
وللا عشرين سنة.. أكيد أنا مش واحشاك قد ما كنت

ثم يخرج مظروفاً كبيراً.. به كم كبير من الأوراق  
القديمة المكتوبة بخط اليد



واحشني.. طبعاً....  
خالد (يحاول إيقافه باعياء): أرجوك يا وليد كفاية..

وليد: بلاش حنان..  
أكيد بقه فاكر مريم.. خطيبتك  
خالد (غير مصدق): خطيبتي؟!  
وليد: آ.. قعدت أربع سنين ما يحصلكش حاجة..  
وقلنا يمكن العلاج الجديد جاب نتيجة.. والبنت قالت  
مش معقول ينساني بعد الحب ده كله..  
دي شبكتها.. اللي انت نفيتها بنفسك..  
خالد (منهاراً وقد بدأ في اللهاث كأنه يجري): وليد  
انت عايز تعمل في إيه؟!  
وليد: أنا مش عايز أجيب سيرة أمانتي.. ولا دعاء..  
ولا.. (ثم وهو يريه ساعة يد قديمة) بص، الساعة  
دي كانت من دعاء..  
خالد (صارخاً): وليد كفاية..  
وليد (يصرخ بدوره): ماتقول لنفسك..  
كفاية دول.. إنت دلوقت الـ Loss  
بتحصل لك بمعدل مرة كل سنة أو سنة ونص..  
يعني كلها كام شهر، وأميرة بالنسبة لك تبقى واحدة  
من المرميين في الصندوق ده.. هتبقى ولا حاجة..  
وليد: يا أخي يولع الشغل.. إنت مش محتاج الشغل  
في حاجة.. ورصيدك في البنك يعيشك مبسوط عمر  
طويل..  
لكن هي ذنبها إيه؟  
هتخرج من علاقتها معاك بايه؟

فكر ولو لحظة في حالتها لما تقابلك في يوم، وشك  
يقرب ألوان، وتقولها آسف.. أنا ماعرفكيش..  
فوق بقه.. فوق..

وليد لا يتوقف، ويخرج بروازاً آخر.. هذه المرة  
به صورة خطوبة رسمية تضم خالد وفتاة أخرى

يخرج طاقم حلي ذهبية ويفتحه ويريه لخالد

وليد يواصل إخراج المتعلقات من الصندوق..  
أقلام.. دباديب.. صور

يتركه خالد ويخرج إلى الصالة فيلاحقه

يندفع خالد باتجاه الحمام.. يغلق الباب على نفسه..  
يجلس على مقعد المراض دافساً رأسه بين  
ذراعيه وساقيه مقرصاً وهو يلهث..



## منزل أميرة

في الريسبشن، أميرة وصلت لتوها، معها  
الكرتونة، تضعها علي الطاولة وتفتحها، تخرج  
منها بيت ميكانو رائع التكوين، أبيض بالكامل..  
السعادة تغمر وجهها.. تضع البيت بعناية علي  
الطاولة، وتلتقط منه ورقة صغيرة، تقرأها  
ونسَمعها بصوت خالد وبعد قراءتها تتنهد بنشوة

ص. خالد: مابيحطوش قطع بيضة في الميكانو قد  
القطع الملونة.. جمعتك البيت ده من حذاشر علبة..

- قطع -



## غرفة خالد

خالد يجلس القرفصاء على سريرته، الغرفة مظلمة، ووليد واقف على بابها.. خالد ينظر تجاهه في حيرة واستسلام

خالد: أعمل إيه؟

وليد (نبرته بها كثير من الحنان الأبوي): ماتعملش حاجة.. ماتمدش إيدك على سماعة التليفون.. ما تفتحش الباب.. أسبوعين ثلاثة بالكثير.. والموضوع هيخلص لواحد..

خالد (يحاول الاعتراض): لكن أميرة...

وليد (بحسم): مالاكنش..

اللي باقوله لك هو الصح.. ليك.. وليها.. هتتعب شوية.. هي هتتعب شوية.. وبعد كده هتعديك وتعيش حياتها..

وانت هتتساها..

مش بمزاجك (ثم بعد لحظة صمت)

نام دلوقتي وبكرة نشتغل.

يغلق وليد باب الغرفة.. يبقى خالد بمفرده حائراً في الظلام

- قطع -



## فوتومونتاج

أ- ليل، أميرة في المنزل تضع البيت الأبيض بموقع بارز في الريسبشن، تتأمل به بحب، تغير موضعه أكثر من مرة، وتنتظر إلى التليفون باستجداء

ب- ليل، خالد في غرفته، ينظر إلى التليفون بخوف وتردد.. ثم يخرج من الغرفة

ج- قطع إلى غرفة وليد، يفتح الدولاب ويخرج الصندوق.. قطعات حادة لخالد يخرج الصور والهدايا والخطابات ويقرأها، مع قطعات حادة تتخللها لمواقف مع أميرة

أميرة: ألو..

خالد: لازم اشوفك بكرة

ص. أميرة: أنا كمان كنت عايزة أقولك كده..

ص. خالد: بس أنا اللي هاقول أنا عايزك في إيه الأول..

ص. أميرة: مش مهم مين اللي يقول الأول.. المهم اننا نقول..

ذ- ليل، أميرة نائمة علي كنية في الريسبشن بجوار التليفون.. التليفون يرن فتد فوراً

هـ- قطع إلى خالد في غرفته يتحدث في الهاتف

و- نهار، أمام منزل خالد، سيارة أميرة تتوقف، وخالد يخرج من الباب ويتوجه نحوها

ز- نهار، أميرة وخالد في السيارة، التي تنعطف من شارع رئيسي إلى شارع جانبي

ح- نهار، السيارة خالية ومركونة أمام كافييه

- مزج -



## كافيه

أميرة وخالد متوجهان بينهما الطاولة.. هو يبدو عليه الإعياء، وهي منتشية تماماً

خالد: مش عارف البداية الصح للكلام ممكن تكون فين..

ويمكن مش صح إني أتكلم أصلاً

أميرة (برجاء): لأ اتكلم..

ده انا ماصدقت إنك تبقى عايز تتكلم..

خالد: !....

أميرة: خليني اساعدك..

خالد (مشفقاً): مش هتعرفي..

أميرة: متهيا لك..

أنا مش هاضحك علي نفسي وأقول اني مش فاهمة

احساسى ده.. أنا يمكن مستغرباه.. مش مصدقة إنه

يتمكن مني بالسرعة دي.. لكن متأكدة إنه موجود..

وحقيقي.. خالد أنا....

يقاطعها بوضع أطراف أصابعه على شفتيها

خالد: استنى.. (ثم بعد تنهيدة عميقة) احنا لازم

مائشوفش بعض تاني ولا نتكلم تاني..

أميرة ملامحها تتحول إلى الذهول التام

أميرة (بصوت مختنق): فيه إيه؟!

خالد: فيه إني مش طبيعي.. مش بني آدم طبيعي..

يوم ما شفتيني صدفة في عربية وليد، وقتليني إننا

اتقابلنا قبل كده، واتكلمنا، وحاولتي تفكريني بنفسك..

أنا كنت فعلاً أول مرة أشوفك.. فعلاً ماكنتش

فاكرك.. ولحد الوقت مش فاكر إني كلمتك قبل اليوم

ده..

أميرة (تبرر في حيرة): !.. أيوة.. يعني.. !.. بتنسى

الوشوش والأسامي و..

خالد (مقاطعاً ليعفيها): بانسى كل حاجة.. كل

حاجة.. فجأة باصحي مالنوم ماعرفش عن نفسي

وعن اللي حوالياه وعن الدنيا غير اللي حصل من

أربعة وعشرين سنة..

باصحي مالنوم عيل عنده خمستاشر سنة..

باصحي ألاقي وليد اخويا راجل كبير ماعرفوش..

باصحي أجري على أوضة ماما، اللي ماعرفش انها

ماتت من أيام ماكنت في الجامعة..

وفي يوم قريب.. يمكن بعد شهور قليلة، هاصحي

مالنوم مش فاكرك تاني..

أميرة تصيبها حالة إنكار فتضحك هستيرياً بشكل متقطع

أميرة: !.. إيه ده؟.. إنت أكيد بتهرج، صح؟!

إنت إنت معاك كاسيت؟ بتسجل؟!



عايز تشوف أنا هقول إيه؟  
مقلب صح؟! مقلب..

لحظة صمت تنشبث به عيناها راجية بينما هو  
حائر تماماً ثم

خالد: ولید كان رأيہ إنی اختفی.. من غیر مقدمات  
أو أذار.. بس أنا ما قدرتش أعمل ده.. من حقك  
تعرفی انا اختفیت لیہ.. عشان لو شفتك فی أي يوم  
بعد كده وودیت وشي الناحية الثانية، ماتكرهیش  
الاحساس الحقيقي اللي كنت حاسة بیه دلوقت

أميرة مازالت منكرة، لكن النبرة هذه المرة تشوبها  
العصبية والهجوم..

أميرة: لیہ.. لیہ تتعب نفسك وتآلف الـ.. الحكاية  
المعقدة دي؟! ما.. ماتقول إنك مش عايز ترتبط..  
أقوللي بصراحة إن فيه واحدة ثانية.. عادي..  
عادي يعني.. مش هاز عل قوي يعني.. إنت.. إنت  
إنت..

خالد (يقاطعها ممسكاً بيدها): أنا مش هاعرف  
أشرح أكثر من كده.. يمكن لأنني مش فاهم أكثر  
ماللي قلته..

- مزج -



## فوتومونتاج

ص - خالد: مش عايزك تصدقيني دلوقت.. فكري واسألني.. ولما نتأكدي مالي قولتهولك.. إنسي كل حاجة

ص - أميرة: رايح فين؟

ص - خالد: هاعرف أروح..

ص - أميرة: إنت فعلاً عايزنا ننسى بعض؟

ص - خالد: أنا مش عايز ده يحصل غصب عني..

ص - أميرة: إيه ده؟

ص - خالد: ده تليفون دكتور

ص - خالد: هو اللي متابع حالتي من يوم ما بدأت وهو اللي هياكدلك إنه مش مقلب

ص - خالد: مع السلامة يا أميرة

أ - أميرة بمفردها على الطاولة، وأمام المكان الذي كان يجلس فيه خالد ورقة صغيرة

ب - قطع نهار، خالد يسير في الشارع

ج - قطع، خالد يركب تاكسي

د - قطع، خالد يفتح باب منزله ويدخل

هـ - قطع، خالد في غرفة ولید يفتح الصندوق

و - قطع، أميرة مازالت في الكافيه تلتقط الورقة الصغيرة وتتنظر فيها

ز - أميرة تخطو في طرقات المستشفى الذي يعمل في عبد الحميد

ح - الشاليموه المعقود على قمة الأغراض في الصندوق الذي يغلقه خالد

- قطع -



## غرفة د. عبد الحميد في المستشفى

عبد الحميد: the Short memory Loos  
ده الإسم العلمي اللي ممكن تدوري عليه في  
المراجع والنشرات الطبية عشان تفهمي بالظبط  
خالد عنده إيه..

د. عبد الحميد خلف مكتبه وأميرة أمامه تستمع..

- قطع -



## منزل أميرة

ص - عبد الحميد: معناه فقدان الذاكرة قصيرة المدى الذي يتكون بعد تلف معين يحصل للمخ.. يعني في حالة خالد، من وقت العملية التي عملناها وهو عنده خمستاشر سنة.. علي فكرة حالة خالد مسجلة في دوريات كثير.. لأنها مالحالات النادرة جداً في المرض ده..

أميرة أمام اللاب توب، على جوجل، إسم المرض مكتوب على مستطيل البحث، والسهم يضغط Search، علامة التحميل أسفل الشاشة.. أميرة تتصفح.. وعندما نعود للشاشة، نرى إحدى الصفحات تتصدرها صورة "خالد" الصبي وجواره كلام كثير

- قطع -



## غرفة د. عبد الحميد بالمستشفى

على وضعية مشهد 79

أميرة: إزاي؟

عبد الحميد: المصابين بالمرض ده غالباً بيكونوا  
اتعرضوا لحادثة.. وأقصى مدة للذاكرة القصيرة  
عندهم بتبقى عشرين دقيقة.. فيه بعض الحالات  
بتبقى عشرة أو خمستاشر ثانية بس..

لكن التلف حصل لخالد نتيجة عملية جراحية.. وده  
خلاه في أضيق الحدود.. عشان كده فقدان الذاكرة  
كان بيحصل له كل كام سنة..

صحيح مع كبر سنه المعدل بقى أسرع، ووصل  
تقريباً لأقل من سنة في كل مرة

الكاميرا تقترب من أميرة المستمعة بـ track in  
هادئ

ص - عبد الحميد: بس مازال يقدر يعيش حياته إلى  
حد مافي إطار الطبيعى.. من غير ما يحتاج إنه يبقى  
تحت إشراف طب كامل أربعة وعشرين ساعة..

فلاشات نرى من خلالها خالد في أوقات مختلفة،  
بالحفلة الأولى، في اللقاء الثاني عند العرب..  
وهكذا..

يعني من غير ما يتحجز في مصحة..  
أميرة (كانها تحدث نفسها): بس ده من كام شهر  
عمل ديزاين هندسي عيقرى.. إزاي يعمل ده  
وهو....

نعود بقطع إلى عبد الحميد موضحاً

عبد الحميد: ليه المكفوفين بيسمعوا أحسن من الناس  
اللي بصرهم سليم؟  
ربنا خلق فينا القدرة عالتعويض.. وإذا كانت عاهة  
خالد إنه بينسى، فالتعويض بتاعه إن بيستوعب  
أسرع ما الإنسان العادي.. اللي ممكن تفهميه أو  
تحفظيه في يوم، ممكن ماياخدش منك أكثر من  
ساعة..

فلاشات نرى فيها خالد طفلاً وصبياً في مواقف  
مختلفة يصنع بيوتاً من ميكانو - ورق - علب  
سجائر - صناديق - ونختمها بصناعته للبيت  
الأبيض وهو كبير

ص. عبد الحميد: زائد إنه أصلاً كان موهوب في  
المعمار، وإدراكه للموهبة دي واستخدمه ليها كان  
سابق للعملية بكثير.. يعني كان جزء من الثوابت في



ذاكرته

نعوذ بالله عبد الحميد وأميرة

عبد الحميد: مش محتاج لأكثر من الدراسة ومعرفة  
النظريات العلمية عشان يطبقه بشكل عملي

- قطع -



## شركة ماجيكال (استقبال + صالة المكاتب)

ص. عبد الحميد: وطبعاً.. كل ده كان مستحيل  
يتحقق تقريباً، لولا وليد أخوه..

وليد يدخل إلى الشركة، ويحيى السكرتيرة بإيماءة  
ويتجه نحو صالة المكاتب..

كريم: ول.. كنت لسه هاستعجلك..

وليد: فيه إيه؟

كريم (متخابثاً): ضيوفك مستنيين من بدري يا  
معلم..

بمجرد دخوله إلى صالة المكاتب يستقبله كريم

يبدو علي وليد عدم الفهم.. وعندما يقترب من  
مكتبه يرى خلف ال Partition أميرة جالسة عليه  
تلهو بالطائرة الخشبية اللعبة في رثابة.. وعندما  
تراه يتعلق نظرها به للحظة صامتة.. يبدو عليها  
الإنهاك.. ثم

أميرة: خالد قال لي على كل حاجة..  
كريم (منسحباً): طب إ.. أخلع أنا بقه عشان  
الخصوصيات وكده.. ها..  
وليد (لأميرة باقتضاب): مش هانفع نتكلم هنا..

- قطع -



## سيارة وليد

وليد يقود سيارته وبجواره أميرة

**وليد:** إنت عايزة إيه؟  
**أميرة:** عايزة أصدق..  
**وليد:** هتفرق في إيه؟!  
 عرفتني واحد واتعلقتي بيه وبعدين سابك..  
 ليه وازاي؟؟  
 أي تفاصيل مش مهمة.. لأن النتيجة واحدة  
**أميرة:** الموضوع مش بالبساطة دي ياباشمهندس  
**وليد (بشئ من التهكم):** مم.. الموضوع مش  
 بالبساطة دي..

يضغط الفرامل، ويوقف السيارة على جانب  
 الطريق ويلتفت لأميرة كلياً وهو يطلق كلماته  
 كطلقات رصاص..

**وليد:** إنت عايزة إيه بجد؟!  
 عايزة حد يكذبك اللي انت عرفتته.. حد يقولك إن  
 خالد إنسان طبيعي.. وإنه مش ممكن ينساكي مهما  
 حصل.. للأسف.. أنا مش الحد ده..  
 فيه حاجات مابنصدهاش إلا أما نشوفها بتحصل  
 قدام عينينا.. وساعات حتى بنكذب عينينا..  
 أنا بقى شفت ده بيحصل قدامي بدل المرة عشر  
 مرات.. وما بقتش قادر أكذب عينيه..  
 كل اللي قدرت أعمله إني كذبت عالناس.. خليت  
 خالد يوهمهم إنه طبيعي بجد.. وخليتهم يصدقوا ده..  
 دلوقتي إنت عايزة تصدقي الوهم..  
**أميرة (بمزيج من الضيق وعدم الفهم):** إنت ليه  
 بتكلمني بالطريقة دي؟! ليه عايز تحسني إني  
 غلطانة أو مذنبة أو...  
**وليد (يقاطعها بعنف):** لأن دي الحقيقة..  
 خالد من ساعه ما قابلك مش عارف يشتغل.. دخل  
 في دوامة بقالني سنين بابعده عنها..  
 لكن انت ماخلصكيش.. وفضلتي وراه لحد.....

يصمت فجأة ويشيح بوجهه وبعد لحظة

**أميرة:** لحد إيه؟  
**وليد (مختنفاً):** لحد ماحبك.. استريحتي؟!  
 لكن إيه اللي يحصل بعد كده؟

- مزج -



## فوتومونتاج

ص. وليد: أنا خايف علي خالد.. بس في الآخر أي حاجة هاتحصل له مش هأكون باشوفها لأول مرة.

ص. وليد: أول مرة دي بتوجع قوي.. صدقيني مش هستحملها..

ص. أميرة: مهما كان اللي بيحصل له.. هيفضل خالد..

ص. وليد: خالد ثاني.. خالد تايه..

ص. وليد: عمرك تصورتي انك تصحي من النوم تبصي لنفسك في المراية.. ما تعرفيش إنت مين؟.. عيشي حياتك أحسن..

أ - أميرة تنزل من سيارة وليد وتغلق الباب

ب - أميرة تقود سيارته

ج - وليد يقود سيارته

د - ليل، خالد نائم في سرير مقرفصاً ووليد يغطيه

هـ - ليل، أميرة تنظر لنفسها في مرآة الحمام بمنزلها

أميرة تغلق أباجرة المرأة فتظلم الشاشة

- قطع -



## طرقات سريعة

عدة لقطات لوليد منطلقاً بسرعة علي دراجته البخارية، آخرها لقطة يغيب فيها بعمق الكادر

- قطع -



## هضبة المقطم

وليد ممدداً علي ظهره، بصره معلق بالسماء..  
نفتح الكادر لنجد بجواره فتاة تبدو عاهرة،  
والدراجة البخارية مركونة.. وبعد لحظة.

الفتاة: احنا هنا بنعمل إيه؟  
وليد (دون أن يحول نظره عن السماء): قاعدين  
لوحدنا..

الفتاة: بقالنا ساعة ونص عالحال ده..  
وليد (بحدة): إنت مش اللي طلبتيه خدتيه؟!  
الفتاة (بحدة مماثلة): وكنت جاييني ليه أصلاً؟!  
وليد: كنت عايز أتكلم مع حد ماعرفوش..  
الفتاة (بلين): طب ما تتكلم..

وليد: ماليش نفس.. وبعدين شكلك مش هتفهمي  
حاجة

الفتاة (بلهجة احترافية): جرب..

وليد: أجرب..  
أنا باهد حياة أخويا بايدي.. عشان احافظله عليها..  
فهمتي حاجة؟

الفتاة (مصدومة): ده الكلام اللي عندك؟  
وليد: بقولك إيه.. لو زهقتي امش رّوح..  
الفتاة (بحدة): أروّح ازاى مالحطة دي؟!

وليد: تعالي..

ينهض وليد فجأة ويجذبها من ذراعها لتنهض معه  
يقودها نحو الطريق الهابط..  
سيارة بها مجموعة شباب تقترب يشير لها وليد أن  
تتوقف، وعندما تركن السيارة

وليد: آ يا شباب.. ممكن تاخذو المدام توصلوها  
وانتو نازلين..  
أصل طلعت معايا غلطة..  
الشاب: صباح الفل.. قوي قوي..

وليد: ياللاً بالسلامة..  
حسابها خالص ها..

أحد الشباب يفتح الباب الخلفي  
وليد يدفع الفتاة لتركب تنطلق السيارة فينادي في  
إثرهم يعود إلى حيث دراجته.. خطواته يأنسه..  
يجثو على ركبتيه.. ينظر إلى السماء.

- قطع -



## شركة IMC (استقبال + غرفة أميرة)

تدخل أميرة إلى الشركة واجمة..  
يبدو عليها الانهالك وعدم النوم والاكتئاب الشديد..  
بمجرد رؤيتها تلاحقها السكرتيرة غير مصدقة..  
لكن أميرة لا تتوقف متجهة إلى مكتبها

السكرتيرة: مدام أميرة.. مش ممكن..  
حضرتك..

مستر طلعت عابزك ضروري..  
ووالدتك ستأل عليكى كثير جداً..

...  
أميرة (وهتفتح باب مكتبها): خلاص خلاص..  
ابعتيلي قهوة..

تلقي بحقيبتها، ثم تلقي بنفسها خلف المكتب  
جالسة، تدفن وجهها بين كفيها.. لحظات وتدخل  
دنيا..

دينا: فيه إيه؟! ثلاث تيام ماحدش عارف يجيبك؟!!

ترفع أميرة وجهها.. عيناها  
محتقتان بالدموع.. تنظر إلى دنيا في صمت..

- قطع -



## غرفة خالد

خالد مازال يعمل.. يقترب وليد ويرى ما أنجزه..  
يبدو عليه الارتياح

وليد (مربّأ على كتفه): ميه ميه.. هو ده الشغل..  
(ثم مداعباً) ملك الديزانيات رجع ثاني..  
خالد (بصوت جاف): كويس

وليد (متهرباً): نطلب أكل بقه

يرفع خالد وجهه وينظر له تستمر النظرة طويلاً..  
يطيلها الصمت أكثر.. حتى لا يحتمل وليد  
يخرج وليد.. يلقي خالد بنفسه على السرير ممدداً  
على ظهره.. يغمض عينيه

- قطع -



## أمام منزل خالد ووليد

سيارة وليد مركونة..  
وليد يخرج من العمارة مرندياً زي العمل.. يركب  
السيارة ويدير محركها وينطلق.. لحظات لتدخل  
بدلاً منها سيارة أميرة.. وتركن في نفس المكان..  
تنزل أميرة من السيارة.. وتدخل العمارة..



## منزل خالد (غرفة خالد + الصالة + بسطة السلم أمام الباب)

- خالد نائم في سريره..  
يستيقظ على صوت جرس الباب يجلس على  
السريير في حيرة..  
يخرج إلى الصالة.. يقترب من الباب ثم يتراجع
- صوت جرس الباب..  
يتكرر.. بالحاح..  
ثم صوت طرقات  
ص. أميرة: خالد.. افتح يا خالد..  
افتح يا خالد أنا أميرة..
- أميرة: خالد افتح أنا عارفة إنك جوه  
خالد افتح..
- ص. أميرة: خالد أنا رحت للدكتور عبد الحميد..  
كلمته وكلمت وليد..  
أنا فهمت اللي قولتهولي..  
خالد عايزاك تفتح أرجوك..
- أميرة (صوتها يخنق): افتح يا خالد أنا بحبك..  
باحبك يا خالد ومش مهم اللي هيحصل بعد كده..
- خالد انت سامعني..  
أنا عارفة أنك سامعني..  
خالد افتح بقه.. افتح عشان خاطري..
- يذاها تكلان وتكاد تبكي
- تنهار جالسة علي بسطة السلم المواجهة للباب..  
تلهث من فرط المجهود والحزن..  
جسدها ينتفض.. وبعد لحظات.. يُفتح الباب ببطء..  
تنظر إليه برجاء..  
يفتح الباب عن آخره ويظهر خالد واقفاً خلفه..  
يتبادلان نظرة واحدة طويلة..  
وبعد صمت كثير
- خالد: وأنا كمان باحبك

- قطع -







## شركة ماجيكال (مكتب د. جلال)

جلال خلف مكتبه، يبرم الـ Plan الهندسي راضياً  
ويعطيه لوليد الجالس أمامه.. ثم يبيل أصابع  
بقصصات في مج شاي موضوع أمامه ويأكل أثناء  
الحديث

**جلال:** تمام  
**وليد:** والدوسيه فيه تسعير المباني والمعدات..  
متهيألي هيكون أحسن سعر..  
**جلال:** ده لازم يكون كده..  
أخبار الالكتروميكانيكال إيه؟  
**وليد:** هيبندوا يشتغلوا مالنهارة..  
في خلال أسبوعين بالكثير..  
**جلال (مقاطعاً):** عشر تيام يكون المشروع جاهز  
للمناقصة.. ده Dead Line  
**وليد:** ربنا يسهل..  
**جلال:** هيسهل لما نحرق نفسنا في الشغل..  
بُص.. فهم التيم اللي شغال معاك إن كل واحد  
هيبقاله شهرين مكافأة لو المناقصة دي رسيت  
علينا..  
**وليد (بابتسامة مضطربة):** OK..  
**جلال:** وطبعاً بالنسبة لك إنت وخالد..  
**وليد (يقاطعه):** أنا... (ثم يصمت)  
**جلال (يحثه):** إيه؟  
**وليد:** أنا محتاج أجازة..  
**جلال (بأريحية):** أجازة أسبوع على حسابي الخاص  
في أحسن حنة في مصر.. بس اللي في دماغ  
يحصل..  
**وليد:** أنا محتاجها دلوقت  
**جلال (يكفهر وجهه):** إنت هاتستعبط؟!  
**وليد:** أنا باتكلم جد يا دكتور.. محتاج أجازة فعلاً..  
**جلال (بضيق حقيقي):** يعني انا اللي باهرج..  
مافيش جنس مخلوق هياخد يوم واحد راحة الا  
ماتخلصوا..  
روح شوف شغلك بقه ماتعكر ليش دمي..  
**وليد (منسحباً مائطاً شفتيه بيأس):** OK

- قطع -



## سلم وسطوح عمارة خالد

على بسطة السلم أمام باب شقة خالد المغلق.. أقدام فتاة صغيرة (13 سنة) تقفز صاعدة على السلالم في خفة..

الباب يُفتح، ليطل منه خالد الصبي (15 سنة)، يتأكد أن لا أحد في السلم غير الفتاة التي يرى طرف ثوبها من بين أعمدة الدرابزين يصعد في إثرها بخفة، ومن حين لآخر ينظر إلى أعلى.. حيث ضوء ساطع قادم من السطح.. يعبر خالد باب السطوح.. الفتاة تسند يديها على السور وتطل إلى الشارع في الأسفل بحذر..

يقترّب خالد من خلفها بخفة.. يضع يده على يدها.. الفتاة لا تجفل.. تغمض عينيها وتبتسم في انتشاء.. تحتضن يده بيدها..

يجذبها باتجاه منعطف في السطوح.. ركن خلف بناء "الشخسينة".. وهناك تفاجأ ببناء خشبي صغير، في طول قامتيهما.. ألوانه زاهية جميلة، وتصميمه أخاذ، له باب مغلق بشنكل، يفتح خالد الشنكل ويسحب الباب.. لنرى مقعدين صغيرين، وطاولة صغيرة عليها طبق مغطى، بالداخل أيضاً زينات وبالونات ملونة..

يدخلان ويجلسان.. الفتاة تضحك غير مصدقة.. خالد يكشف الغطاء لنرى تورتة صغيرة بها شمعة واحدة.. يخرج كبريتاً من جيبه ويضئ الشمعة.. الفتاة تضحك في سعادة غامرة..

ثم يسحب من تحت مقعده كرطونة، يخرج منها طبقين صغيرين وشوكتين وسكين.. ضحكاتها تزداد، ويبدو أنها يغني..

ص. خالد (الكبير): كان أول عيد ميلاد ليها واحنا بنحب بعض..

الفتاة تنتفخ في الشمعة لتطفئها

ص. خالد: ياريت تكون لسه فاكراه

- مزج -

خالد وأميرة جالسان داخل الكوخ الخشبي.. بالطبع يضيق بهما.. صار قديماً للغاية.. زالت الألوان.. رماد الزينات على الأرض، والبالونات فارغة



أميرة: مافيش بنت في الدنيا ممكن تنسى حاجة زي دي..

خالد يخرج من الكوخ ويساعد أميرة على الخروج (طبعاً يجب مراعاة اختلاف شكل السطح.. الدش مثلاً)

خالد: بعدها بأسبو عين عملت العملية..

أميرة: ماسألتش عليها؟

خالد: مش عايز اسأل.. ويمكن أكون سألت قبل كده ونسيت اللي عرفته.. مش مهم.. كفاية إنني أفضل فاكّر اليوم ده من غير ماحد يحكي لي عنه.. (ثم وهو يخبط بيده على الكوخ مبتسماً): بس إيه رأيك في البنيان؟ متانة وقوة وتحمل.. شوية بوية وتنضيف ويبقى كأنه معمول امبارح..

تضحك.. يتجهان نحو السور..

الوقت يتجه نحو الغروب..

تستند على السور بيديها وتنظر إلى أسفل.. تتسلل يده تجاه يدها.. يلمسها..

تضع يدها على يده.. تحتويها..

تغمض عينيها في سعادة..

الهواء البارد يبعثر خصلات شعرها..

- مزج -

على السلم أمام باب الشقة، خالد وأميرة ينزلان.. نلاحظ أن الباب مفتوح

خالد (منتبهاً): يا خبر..

أنا يظهر نسيت الباب مفتوح..

وليد: لأ.. أنا اللي سايبه.

خالد (مرتبكاً): وليد... إ.. إحنا.. كنا...

وليد (يقاطعه): اتغديتو.. وللا أطلبلكو

دليفري معايا؟

يفاجئهما خروج وليد من خلف الباب

خالد وأميرة يتبادلان نظرات غير مصدقة

- قطع -



## منزل خالد ووليد (الصالة + غرفة خالد)

على طاولة الطعام، وليد يترأس المائدة وأميرة  
وخالد متواجهان.. أكياس الديلفري وأطباق وهم  
يأكلون..

خالد: الكاتشب خلص؟

وليد (يخرج عبوة من أحد الأكياس): لأ.. فيه أهو..  
أميرة: إنتو دايماً بتجيبوا أكل جاهز بقة..

وليد: يعني.. فيه ست بتجيلنا كل جمعة تنضف  
البيت، وتطبخ أكل يقعدله يومين ثلاثة.. وبعد كده  
بنقضيها..

أميرة (لخالد بعدما لاحظت معاناته مع الكاتشب):  
هات هات..  
أميرة: أوو..

أميرة: عاملة نفسي أم العريف.. (ثم تناول العبوة  
لخالد) معلش بقة نص الكيس راح..  
وليد (ناهضاً): أنا هاعمل شاي (لأميرة) ليكي فيه؟  
أميرة: آ.. يا ريت..

خالد: إيه اللي بيحصل ده؟

أميرة: مش عارفة.. بس أنا مبسوفة قوي..

ص. وليد من المطبخ: المواعين يا خالد..

ماتزو غش..

خالد (ناهضاً محرجاً مبتسماً): دوري النهاردة في  
المواعين و... هي هي..

تأخذ العبوة وتفتحها بأسنانها فينفجر الكاتشب على  
وجهها

يضحك خالد عليها، ووليد يبتسم من طرف خفي،  
بينما هي تنظف وجهها بمنديل ورقي

يذهب وليد إلى المطبخ، ويتبادل خالد وأميرة  
النظرات.. هما سعيدان ومندهشان

يذهب خالد إلى المطبخ بدوره، وتبقى أميرة  
بمفردها.. تنظر تجاه باب غرفة خالد، تسمح يديها  
بمنديل، وتنهض متجهة إليها، تفتح الباب وتضيئ  
النور..

تندesh من التكوين الغريب للغرفة.. الملاحظات  
المدونة في كل مكان وعلى كل شيء، الدولاب  
الضخم المقسم إلى أرفف وأدراج وضرف  
كالمكتبات العامة.. المكتب المكس بكتب دراسية  
وهندسية، الصور.. كل شيء غريب.. تتجه نحو

الدولاب، تفتح ضرفة "الشغل"، تأخذ أحد



الأظرف.. وتفرغ محتواه من صور وملاحظات..  
وليد يظهر على باب الغرفة.. بعد مراقبتها للحظة

**وليد:** اتفرجي براحتك.. بس لازم كل حاجة ترجع  
مكانها ثاني..

**أميرة:** إ.. أ طبعاً.. (ثم)

إنت اللي عملت كل ده؟

**وليد (مهنئاً):** لما تبصي للأوضة مرة واحدة،

تحسي إنه كان مجهود خرافي..

بس الحقيقة إنه اتعمل بالتدريج.. يمكن سنتين لحد ما

وصل للشكل ده..

أميرة الآن تدرك تماماً دور وليد في حياة خالد..  
وتفهم تماماً موقفه الراض لوجودها في البداية..  
كل هذا يظهر في نظرتها الصامتة السريعة له قبل  
أن تتكلم

**أميرة:** وليد إ..

أنا فكرت كتير جداً قبل ما....

**وليد (مقاطعاً):** خلاص مش مهم..

هو اختار انه يقولك..

وإنت اختارتي إنك

تيجي وتكملي..

(ثم بعد لحظة صمت)

أحطلك نغاع في الشاي؟

**أميرة (بابتسامة مندهشة):** OK

- قطع -



## سيارة أميرة في طريق غير مزدحم

السيارة تسير وأميرة تتحدث في الموبايل بضيق

أميرة: معقول يا ماما؟!  
معقول لسه عندك طاقة تناقشينني في الحكاية دي؟!  
كلام جديد إيه اللي أسمعاه؟!  
أنا مش قادرة اصدق.. فعلاً مش قادرة أصدق..  
بصي.. لازم أقفل دلوقت عشان داخله على حته  
زحمة.. باي..  
(تنزع السماعة عن أذنها بضيق)  
هفففف..  
يعلو صوت أغنية من كاسيت السيارة

طبعاً السيارة تسير بيسر ولا يوجد زحام..  
تعلي صوت الكاسيت

- قطع -



## أمام منزل أميرة

تصل سيارة أميرة، تركنها بجوار العمارة وتنزل منها.. تعبر المدخل الذي يجلس عنده "خميس البواب" لا تنتظر رداً، وهو لا يرد، لكنه يرمقها من طرف خفي.

أميرة (بشكل روتيني): إزيك يا عم خميس..

- قطع -



## ريسبشن منزل أميرة

تفتح أميرة الباب، لتفاجأ بـ " يحيى " يجلس براحته في الانتريه، ممدداً ساقيه على الطاولة.. بيده كائز بيرة ويضحك على شئ ما في التلفزيون.. أميرة تُصفق تماماً لكنه يعالجها باستخفاف

يحيى: إيه التأخير ده؟!

ساعتين استناكي؟!

أميرة (مذهولة): إنت دخلت هنا إزاي؟!

يحيى (بابتسامة لائمه): عيب لما تسألني سؤال زي

ده.. (ثم) ماما قالتلي إنك ماعرفتيش تكلمي معاها

كلام وإنت سايقة ف... (ثم يشير لها بالجلوس)

ماتقدي، واقفة ليه؟

لاحظ أن أميرة لم تتبعد عن باب الشقة كثيراً.. ولم تغلق الباب أصلاً..

أميرة (غير مصدقة): بجد بجد.. نفسي افهم حاجة..

يحيى (معتدلاً في جلسته): أيوه كده..

تسأليني.. أفهمك..

نفتح حوار..

أميرة (كانها لم تسمعه): هو مافيش غيري في

الدنيا؟!

إنت راجل ليك مركز ومعاك فلوس وشيك.. وأي

واحدة ماتعرفكش تتمنأك..

يحيى (بعد ضحكة ساخرة قصيرة): هاعتبر إنها

مجاملة لطيفة، وهاطنش التهزيق اللي فيها.. (ثم)

طبعاً الدنيا مليانة حريم..

بس بما إنك عارفاني، فأكيد عارفة إنني مابحبش

التغيير..

أميرة (بغضب): وانت أكيد عارف إنك لو كنت

الراجل الوحيد اللي فاضل في ال....

يحيى (يقاطعها وهو ينهض): مابلاش كلام

المسلسلات ده وخلينا عمليين.. الدنيا مليانة رجاله

برضه..

إحنا سابيين بعض بقالنا سنة ونص تقريباً.. ماخبيش

عليكي، وقت ماكنت مصممة عالطلاق، كنت فاكـر

إن فيه حد ثاني.. لكن بعد ما الفترة دي عدت

ومارتبطتيش، عرفت إنني كنت غلطان، وفهمت إن

في عيوب انت مستحيلة تهاش.. وانت حـ

أميرة تستمع إليه دون أن تبرح مكانها بوجه جامد..



أنا عندي استعداد أتغير..  
مش هاقول لك سببي الشغل.. ومش هازن عليك  
بموضوع الخلفة لحد انت ما تطلبيه.. وإذا كانت  
مشاكل شغلي بتخلي طبعي سخييف شوية في البيت،  
أو عدك إني أقلل ده.. فيه إيه ثاني؟  
الشرب؟ بطلت.. (يتجرع من كنز البيرة ثم) دي  
بيرة يعني مش حاجة..

أميرة (بغضب مكتوم): أنا كرهتلك يا يحيى..  
يحيى (باستخفاف): مانا عارف.. هاخلطكي تحبينني  
ثاني

أميرة (بنفس النبرة): أنا عمري ما حبيتك  
يحيى (مواصلًا استخفافه): عالأقل كان عندك  
استعداد.. آمال يعني احنا اتجوزنا ازاي؟  
أميرة: المصيبة إنك متأكد إن الكلام ده مش هاجيب  
نتيجة..

يحيى (بحدة): ليه؟! (ثم يسترد هدوءه سريعاً) احنا  
مش هنرجع لبعض..  
أنا بعرض عليك نتجوز من أول وجديد.. خطوبة  
تقعد زي مانت عايزة، ماورانش حاجة.. المهر اللي

تطلبه.. وشبكة قد اللي جبتها لك قبل كده مرتين..  
والشقة دي بقت بتاعتك خلاص.. هاجيبك أحسن  
منها تبقى بيت جديد للزوجة.. إيه المطلوب ثاني؟!  
قولي وانا أنفذ..

أميرة (وهي تفتح باب الشقة علي آخره): المطلوب  
دلوقت حالاً إنك تمشي تطلع بره..

يحيى (باستخفاف): هاتفكري وتردي عليّ يعني؟  
أميرة (منذرة بصدق): أنا مش عايزة أعليّ صوتي  
وأعمل فضايح..

يحيى: هأمشي.. ومتأكد إنك هتفكري.. (ثم يجرع  
آخر جرعة من الكانز ويضعها على الطاولة) على  
فكرة ذوقك في الفرش الجديد حلو قوي.. (ثم في  
طريقه للخروج يمر ببيت الميكائيل الأبيض فيتوقف  
عنده ويمد يده تجاهه) والبيت ده ظريف كمان..

أميرة (محذرة): ماتمدش إيدك عليه  
يحيى (بوقف اصابعه قبل أن تمس البيت ويرمقها  
بنظرة ذات مغزى): إيه.. هدية.

أميرة (بحسم): بره..  
يحيى (مستجيباً وهو يخرج): طب ماتزقش بس..  
سلام مؤقت

بمجرد خروجه تصفق الباب من خلفه بعنف







## محل كبير لبيع الأدوات المكتبية

أميرة ودينا، الأولى مع سلة معدنية صغيرة تضع  
فيها كل ما تقع عليه عيناها من "بلوك نوتس"  
وأقلام ملونة و"سينكرز" و"نوت بادز"

دينا (بأنفعال): ده هيل.. إنت أكيد اتجننتي..  
أميرة (دون أن تتوقف عن جمع الأغراض):  
اجننت عشان مش عايزة اسيب بني آدم باحبه..  
دينا (غير مصدقة): تربطي حياتك بواحد مريض؟!  
لو فكرتي بعقلك دقيقة واحدة..  
أميرة (تقاطعها ملتفتة): إنت قلتيها قبل كده وعندك  
حق.. مش عايزة افكر.. (ثم تعاود جمع الأغراض)  
أنا فكرت كتير قبل كده.. خدت إيه مالتفكير؟  
دينا (تحاول الاستيعاب): أنا صحيح لحد الوقت مش  
متصورة حالة خالد ده.. بس مجرد الكلام عنها  
يخليها حاجة مرعبة..  
أميرة (تتوقف تماماً وتترك السلة وتتنهد ثم):  
تفكرني أنا مش مرعوبة؟!  
دينا (بأشفاق): طب ليه؟!  
أميرة: لأن.... (ثم تتوقف لحظة لاستجماع الكلمات)  
لأن الإحساس اللي جوايا دلوقت يستاهل أي تمن  
مممكن أدفعه بعدين..  
إنت فهماني يا دينا..  
إنت رجعتي لأشرف..  
نسييتي اللي عمله، بمزاجك..  
سامحتيه.. ليه؟  
إيه اللي ضمن لك إن غلطته في حقك ما تتكرر  
بعد كده بشكل أكبر.. وأفطع.. حاجة مرعبة صح؟  
ومع ذلك إنت خدتي ريسك الرعب ده.. وهتفضلي  
عايشة بيه برضاكي.. ليه؟

لا تنتظر أميرة إجابة.. تعاود التقاط السلة وجمع  
الأغراض وتمضي مخلقة دينا واجمة..

- قطع -



## غرفة خالد

إحدى أوراق المعلومات المعلقة في غرفة خالد،  
أميرة تدون محتواها على ورقة أخرى ملونة  
مزركشة، بأقلام مختلفة الألوان والأبناط  
د. عبد الحميد

0127656586

العيادة: 5353717

المستشفى: -----

المنزل: -----

يدخل خالد ومعه مج به مشروب ساخن ويضعه  
أمامها على المكتب ويرقيها للحظة ثم..

خالد: بالطريقة دي هتاخدي وقت كبير جداً  
أميرة (باصرار دون أن تتوقف عن العمل): مش  
رايحة الشغل النهاردة.. مش هامشي إلا ما اخلص..

تلتصق الورقة الجديدة بعناية محل القديمة، ثم  
تلتقط ورقة أخرى "السوبر ماركت"

خالد (مشفقاً): طب كفاية الحاجات اللي عالحيطان  
ومش مهم اللي في الادراج..  
أميرة: كله.. لازم كله..  
خالد: وليد ممكن!....  
أميرة (تقاطعه): انا استأذنت من وليد.. ريح نفسك  
بقه.. (ثم تشرب من المج فيبدو عليها الاستياء) إيه  
ده؟!

خالد (ببراءة): النسكافيه  
أميرة (تتصنع توبيخه): ده عسل.. حاطط كيلو  
سكر؟!  
اعمل واحد تاني معلقة واحدة سكر.. (ثم بابتسامة  
مشاكسة) لو سمحت يعني..

تلتصق الورقة الجديدة محل القديمة.. مع هذا  
اللتصق يبدأ "بان" هادئ لجدران الغرفة، ومع هذا  
ال"بان" يحدث مسح تدريجي.. كل أوراق  
الملاحظات الصفراء القديمة المتهاكة تحل محلها  
أخرى جديدة ملونة مبهجة عليها نفس المعلومات،  
وعلى هذه الحركة نسمع الحوار

ص. خالد: طب خليني أساعدك..  
ص. أميرة: لأ.. إنت تفضل قاعد وتشوفني وأنا  
باكتبهم ورقة ورقة  
ص. خالد: إنت بتعملي كده ليه؟

ينتهي الـ"بان" عند نقطة بدايته



ص. أميرة: الحاجات دي هتفضل في أوضتك طول  
العمر.. عينك هاتشوفها كل يوم.. سواء وانت  
عارف مين اللي كاتبها... أو مش عارفه..

- مزج -

ليل / د

م/100

## غرفة خالد

منظر للغرفة من أعلى، وأميرة وخالد في  
منتصفها.. لقد أصبحت الغرفة مختلفة تماماً بفعل  
الأوراق الملونة.. أصبحت مبهجة جميلة.. كان  
كل شئ أصبح جديداً وليس الأوراق فقط

خالد: دي بقت أوضة ثانية  
أميرة: بذمتك مش كده أحلى؟  
خالد (يتأمل وجهها للحظة ثم): أحلى عشان انت  
اللي عامله..

أميرة: إجابة صح.. عشرة على عشرة.. (ثم تتوقف  
عند باب الغرفة وتلتفت) ذاكر كويس بقه عشان  
تفضل فاكرها وتبقى شاطر...  
تصبح على خير

سعادتها ونشوتها الغامرة تربكها.. تهرب من  
ارتباكها بالتقاط حقيبتها متجهة للخروج

تتركه وتخرج.. ويظل هو جامداً سعيداً ينظر في  
إثرها

- قطع -



## شركة ماجيكال (صالة المكاتب)

كريم نائم في مقعده، ذقنه نابثة، ملابسه مبهذلة..  
يأتي وليد ويخطه على كتفه فيفزعه

وليد: السبلايرز بتوع الـ Fire Fighting ردوا؟  
كريم (مفزوعاً يكمل حواراً في الحلم): ها.. لا  
يا بابا والله ما شربت إ..... (ثم يدرك أنه كان يحلم)  
هفففف..

أنا نمت قد إيه؟

وليد (ينظر في ساعته): أكيد أقل من خمس دقائق..  
كريم (ساخراً): ياه.. وسبقتي نايم كل ده؟!  
وليد: خلّص وهات الكوتيشنز بتاعة الـ  
Fire Fighting عشان تنام في بيتكو..  
كريم (بصوت باك): يا وليد حرام عليك..  
دي سادس حاجة تقولي لازم اخلصها عشان اروح..  
بقالي ثلاث تيام هنا..

وليد (بابتسامة إعلانية): خليك فاكر.. شهرين  
مكافأة..

كريم (ينفض وجهه): بررر.. صح.. شهرين  
(ثم يلتقط سماعة الهاتف ويضغط رقماً فينزعج)  
يووه.. (يضغط رقماً آخر) أيا مایسة.. هاتيلي  
زفت.. خط.. خط



## كافيه

في البداية تظهر دنيا بمفردها في الكادر، وبانتها  
جملتها نعرف أنها تجلس مع "يحيى"

دينا: أنا متأكده إن أميرة لو فكرت بعقلها خمس  
دقايق بس، هتلاقي منطق في اللي انت بتقوله..

يحيى: وإيه اللي مانعها تفكر؟

الجدع المهندس ده؟..

دينا: مش كده خالص..

معلش يعني يا أستاذ يحيى.. اللي حضرتك عملته في  
أميرة أيام الجواز وأيام طلب الطلاق مكاش شوية..  
إنت كرهتها في عيشتها

يحيى (ساخراً): لزومها إيه بقه حضرتك، وأستاذ،

إذا كنتي هتعي كده..

دينا (مترجمة): أنا آسفة.. في الآخر أنا باتكلم عن  
اللي سمعته..

يحيى (باستخفاف): ما تتأسفيش..

أنا عارف ان طبعي وسخ..

(ثم بحدة) بس معلش بقه، مافيش حد ملاك.. وأميرة

اللي مش طايقاني دي، كنت اسمعها بتقولي إيه

عني في أول ثلاث اربع تشهر جواز..

دينا: هو ده بالضبط اللي ممكن تعمله.. فكرها

بالجانب الكويس اللي فيك..

يحيى (بضيق): هي بتديني فرصة أعمل أي

حاجة؟!

دينا: الفرصة دي مش هاتيجي من اول ولا من

عاشر مرة.. المهم الأسلوب والطريقة.. أميرة

حساسة جداً، وسهل إنك تميلها ناحيتك طالما إنك

فعلاً بتحبتها..

يحيى: ماهي مش معايا أصلاً..

إذا كنت ماميلتش وهي فاضية.. هاتميل وهي

مشغولة بالباشمهندس؟!

دينا: قللتك مش دي المشكلة.. حكاية المهندس خالد

دي هتأخذ وقتها وتخلص.. المهم إنك....

يحيى (يقاطعها وقد تحفز تماماً كأنه يصدد

وأنت ح



فريسته: ثانية واحدة كده، ثانية واحدة.. تخلص  
علي إيه؟!  
دينا (بعد لحظة صمت): أكيد هايسيبو بعض..

يحيى (ببرود قاتل: إشمعنى؟  
وقد برق وجهه)

دنيا تبتلع ريقها.. لا ترد مباشرة..  
تشعر إلى أي مدى تورطت..



## منزل والدة أميرة (طاوله الطعام + المدخل)

على طاولة الطعام، أميرة وكريمة تجلسان متواجهتان.. بينهما الأطباق وتاكلان في صمت.. لا تنتظران لبعضهما البعض.. وبعد لحظات طويلة تتحدث الأم

كريمة: طارق كلمني امبارح..  
أميرة (تتصنع الاهتمام): مم.. أخبار ولاده إيه؟  
كريمة: جودي شالت اللوز..  
أميرة: يا حبيبتي...

كريمة: أنا قلتك إن إيمان هتنزل أجازة في نص السنة..  
يسود الصمت ثانية لفترة قبل أن تقطعه الأم ثانية..

أميرة (بنفس لهجتها المحايدة): كويس..  
كريمة: هتنزل مع الولاد بس.. من غير جوزها..  
وهتقضي الأجازة معايا هنا..  
أميرة (بابتسامة مجاملة): يا فرحتك..  
كريمة (برجاء حقيقي): ماتبقي!... تقضي الفترة دي معانا..  
أميرة (بشئ من الإشفاق بعد أن ترمقها للحظة):  
هاشوف.. ربنا يسهل..

كريمة: يحيى قال لي إنه جالك..

أميرة: هايل يا ماما.. رقم قياسي.. مسكتي نفسك أربعة وخمسين دقيقة قبل ما تفتحي الموضوع كريمة (باصرار): الموضوع ماتقفش عشان أفتح..  
الراجل ماسابش حد من اخواتك او قرايبك إلا ماكلمه..

أميرة (وهي تفتح الباب): إيدله جائزة احسن زنان لسنة ألفين وستة..

كريمة: إنت هاتهرجي؟! أنت ح

يسود الصمت لفترة ثالثة.. ثم..  
تنتفض أميرة من مكانها وهي تشير لساعة يدها منفجرة

تلتقط أميرة حقيبة يدها وتتجه نحو باب الشقة والام في إثرها



أميرة: لا انا اتأخرت  
كريمة: استنى هنا كلميني..  
أميرة (بعصبية): مش مهم دلوقتي..  
قوليلي الكلمتين اللي عايزة تقوليهم في مكالمه  
بكرة.. عالأقل ماتتعبيش نفسك في دخلة جديدة  
لل كلام..

تتركها وتمضي..  
الأم تتميز غيظاً بدورها..



## شارع به محلات كبيرة (سيارة أميرة)

أميرة تتحدث في الموبايل وهي تقود السيارة..

أميرة (بعصبية وغيظ): معلى يا خالد استحملني..  
أنا مخنوقة ومتغاضة ودمي محروق وعائزة أعيط  
وعائزة أصرخ و..... (تباغت تماماً) قلت إيه؟.....  
(تلين ملامحها كلية وتبتسم في خجل) طب  
المفروض اعمل إيه يعني بعد كلمة زي دي؟..  
بتحسني إني عيلاً.....  
بكراً؟ مش عارفة ظروف الشغل..  
هاكلمك طبعاً..  
باقولك إيه.. باي دلوقت أصلي داخله علي لجنة.

تلمح عينها يافطة محل بويات كبير  
السيارة تركن علي مقربة من المحل

تنزل من السيارة، وتتجه إلى محل البويات وتدخل

- قطع -



## غرفة مكتب يحيى

شاشة كمبيوتر، عليها صفحة لإنترنت التي تحوي  
صورة خالد صبياً في إطار الحديث عن مرضه..  
سهم الماوس يضغط على Print..  
الصفحة تخرج من برينتر مجاور، تتلقفها يد  
يحيى، الورقة عليها شعار IMC يضمها إلى  
مجموعة أوراق لاتبين المكتوب بها لكنها تحمل  
الشعار نفسه، ويضعهم جميعاً في ظرف أبيض  
كبير.. ملامحه باردة وجامدة تماماً.

- قطع -



## غرفة خالد

خالد (بدهشة): دلوقتي حالاً؟!  
طب.. هاغير هدومي بس..  
يعني انت تحت؟!  
فوق؟!  
فوق فين؟!

خالد يتحدث في التليفون ويرتدي ملابس المنزل

- قطع -



## سطوح عمارة خالد

خالد يعبر بوابة السطوح.. الجو يبدو غائماً بشكل ملحوظ.. يتلفت حوله باحثاً.. تخرج له أميرة من المنعطف خلف "الشخشيخة"، ترتدي ملابس كاجوال وملطخة تماماً ببويات مختلفة الألوان وتبتسم في بلاهة.. بمجرد رؤيتها ينفجر خالد من الضحك

خالد: هاهها..  
إيه اللي عملتيه في نفسك ده؟!  
أميرة (تجذبه من يده): تعالي..

تتجه به إلى مكان الكوخ.. وعندما يراه تصيبه الدهشة العارمة.. لقد أصبح الكوخ كما لو كان جديداً.. ألوان شديدة البهجة والرقّة.. خالد يتسمر من فرط المفاجأة

أميرة: مش عارفة بقه ذوقي في الألوان هيعجبك وللا لأ..  
خالد: يابنت اللذين..

تفتح له الباب، تدعوه للدخول وتدخل خلفه.. من الداخل كما الخارج.. كل شئ جديد ونظيف ومبهج وملون.. حتى الكراسي الصغيرة التي يجلسان عليها

خالد (مذهولاً): إنت هنا من امتى؟!  
فرحاً  
أميرة: ستة الصبح.. إيه، حلو؟  
خالد (مستهنئاً بالسؤال): حلو!!?  
إنت مش معقولة..

نظراته المحبة لها تدفع ارتباكها إلى ذروته.. تخطب بكفيها على رجليها بسعادة.. لا تجد ما تقوله ثم

أميرة (ضاحكة): فيه ضمان عالبوية ضد المطر ثلاث سنين..

يضحك.. ثم يتبادلان النظرات في صمت.. ثم يشرّد خالد، وفجأة

خالد: أنا عايز أشوفه..  
أميرة (باستغراب): هو إيه ده؟!  
وانت حد



- قطع -

نهار / د

م / 108

## مختبر طبي

درج معدني ضخيم يفتح بعض الكادر فيخرج منه  
بخار كثيف.. وبعد تلاشي البخار نرى أن الدرج  
يحوي وعاء زجاجياً به سائل شفاف، تسبح  
بداخله كتلة دهنية بحجم قبضة يد طفل.. ومن  
خلف الوعاء تظهر رؤوس خالد وأميرة..  
أبصارهما معلقة في خشوع بالوعاء وما فيه.. ثم  
ينضم إليهما د. عبد الحميد واقفاً خلفهما..

د. عبد الحميد (بلهجة ملطقة): زي ما هو يوم ما  
استلفناه منك.. ماخذناش منه غير حوالي عشرين  
جرام للأبحاث..

خالد: كان هنا  
د. عبد الحميد: بالظبط..

دون أن يحيد ببصره عن الوعاء، يتحسس خالد  
بأطراف أصابعه منبت الشعر في جبهته

عبد الحميد: مش عارف إذا كان اللي هاقولها لك ده  
مهم بس!.... دي أول مرة تطلب إنك تشوفه، من  
يوم ما عملت العملية

يتوجه بأطراف أصابعه نحو الوعاء، كأنه يريد  
لمسه لكنه متردد أو خائف

خالد وأميرة ينزعان أنظارهما عن الوعاء  
وينظران لبعضهما.. ينسحب عبد الحميد من  
الكادر..  
لحظة ويتم غلق الدرج ثانية

- قطع -



## شركة ماجيكال (الاستقبال)

كريم بحالة مزرية تماماً من قلة النوم وعدم الحلاقة وبهدلة الملابس يتجه للخروج من باب الشركة، ماراً بالسكرتيرة..

السكرتيرة (تستوقفه ضاحكة): إيه ده، رايح فين؟  
كريم: على فكرة إنتي فهمتي غلط.. أنا مش ساكن هنا.. أنا لّي بيت وأهل..  
السكرتيرة (تضحك): خلاص إفراج؟  
كريم: ومش عاوز اسمع صوتك ولاصوت حد من هنا لمدة أسبوع..  
سلام

في طريقه للخروج يصطدم بشاب من بيئة متواضعة، يبدو متجهماً، ويحمل ظرفاً أبيض كبيراً..

كريم (معتذراً): لا مؤاخذه..

يمضي كريم، ويدخل الشاب ويعطي الطرف للسكرتيرة

الشاب: الطرف ده للدكتور جلال الورداني..  
السكرتيرة: ده تبع إيه؟  
الشاب: شخصي.. يستلمه بإيده يعني..  
السكرتيرة (بآلية): OK.. شكراً..

- قطع -



## شركة ماجيكال (مكتب د. جلال)

جلال خلف مكتبه ينظر تجاه وليد..  
وليد جالس على مقعد في الغرفة وفي يده أوراق،  
أولها الورقة المطبوعة في الإنترنت بصورة  
خالد، منكس الرأس.. عيناه متحجرتان على  
الورق.. ملامحه جامداً تماماً.. مكن أن نلمح في  
يده ارتعاشة خفيفة.. (لاحظ شعار IMC على  
الأوراق)

جلال (بهدهوء): عندك تفسير واحد للورق اللي في  
إيدك ده، غير اللي أنا فهمته..

بعد صمت طويل..

جلال (مكرراً بحدة): وليد..  
أنا لأخر مرة باقولك عايز تفسير ثاني..

وليد لا يرد.. بل أنه حتى لا يلتفت.. إنه ثابت على  
وضعيته محملاً في فراغ الأوراق أمامه

وليد لا يملك غير التفاته نحو جلال.. يحملق فيه  
بنفس الوجه الذاهل الجامد، وكأنه يريد أن يومي  
أن "لا تفسير"، لكنه لا يفعل.. rack in هادى  
يتجه نحو وجهه..



## فوتومونتاج

أ - على مكتب وليد، نراه يضع متعلقاته المكتبية الشخصية في كرتونة متوسطة الحجم، وفي قممتها يضع الطائرة الخشبية للعبة

ص. جلال: للأسف، أنا ماقداميش خبارات.. سمعة الشركة عندي أهم من أي حاجة..

ب - الكرتونة نفسها توضع في شنطة سيارة وليد، قبل أن يغلق وليد الشنطة

ص. جلال: لو حاجة زي دي انتشرت، ممكن كل شغلي في السوق يتضرر

ج - وليد يأخذ مقعده خلف عجلة القيادة.. ينظر لنفسه في المرآة.. كأنه يرى نفسه لأول مرة منذ زمن بعيد.. يدير المحرك

ص. جلال: إنت عارف إنني باعزك.. بس مضطر أقولك صفي حسابك وامشي..

د - سيارة وليد تجوب الطرقات.. الجو غائم بكثافة

ص. جلال: ونصيحة من أخ أكبر.. شوف شغل تاني بعيد عن الهندسة.. لأن اللي بيعت لي الورق ده، يقدر ياذيك أكثر من كده..

هـ - سيارة وليد مركونة أمام المنزل، الوقت غروب.. على زجاجها بدأت تظهر قطرات مطر بوتيرة هادئة جداً.

- قطع -



## منزل خالد ووليد (غرفة وليد)

وليد ممدد على ظهره على السرير وعيناه معلقتان  
بالسقف، الغرفة معتمة إلا قليلاً بفعل ضوء  
الغروب الخافت القادم من النافذة.. يدخل خالد  
ويضيئ النور

يمتثل خالد للأمر، يطفىئ النور، ثم

خالد: وليد احنا...  
وليد (يقاطعه دون أن ينظر له): إطفئ النور

خالد: وليد احنا لازم نتكلم..  
وليد (بلهجة جافة دون أن ينظر): في إيه؟  
خالد: في اللي حصل ده..  
وليد (بحسم): مش عايز أتكلم في حاجة..  
خالد (بالحاح): أكيد كان ممكن تحاول مع الدكتور  
جلال إنه..  
وليد (يلتفت له لأول مرة مقاطعاً): إنت حاسس  
بالذنب فجاي تقول أي كلام تخلص بيه نفسك؟!  
خالد (يفاجأ باللهجة الهجومية): لا أنا..  
وليد (يواصل معتدلاً ليجلس): آمال إيه؟  
جاي تقولي كان المفروض أقول إيه لجلال؟!  
طب ماتروح تقول له اللي انت عاوزه.. مش  
تليفونات الشركة عندك؟! كلمه..  
خالد: وليد أنا مقدر إنك متضايق، بس أنا متأكد إن  
أميرة مش ممكن أبداً تـ...

هنا ينفجر وليد تماماً.. ومع سياط كلماته لا يملك  
خالد إلا الإصغاء متألماً.. منكرأ.. ومشفقاً..

وليد: أميرة؟؟  
أميرة إيه يابني اللي انت بتتكلم عنها دي؟  
يظهر إن حالتك مخلياك تقيس المشاكل بـ"سكيل"  
صغير قوي..  
أميرة دي دخلت حياتك من شهرين.. شهرين.. ستين  
يوم..

المشكلة اللي قدامك دلوقت مانتقاشش بالأيام.. دول  
عشرين سنة.. للأسف، انت أكيد مش فاكتر إيه اللي  
حصل ويحصل من عشرين سنة.. وللأسف أكثر



إن انا كمان مارکزتش في العشرين سنة دول غير  
النهاردة.. شفتهم على بعض.. حنة واحدة.. عدوا  
قدام عيني في ثواني.. وهتستغرب بقة، إنني شفت  
كل حاجة بوضوح..

من ساعة ما قلت لنفسي حكاية الطيران دي لعب  
عيال.. الأحسن إنني ادخل هندسة ورا خالد، عشان  
اساعده واسنده وقت ما يحتاج حد يشيله.. النهاردة  
بس، خدت بالي إنني مش قادر أبقيت بره البيت ليلة،  
ليلة واحدة من عشرين سنة، عشان لو صحيت  
الصبح ضايع تلاقيني..

النهاردة شفت إنني باقرب عالاربعين، من غير  
جواز، أو حتى احتمال ضعيف إنني اتجوز في أي  
وقت.. مين اللي ممكن تاخذني باخويا وتستحمل ده  
طول العمر؟!

بقيت كذاب.. باكذب بانتظام، كل يوم لازم أألف  
قصص وحكايات، عشان اعفيك من مقابلة الناس..  
النهاردة ركزت في عيون اللي حوالينه، نظرات  
مليانة شك مستخبي.. اللي فاكرني فلاتي، واللي  
فاكرني إ.... (يطلق ضحكة ساخرة مرة..) تيجي إيه  
أميرة بالشهرين بتوعها وسط كل ده؟!

ولا حاجة..  
أو عى تكون فاكر إنني بالومك.. أو عايز أحملك  
مسئولية العشرين سنة دول.. خالص.. إنت مالاكش  
أي ذنب..  
إنت ما طلبتش..

أنا اللي اخترت من غير ما حد يجبرني على حاجة..  
صحيح ماما الله يرحمها شجعتني في أول مرة.. بس  
بعد كده أنا اخترت لوحدي.. مرتين وثلاثة وعشرة..  
دائماً كنت باتحط قدام نفس السؤال، واختار نفس  
الإجابة.. ودائماً كنت متصور إن دي الإجابة  
الصح.. النهاردة بس، بدأت أشك في ده..

**وليد:** أرجوك، تقوم بكرة سليم.. لأنني فعلاً، محتاج  
أبات الليلة بره البيت.

خالد ذاهل لا يند عنه تعبير محدد..  
يلتقط وليد خوذة الدراجة البخارية من مكانها  
ويتجه خارجاً قبل أن يتوقف قائلاً

بنصرف وليد، مخلفاً خالد علي وضعيته

- مزج -



## فوتومونتاج

موسيقى ومؤثرات مناسبة

أ - وليد يمتطي دراجته البخارية ويرتدي الخوذة

ب - خالد يفتح باب غرفته ويضيئ النور ويتأمل الكتب الدراسية علي المكتب، وطاولة الرسم الهندسي وأدواته وبلانات المشاريع المبرومة

ج - وليد يشغل المحرك، وينطلق بالدراجة.. لاحظ أن الأمطار تهطل بغزارة..

د - خالد يسحب الكتب واحداً تلو الآخر ويمزقها بعنف ويلقي بها في الصالة

هـ وليد في الطرقات المأهولة بدراجته البخارية

و - خالد يمزق بلانات المشاريع ويلقي بها في الصالة

ز - وليد ينطلق بدراجته على طريق سريع..

ح - خالد يجرجر طاولة الرسم إلى الصالة ويوسعها ركلاً وتحطيماً

ط - وليد علي الدراجة بسرعة عالية..

ي - خالد يركع علي ركبتيه لاهثاً وسط الحطام والأوراق الممزقة من فرط المجهود والحنق..

ك - الطريق السريع المظلم الممطر في المرأة الجانبية لدراجة وليد السريعة.. تقترب منها الكاميرا حتى يخرج إطارها من الكادر

ل - خالد يسير في الشوارع والأمطار تهطل عليه بغزارة ويبدو مستسلماً لها



م - وليد ينطلق بدراجته إلى أقصى عمق الكادر  
حتى يكاد يختفي في الأفق

ن - خالد في شارع عمارة أميرة.. ينظر إلى  
شرفتها في الأعلى فيجدها مظلمة

ليل / ح

م/114

## أمام عمارة أميرة

خالد يجلس مقرفصاً على الرصيف المواجه  
لعمارة أميرة.. الأمطار مازالت تهطل.. تدخل  
سيارة أميرة إلى الشارع.. مع اقترابها ينهض  
ناظراً تجاهها.. بمجرد رؤيته وتنزل من السيارة  
وتتركها دائرة وإضاءتها تعمل..

أميرة (بجذع): خالد!! إيه اللي حصل؟! قاعد هنا  
ليه؟!

أميرة (تواصل بقلق): ماكلمتنيش ليه؟!  
فيه إيه يا خالد..

خالد لا يرد، يكتفي بالنظر إليها كأنه لا يصدق  
أنها أمامه

تفهم ان لا فائدة من المحاولة هنا.. تجذبه من  
ذراعه تجاه مدخل العمارة

أميرة: تعالى معايا..

يستسلم خالد لقيادتها..  
بمرورها على المدخل، تمر على غرفة البواب  
خميس وبابها مفتوح ونراه بالداخل

أميرة: خميس.. اركن العربية وطلعلي المفاتيح.. (ثم  
لخالد) تعالى..

يخرج خميس ويلقي نظرة عليهما يصعدان سلم  
المدخل ثم يخرج إلى السيارة

- قطع -



## منزل أميرة (ريسبشن + غرفة النوم)

خالد جالساً على فوتيه وملابسه تقطر ماءً.. أميرة  
على مقعد آخر ذاهلة

خالد: كنت مرعوب ما تجيش..  
كنت حاسس إني ممكن أكون باتخيلك.. ممكن  
ماتكونيش موجودة بجد..  
خفت اتصل بيكي..  
خفت ماسمعه صوتك..  
أميرة (بضيق شديد): أنا السبب في اللي حصل ده..  
خالد (نافياً): اللي حصل ده كان لازم يحصل..  
الغريب إنه اتأخر كل ده..  
يعني إيه اعيش حياة انا ماقدرش اعيشها؟! بالعافية..  
بالغصب.. يعني إيه استمرار حياتي دي، يبقى  
مرتبط بوقوف حياة اخويا محلك سر؟! ده مش  
طبيعي..  
أميرة (شاردة كأنها لم تسمعه): أنا قلت لدينا..  
وأكيد دينا قالت لحد..  
خالد (متجهاً نحوها جاثياً على ركبتيه ممسكاً  
بذراعيها): ده العادي.. مين اللي قال إنك تقفلي  
حياتك علينا وتعيشي السر السخيف اللي احنا  
عايشينه؟!  
ليه؟!  
أميرة (بعد لحظة صمت): عشان باحبك..

يبادلها النظرة.. ثم يعطس عطستين متتاليتين..

خالد: هاتشو.. هاتشو..  
أميرة (تنهض بسرعة): إنت كده هتاخذ برد..

- مزج -



خالد يجلس على الكنب، ملفوف في بشكير،  
ملايسه المبلولة مفرودة على مقعد آخر..  
البيت الميكانيكي الأبيض بجواره.. يمد يده نحو أحد  
أبوابه.. يعيث به فتحاً وغلماً وهو شارد..  
تأتي أميرة من المطبخ معها مج مشروب ساخن،  
تراه في عبثه بالباب.. تبتسم.. تجلس إلى جواره  
فيتنبه.. تضع المشروب إلى جواره.. ينظر إليها  
طويلاً ثم

خالد: نفسي أفكر أول مرة شفا بعض فيها..  
أميرة: ليه؟  
خالد: عايز أعرف قلنا ايه..  
أميرة (تستعيد ذكرى جميلة): ماتكلمناش كثير..  
إنت ماكنتش عاوز تتكلم.. هربت مني..  
خالد (بفضول حقيقي): كان شكلي إيه؟ يعني..  
شفتيني ازاي؟  
أميرة (تحتضنه بعينيهما): شفتك راجل اتمنى أعيش  
حياتي كلها معاه..  
خالد: يعني حبتيني من يومها؟  
أميرة (وهي تتحسس الموضع في رقبتها الذي  
نظفه خالد يوم الحفلة): عرفت يومها إني مش  
ممك أنساك أبداً.. وعرفت إني لو حبيت لازم أحب  
واحد زيك.. (ثم بلهجة طفولية) عشان كده لما شفتك  
تاني، ماديتلكش فرصة تهرب..  
خالد (ضاحكاً): برافو عليكى..  
أميرة (كأنها تذكرت أمراً): عارف..  
أنا بكرة هاتتصل بالدكتور عبد الحميد واسأله إذا  
كان ده ممكن وللا لأ..  
خالد (مندحشاً): هو إيه ده اللي ممكن؟!  
أميرة: لو انت نسييتي.. ممكن يعملولي عملية  
تخليني انساك انا كمان؟  
خالد (بجزع): لأ.. لأ..  
أوعي يا أميرة..  
أوعي تنسيني.. أوعي تعملي كده..  
أميرة (بحنان تربت على خده): ماتخافش..  
بحبك.

- مزج -

- في غرفة النوم.. بان بطئ من ركن الغرفة  
الأيسر باتجاه السرير، مع الصعود إلى السرير،  
مع الصعود إلى السرير نرى خالد وأميرة  
"سلويت" يتقاربان.. ثم تظهر فلاشات ساطعة  
نرى فيها:  
- خالد الطفل (5 سنوات) يلهو بالرمال على



شاطئ البحر ويضحك بسعادة عندما تغمر المياه  
قدميه، وفي الخلفية وليد الطفل يطير طائرة ورقية  
صغيرة.

- خالد الطفل يضع ألواناً زيتية على وجهه  
ويضحك وهو ينظر لنفسه في المرآة.  
- خالد الطفل يمد يده من شباك حيث الأمطار في  
الخارج.. يضحك لوخر قطرات المطر في يده..  
ويحاول جمعها والشرب منها..

بعد الفلاشات، نكمل البان الهادئ.. "سلويت" خالد  
وأميرة أصبح كتلة مندمجة يخرج من يسار  
الكادر، والبان يتجه "إلى يمين الغرفة حتى يصل  
إلى الشباك.. حيث قطرات المطر مازالت تضرب  
زجاجه.

- مزج -



## منزل أميرة (الريسبشن + الحمام)

على نفس الشباك ينهية المشهد السابق، الامطار  
تركت على زجاجه أثراً جافاً.. نفتح الكادر،  
لنرى أميرة تسحب ذراعها من تحت رأس خالد  
النائم تماماً، تنهض من السرير، تلقي عليه نظرة  
حانية، وجهها يحمل كل آيات الرضا والسعادة..  
تخرج من الغرفة

- مزج -

تسير في الريسبشن بخفة، في يدها مج مشروب  
ساخن، تتجه إلى مشغل السيديوهات، تضغط زراً  
فتنبعث نغمات أغنية فيروز "خليك بالبيت"..  
تستمع إليها في انتشاء.. تتمايل معها حتى تكاد  
ترقص..  
نقطع على خالد الذي بدأت عضلات وجهه في  
الحركة.. يبدو على وشك الاستيقاظ، وصوت  
الأغنية يصل إلى سريريه.. يبدأ جفنه في الحركة..  
فجأة.. صوت جرس الباب يصاحبه خبط عنيف..  
تجفل أميرة، ويكاد يسقط المج من يدها..  
- يفتح خالد عينيه  
- تفتح أميرة الباب لتجد أمها فتذهل

أميرة: ماما؟!!

كريمة (تقتحم المكان بعنف وتصرخ): أيوة يا  
ماما.. فاكركه إنك قاعدة لوحدك وماحدش هيلمك؟!!

- خالد في حالة ذهول تام.. ينظر إلى يديه وجسمه  
والسرير لا يدري فيصعق تماماً.. والصوت قادم  
من الخارج..

ص. أميرة: إيه اللي بتقوله دم؟!!

ص. كريمة: فين الحيوان اللي هنا..

ص. أميرة: استني يا ماما أفهمي..

ص. كريمة: أفهم يا بججه



يا زبالة.. هو فين؟!

ير تعب.. شفتاه تتمم دون صوت "ماما.. ماما.."  
ينظر تجاه الكوردور المفضي إلى باب الغرفة..  
تنجحه نحوه كريمة وفي إثرها أميرة..

كريمة: لسه نايم في السرير يا واطي يا حقير..  
أميرة: ياماما كفاية بقة.. كفاية..

خالد ينهج بصوت متشنج..

يعلو نسيجه مع إقترابهما، حتى يتحول إلى  
صراخ..

ينهض من مكانه ناظراً إليهما في رعب

خالد (بصرخ): آ.. آ..

كريمة (لا ترحمه): انت تلم بعضك وتغور حالاً  
أحسن وديني...

يواصل صراخه مندفعاً خارج الغرفة.. تلحق به  
أميرة.. بينما الأم تتسمر ذاهلة

صراخ خالد يعلو..

أميرة (تصرخ): كفاية (ثم لخالد) خالد.. معلش يا  
خالد أنا..

خالد (لا يطيق لمسها إياه): آ.. ها

إننتو مين.. إننتو مين..

أميرة (مذهولة): أنا أميرة يا خالد..

خالد: ها.. ها..

أميرة: خالد.. خالد.. (ثم لأمها باكية) حرام عليك..

حرام عليك.. خالد..

خالد يدخل الحمام ويغلق الباب ويتكوم خلفه  
مقرصاً وقد أصابته نوبة هستيرية عنيفة..

ص. أميرة: خالد.. افتح ياخالد أنا أميرة

صوت طرقاتها على الباب بتداهل مع نسيجه  
المتواصل

خارج الحمام أميرة تضرب الباب بكلتا يديها في  
حرقة وهي تبكي وتنادي

أميرة: خالد حبيبي افتح..

أنا أميرة يا خالد..

فتح هافكر..

افتح أنا أميرة..

في الحمام على وضعه المقرص يبكي متشنجاً..  
تبدأ الكاميرا في الارتفاع..

مع "الكرين" تختفي الأصوات تدريجياً.. بداية

يختفي صوت أميرة..

ثم يختفي صوت مكانه..

ثم يختفي صوت الموسيقى..

ولا يبقى سوى صوت طرقات على الباب

- إظلام تدريجي -



## فوتومونتاج "الأغنية"

في مشاهد الفوتومونتاج التي تتضمن حواراً،  
يترجع صوت الأغنية إلى الخلفية..

د. عبد الحميد: الـ Loos حصلت بدري جداً..  
زي ما يكون اللي حصل له في الشهرين اللي فاتوا،  
عمل له Over Dose

1 – أميرة تتابع من شرفتها وهي تبكي سيارة  
إسعاف تتحرك من أمام العمارة، وخلفها سيارة  
وليد..

2 – ليلاً، خالد نائم في سرير بالمستشفى ود. عبد  
الحميد مع وليد عند الباب

3 – نهار- أميرة في غرفتها تمر بيدها على  
الملابس التي كان خالد يرتديها تلك الليلة وقد  
أصبحت مكوية ومعلقة على شماعة..

4 – وليد مع خالد في المستشفى يريه صوراً،  
ويتحدث معه خالد يبدو ذاهلاً تماماً..

5 – أميرة في سيارتها، تقودها شاردة، الدموع  
محتقة في عينيها

6 – وليد في المنزل يجمع الكتب والأدوات  
الهندسية المحطمة في صناديق

7 – أميرة تتزلج على الجليد..  
شاردة تماماً، تدور دورات واسعة

8 – خالد يركب سيارة وليد، الذي يغلق له الباب،  
ثم يجلس خلف عجلة القيادة.. وتتحرك السيارة من  
أمام المستشفى..

9 – أميرة في المنزل، تمسك بنفس الباب في  
البيت الميكانيكي الأبيض الذي كان خالد يعبث به في  
تلك الليلة.. وتحركه فتحاً وغلقاً بنفس الطريقة..



10 - خالد فوق السطوح.. عند الكوخ الخشبي..  
يتأمله متعجباً.. يمر عليه بأصابعه.. ويفتح بابه  
ويدخل ليجلس..

11 - أميرة في مكتبها تتحدث في الهاتف  
وصوتها مخنوق بالبكاء راجية

12 - وليد يتحدث في التليفون.. وعندما يفتح  
الكادر نراه على مكتب في معرض لبيع الدراجات  
البخارية.. وعلى مكتبه ذات الطائرة الخشبية..

13 - خالد في غرفته يتأمل أوراق الملاحظات  
الملونة.. يلمسها بأطراف أصابعه.. في عينيه  
تساؤلات يجهلها..

14 - أميرة في منزلها.. تلون الرجال البيض،  
الذين صنعتهم من الناديل الورقية في المطعم

15 - كريم في معرض الدراجات البخارية  
يمططي أحدها ضاحكاً..

16 - فرح.. في الزفة تقف  
دينا بفستان الزفاف بجوار عريسها "أشرف"..  
عينها زائغان تبحثن بين وجوه المدعوين.. حتى  
تظهر أميرة بعيداً في الخلف.. فتقلت يد عريسها  
وتحترق الصفوف وتتلفحها في حضنها بحرقة  
وتبكي..

17 - خالد يجلس على أحد مقاعد الصالة ويلاحظ  
اهتزازة.. يهزه أكثر من مرة محاولاً أن يتذكر..

18 - أميرة في المنزل، على أذن سماع  
التليفون ولا ترد.. ثم تضع السماعة  
ص. كريمة في التليفون: أميرة.. أميرة..

19 - كريمة في منزلها تغلق الباب في وجه  
يحيى.. يعدل من ياقة قميصه باستخفاف  
ويمضي..

20 - د. جلال يقف على باب معرض وليد  
للدراجات البخارية.. وليد عندما يراه يتהלل  
وجهه.. يفرد جلال ذراعيه داعياً لاحتضانه..

21 - خالد ممدداً على ظهره في السرير عيناه



معلقتان بالسقف..

22 – أميرة على نفس الوضع

نهاية الأغنية.

- إظلام تدريجي -



## منزل أميرة (الريسبشن)

أميرة تحتضن الهاتف، وتطلب رقماً..

أميرة: عايزه اشوفه بقي.

ص. وليد: استنى بس أسبوع كمان.. ده لسه  
ماكملش أربع تيام..  
خلاص..  
السبت الجاي..  
O.K.. مكان كويس..

- قطع -



## كافيه

ص. وليد: أنا هاوصله وامشي وابقى ارجعله بعد شوية..

الكافيه من النوع ذي الجدران الزجاجية الكاشفة للخارج.. من الداخل نرى وليد يقترب بدراجته البخارية وخلفه خالد يحتضنه من ظهره.. يركن وليد الدراجة.. ويدخل مع خالد ويجلسه على إحدى الطاولات ويقول له شيئاً فيهمز خالد رأسه متفهماً و.. يخرج وليد ويمتطي الدراجة ويتحرك مع "بان" هادئ نرى أميرة تجلس على طاولة قريبة منه..

تملي عيناها منه، لا تصدق أنها تراه أمامها ثانية.. تكاد تنهض لكنها تتراجع..

الجرسون يضع أمامه كوب عصير.. يرشف منه وهو شارد ينظره عبر الزجاج.. تحين منه التفاته لداخل الكافيه.. تتحفز أميرة كلياً لاحتمال رؤيته لها..

يرشف رشفة أخرى بالشاليموه وهو يجول بناظره..

يمر يعينيه عليها..

تلتقي أعينهما.. نظراته فارغة.. جامدة.. هي بالنسبة له مثل أي امرأة..

يشيح بوجهه سريعاً.. أميرة تذهل تماماً.. لاتصدق أنها أصبحت صفراً.. تتحجر الدموع في عينيها.. لاتحيد نظرها عنه.. هو يواصل شرب العصير.. هي كأنها تستجديه أن ينظر ثانية.. لكن نظرتة التلية كانت أقصر، وامعن في عدم الاكتراث.. تفر الدمعة منها بالفعل..

لكنها فجأة، تمسح الدمعة سريعاً وتنتبه كلياً لما يفعله..

نراه من وجهة نظرها بـ track هادئ.. يلتقط الشاليموه وينظفه، ثم يبدأ في عقده تلك العقدة.. أميرة لا تصدق.. يشرق وجهها تماماً.. أصابعه تواصل العمل على الشاليموه وكأنه لا يدري ما يفعله.. حتى يكتمل الشكل الذي تعلمه في السابق دون أن يذكر ذلك.. يتأمل الناتج باستغراب.. تنهض أميرة وتتجه نحوه..

تمد يدها بالسلام



خالد (بدهشة يصافحها): أهلاً مساء النور..  
أميرة: إزيك يا خالد.. أنا أميرة..  
خالد (يارتباك): إ.. أهلاً.. ز..  
معلش.. تحنا اتقابلنا قبل كده؟!  
أميرة (تمسك دموع فرحتها بصعوبة): أيوة..  
خالد (معتذراً): أنا.. أنا آسف جداً.. أصل أنا.....  
أميرة (تقاطععه): عارفه.. عارفه..  
تضايق لو قعدت معاك؟  
خالد (صادقاً): لأ خالص.. اتفضلني..  
أميرة (وهي تجلس): وليد أخبره إيه؟  
خالد (مبتسماً في اطمئنان): إنت عارفة وليد  
كمان...  
أميرة: طبعاً.. لو تحب ممكن أقولك حاجات كتير  
تانية أعرفها..  
خالد (باستعداد يشويه السعادة): يا ريت.. ده أنا  
نفسي أعرف حاجات كتير فعلاً..  
ووليد بصراحة بيتعب قوي  
أميرة: طب نبداً منين. عايز تعرف إيه؟  
خالد: نبتدي مالأول..  
أميرة (بعد لحظة صمت): O.K..  
نبتدي من مالأول..

- مزج -



## الكافيه من الخارج + طرقاا سريعا

نراهما من خلف الزجاج يتحدثان ويتخلل حديثهما ضحكات..

Track kaut هادئ نكتشف معه ان وليد يراها

من ركن خفي يمتطي فيه دراجته.. يبتسم بسعادة

هادئة.. يرتدي الخوذة على رأسه.. يدير محرك

الدراجة وينطلق مبتعداً..

الـ track out مستمر...

مع مزج لتصبح الشاشة بيضاء

- تترات النهاية -



